

會計司四卷

總管內務府現行則例

總管內務府現行則例⁶

會計司一冊 定價壹角

版權所有

民國二十六年三月出版 300

十二

勘誤表

葉數	行數	誤	正
五二	二	所入大糧莊頭等	所屬大糧莊頭等
五一	二	俱不交給銀兩嗣後 所有賞進太監	俱不賞給銀兩嗣後 所有交進太監
五六	六	雖可就疾	雖可就痊
五八	四	辦理差參	辦理參差
八三	九	三處行宮地面	二處行宮地面

欽定總管內務府現行則例會計司

目錄

卷一

設立公廨員役

安設糧莊

糧莊納糧定額

交納豬口

豆稽莊納糧定額

半分莊納糧定額

收糧事宜

豆糧莊頭交納豆草定額

南苑安設糧莊

安設稻田莊

安設瓜菜園頭

交送進鮮糧米

親郡王分府撥給莊頭

莊頭旗戶編入保甲

咨送莊頭等家譜丁檔

公主下嫁撥給莊頭租銀

卷二

餵養馬匹交納豆草

咨領羊草

煮豆煤炭

交納各廐燈油

預備草豆

交納雜項物件

一六

一八

一八

一九

一九

一九

二〇

二〇

二二

二二

二三

二三

二三

會計司目錄

折交秬稽銀兩

二三

盛京糧莊納糧定額以下盛京

三三

奏銷關內納糧事宜

二三

徵收糧石

三三

承催官員賞罰

二三

人丁口糧

三三

關內糧莊納糧賞罰

二四

糧莊交納鵝鴨

三三

比查壯丁

二四

奏銷糧石

三三

查勘旱澇

二五

編查莊頭等第

三四

補放莊頭

二五

比查壯丁

三四

補換地畝

二八

查勘旱澇

三四

壯丁爲民

二九

補放莊頭

三四

派撥各處當差莊頭

二九

盛京餽養祭祀牛羊

三四

口外莊頭應交雜糧銀兩

三〇

安設關外管莊官員以下關外

三四

口外莊頭餘地納糧事宜

三一

糧莊地畝定額

三六

補放瓜菜園頭

三一

糧莊納糧定額

三八

徵收糧石

三八

內府女子准與八旗結親

四六

餒養大凌河羣馬

三九

挑選嫗嫗媽媽里

四六

糧莊交納雜項物件

四〇

挑選茶飯上人

四七

比查壯丁

四〇

挑選各項差務

四七

奏銷糧石

四〇

除派熱河值年員役

四七

查勘旱澇

四〇

收驗太監

四八

補放莊頭

四一

太監退役爲民

五四

打牲烏拉安設糧莊

四一

太監挑補首領年限

五六

打牲烏拉修理倉廩衙署

四一

鰥寡孤獨錢糧

五六

駐馬口外安設糧莊

四二

易買豬口

五七

歸化城安設糧莊

四二

入官人口

五七

卷二

挑選女子

四三

派給管領下無田地人口糧

六〇

入官地畝

五八

絕嗣產業

六一

派給道士口糧

七一

清查旗民地畝

六二

領給嫫嫫等買乳婦銀兩

七二

派除看管麥田莊頭

六三

領取紙張筆墨炭斤

七二

咨領內用米糧等物

六三

領取公費

七二

緣事闡割

六三

咨送莊頭子弟考試

七二

旗民結姻治罪章程

六四

遞送公文

七三

按摩人役事宜

六四

栢唐阿領借庫銀

七三

發遣釋回太監不准挑選首領

六四

幫助隨圍栢唐阿人等銀兩

七四

卷四

咨領栢唐阿太監匠役等錢糧

六五

旌表賢孝節義

七六

領取交送官物人員馬匹糧草

六八

盛京內府選補員役

七七

添裁栢唐阿匠役人等錢糧

六八

行給覺羅錢糧

七七

領取出差人員盤費

七〇

太監和尙喇嘛錢糧

七八

咨送交項銀兩 七八 獨子分祧服制 八九

移送查覈 七九 分府莊頭子弟考試 九〇

三旗無力回贖地畝 八〇 遞奏事宜 九〇

旗人典買地畝 八〇 旗人留養事宜 九一

回贖民典旗地 八一 移會事宜 九一

回贖歸旗地畝 八二 裁撤書吏 九二

行宮種樹圈佔地畝 八三 接收丁冊 九二

咨送太監等米石冊檔 八六 鈐用印信 九二

旗員子弟隨任 八六

學藝人等錢糧庫銀米石 八七

旗人承繼 八七

換地爲塋 八八

旗人銷檔章程 八八

欽定總管內務府現行則例

會計司卷一

設立公廩員役

會計司職掌莊園地畝戶口徭役等事 初名內官監 順治十七年改爲宣徽院原設郎中三員員外郎六員筆帖式二十一員催糧催總六員領催四十名催豬催總二員領催十名書吏二名聽差人十二名 康熙十六年十月奏准改爲會計司鑄給司印於郎中內奏派一員掌印添設主事一員將管理三旗銀兩莊頭員外郎六員筆帖式九員兼隸會計司 十七年四月奏准添書吏二名 二十三年五月奏准裁催糧催總六員領催二十名 三十年二月奏准復設催糧催總三員添領催七名 三十四年五月奏准裁筆帖式二員 三十八年七月遵旨奏准裁郎中一員 四十九年十月奉旨將催糧催總三員領催二十七名俱行裁汰 五十年九月奏准莊頭內委放屯領催令其催徵錢糧其隨往熱河預備差役令佐領下領催輪班行走 是年十一月奉旨復設催糧催總三員 六十年二月奏准挑佐領下領催二十名兼令催糧行走 雍正元年二月奉旨添郎中一員 是年四月奏准管理三旗銀兩莊頭官員筆帖式等另立衙署不隸會

計司 是年十月奏准設立漢字筆帖式四員將催糧行走佐領下領催二十名撥回復
設催糧領催三十名 是月呈准於筆帖式內委署主事一員 四年三月奏准裁催豬
領催四名 十二年十一月吏部奏准嗣後各部院衙門停其委署主事 十三年十一
月奏准添清字筆帖式二員漢字筆帖式一員 乾隆二十二年十二月奏准會計司設
委署主事一員於筆帖式內揀選帶領引見補放給與六品虛銜頂戴毋庸出缺仍食原
舊俸餉令其協理檔案事務 二十四年閏六月會典館奏准承催錢糧之催總改爲催
長 三十四年四月呈准本司額設大糧催長三名領催三十名除每年豬房熱河值年
兩路徵糧隨圍暨分派東西南三路承催各項錢糧差務不敷應差酌議將現有在司委
署領催上行走之三旗各佐領管領下蘇拉披甲人等內揀選人去得當差黽勉者佔用
二十四名分東西南三路每路分派八名仍食本身錢糧米石令其在本司副領催上効
力行走至每年承辦祭祀神豬雖有額設催長二名領催六名但莊頭散居四路各州縣
地方前往徵催豬口亦不敷差委一併於三旗各佐領管領下披甲蘇拉內挑選六名令
在豬房委署領催上効力當差 是年定准郎中三員員外郎六員主事一員委署主事

一員仍在筆帖式額內筆帖式二十六員催糧催長三員領催三十名委署領催二十四名催豬

催長二員領催六名委署領催六名書吏四名聽差人十二名 是月呈准於委署領催

上行走之披甲蘇拉內挑選三十名留爲委署副領催其餘悉行駁回本旗當差嗣後遇

有領催缺出由堂於筒內掣補一名於現在委署領催內按其行走當差勤慎者呈明坐

補一名儻委署領催內有不實心當差者回明駁回將本身所食錢糧一併斥革所遺委

署領催之缺另行挑補報堂註冊並行知都虞司掌關防管理內管領事務處三旗參領

等一體辦理 四十年十月奏准寧壽宮設立辦事員缺俱由事務簡少衙門轉補會計

司現設有郎中三員請裁一員轉補寧壽宮作爲額缺 五十六年七月呈准會計司額

設書吏四名內裁減一名 嘉慶七年四月定准會計司佔用委署領催行走披甲人六

十五名咨行都虞司轉飭各佐領管領下照依辦理 十一年五月奏准留頂戴催長五

員副催長三員裁頂戴副催長六員 現設郎中二員員外郎六員主事一員委署主事

一員仍在筆帖式額內筆帖式二十六員催長五員副催長三員栢唐阿領催三十六名

副領催佔用披甲人六十五名寫檔蘇拉十名看守衙署蘇拉一名聽差人十二名

安設糧莊

初設立糧莊於壯丁內揀選補放莊頭給地一百三十晌場院馬廐地四晌莊頭並壯丁共定爲十名給牛八隻如有倒斃報明補給量給房屋籽種口糧農器免納糧石一年

康熙八年三月奏准將莊頭等編爲頭等二等三等四等 二十四年三月奏准每糧莊

本身莊頭並壯丁共定爲十五名 是年四月奏准設立糧莊每莊給地三百晌 乾隆

十年十一月奏准本司所屬大糧莊頭共五百餘名定例整分莊頭各給地十八頃半分

莊頭各給地九頃內有自盛京隨從來京圈地充當莊頭者原圈地畝自二三十頃至四

五十頃不等嗣後凡原圈地畝莊頭之缺如伊子孫弟兄近族承替仍照舊充當無庸撤

減外如緣罪及拖欠錢糧革退絕嗣其遺缺以異姓之人充補者將原圈地畝按定例覈

計每地十八頃安放四等莊頭一名九頃安放半分莊頭一名不准溢額其餘零星不足

安放莊頭之地畝撤交地方官招民承種徵租解部如遇莊頭地畝缺額即將此項地畝

撥補再現今莊頭內有異姓承替原圈地畝者十四名俱當差年久並無拖欠錢糧仍准

其本身承領原圈地畝當差暫行免撤將來伊等缺出其子孫親族或異姓頂替之時俱

照新定之例覈計地畝安放

糧莊納糧定額

山海關內糧莊每年每莊原納糧一百斤石每斤石合倉石三石六斗 康熙五十年二月奏准按莊

頭等第納糧每年頭等莊每名額納糧二百五十倉石二等莊每名額納糧二百二十倉

石三等莊每名額納糧一百九十倉石四等莊每名額納糧一百二十倉石所納俱粗穀每石折米五

斗 頭等二等莊每年每名交納官三倉雜糧三十三石一斗二升內芝蔴二石一斗六

升蘇子三石六斗麥子十六石二斗菘豆一石九斗八升黃豆一石四斗四升黏穀一石

八斗穀一石四斗四升高粱一石二斗六升小豆五斗九升四合蕎麥七斗二升油麥一

斗八升黍子三斗六升稗子五斗四升豇豆三升六合燒酒一瓶半折糧八斗一升三等

四等莊每年每名交納官三倉雜糧二十九石五斗二升內芝蔴二石一斗六升蘇子一

石八斗麥子十四石四斗菘豆一石九斗八升黃豆一石四斗四升黏穀一石八斗穀一

石四斗四升高粱一石二斗六升小豆五斗九升四合蕎麥七斗二升油麥一斗八升黍

子三斗六升稗子五斗四升豇豆三升六合燒酒一瓶半折糧八斗一升俱准於額糧內

抵除外無論等第每名額交雞蛋一千六百二十二個古北口喜峯口外糧莊每年頭等莊每名額納糧二百五十倉石二等莊每名額納糧二百二十倉石三等莊每名額納糧一百九十倉石四等莊每名額納糧一百二十倉石無論等第每名交納官三倉雜糧三十三石一斗二升內穀二十二石七斗三升四合黏穀一石四斗四升蘇子三石六斗高粱二石七斗黃豆一石四斗四升蕎麥七斗二升油麥一斗八升黍子三斗六升豇豆三升六合稗子五斗四升俱准於額糧內抵除 雍正七年十月奏准查丈口外莊頭等原額地畝並自立開墾地畝過多且多寡不一將現有莊頭等各額給地六百五十晌外仍餘地三萬四千八百四十二晌按每莊地六百五十晌於莊頭子弟及殷實壯丁內挑取五十三名添放莊頭並原有莊頭均定爲每莊每年納糧二百五十倉石 乾隆十三年六月奏准直屬通州等九州縣所有酌留公用地畝併從前莊頭康經等十人退出官圈地畝查得酌留公用地內除撥用官賣並無租荒地塋地外實存徵租地六百五十頃八十四畝一分五釐八毫四絲六忽草房五十一間此項房地共原租銀一千六百八十八兩八錢五釐四毫三絲二微今酌定租銀六千四十一兩一錢六分四釐二毫八絲八忽

較原租多增租銀四千三百五十二兩三錢五分八釐八毫五絲七忽八微又莊頭康經等十人原退交地一百四十餘頃內除官賣撥補用過地並水冲荒地外現存徵租地一百十八頃七畝四分九釐草房二十三間空房基二間此項地畝原租銀八百十二兩四錢二分三釐八毫今酌定租銀一千一百四十九兩九錢五分八釐八毫較原租多增租銀三百三十七兩五錢三分五釐以上共地七百六十八頃九十一畝六分四釐八毫四絲六忽原徵租銀二千五百一兩二錢二分九釐二毫三絲二微今酌定租銀七千一百九十一兩一錢二分三釐八絲八忽比較原租通共多增租銀四千六百八十九兩八錢九分三釐八毫五絲七忽八微此項地畝自十九頃至二十七頃不等租銀自二百餘兩至二百七十餘兩不等編設整分莊頭地二十七圈半分圈地另詳半分莊納糧定額內照原奏於掣取莊頭筒內掣放所放莊頭免差一年其餘零星片段不敷編圈地六十七頃十六畝交與地方官招種照增定租數催徵解部再此項地畝俱係新增租數之地安設莊頭之後如民人不肯照酌定租數交納或以交地爲辭勒措莊頭交直督嚴飭各該州縣會同內務府派出指交地畝官員務按增定租銀數目指交與莊頭不許勒措儻新安莊頭內有不務

農業拖欠錢糧違悞官差者照例從重治罪革退莊頭將地畝交與地方官招種照增定租數催徵解部 二十五年七月具奏查二十二年十二月戶部奏准於直屬各州縣衛

二十一年分奏銷存退餘絕地三千二十八頃內除酌留地一千頃撥補應用外其餘地畝編圈安放莊頭戶部內務府各派出官二員前往會同該地方官查丈得前項應編圈地畝坐落通州青縣等四十四州縣除水冲河佔荒蕪無租及莊圈撥補並不堪編圈地畝外實可編圈地一千五百九十九頃三十八畝零隨地瓦土草房二百二十間原租銀四千九百六十三兩零今酌定租銀一萬四千八百五十六兩零較比原租多增租銀九千八百九十三兩零此項地畝自二十頃至二十七頃零不等編設整分莊頭二十三圈

半分圈地另詳半分莊頭糧額內 於勤務農業莊頭之弟男子姪內有家道殷實人去得者由屯千總各

莊頭保送揀選補放照例免差一年安放之後儻有不務農業拖欠錢糧違悞官差者照例從重治罪革退莊頭遺缺如有情願代完欠項頂替者仍准其代完頂補如無情願頂替者即將地畝交與地方官招種照增定租數催徵解部所欠錢糧差務不准豁免查明

原保莊頭著落代完賠補其現有荒蕪無租地七十五頃零原有招佃認墾陞科之例將

此項荒蕪地畝交與直督派員查明照例招佃認墾成熟陞科現有口內莊頭三百四十名內頭等莊頭四十五名二等莊頭十三名三等莊頭三十名四等莊頭二百五十二名口外熱河莊頭一百三十六名 五十二年十月奏准掌關防管理內管領事務處所屬菜庫旱地園頭三十五名於四十年奏准折交錢糧每名每年交錢糧銀一百六十二兩至畦地園頭二十五名內除豐澤園佔用一名其餘二十四名係按日自行交差請將畦地園頭亦照旱地園頭折交銀兩之例一體辦理每名折交銀一百六十二兩再查大糧莊頭及旱地畦地園頭等地畝人丁戶口均隸會計司管理而莊頭應交之錢糧係會計司徵收旱地園頭等應交之錢糧向係菜庫值年內管領徵收辦理殊未允協請將旱地畦地園頭折交銀兩歸入會計司按限一體徵收以歸畫一 五十三年正月步軍統領衙門奏准戶部去歲秋間派委司員將直隸各州縣荒地查出可墾者共八百餘頃未便任其荒蕪請將前項地畝即交該莊頭等分圈佃種照例陞科交租似於旗人生計有益亦於國課無虧再照該莊頭等所呈名數按等編圈約需用地二千八百餘頃今前項荒地可墾者僅止八百餘頃不敷分撥查戶部冊檔內直省各州縣尚有存退餘絕公產抄

產等項地共一千二百四十餘頃向係招民佃種所有承種官地之民歷年不無拖欠莊頭等子弟俱各爛於屯種請將此項地畝交直隸總督通行各州縣將承種各項官地民人內有不願承種者及現在拖欠官租者俱各清查造冊報部會同內務府按各莊頭住址附近處所撥與該莊頭等承種照例交租 五十四年五月呈准舊有莊頭五百餘名係分東西南三路派催長領催等各按路承催辦理請將此項新圈莊頭一百十二名按其地畝坐落亦分在東西南三路其所徵收糧石折價銀兩屆期請派官三員即分三路前往徵收庶於該員易於責成銀兩亦可於限內完結再新圈莊頭等家譜丁檔俟遇比丁年分卽照舊有莊頭之例一體派員查比

交納豬口

凡關內頭二等莊頭額糧外每名每年額交祀神大豬二口或常用豬四口三四等莊頭每名每年額交常用豬三口 康熙三十九年五月奏請各莊所交祭祀豬口不敷應用請添派各莊交納奉旨此不敷應用之豬口如添派莊頭等必至難以承應伊等應交之豬仍著照常派交其不敷用之豬俱著於光祿寺取用欽此 雍正四年三月奏請口內

各莊每年應交祭祀豬口俱交光祿寺備辦各莊頭所交豬口每口折糧十五石再春秋二季祭祀所用大豬無多仍著殷實頭等二等莊頭交納奉旨著爾衙門人等備辦不必交光祿寺欽此 是年四月呈准口內各莊應交祭祀豬口停其交送每豬一口折糧十五石交與催糧官徵收照例每石折銀五錢交納廣儲司由會計司向廣儲司支領銀兩交催豬催總等訪時價購買備用 是年十月呈准在京設立豬圈餵養二百口仍令莊頭等照數交圈餵養供用 乾隆五年三月奏准頭二三四等莊頭每年各減納豬一口其拖欠豬口按定價折銀交廣儲司如有不敷用豬口亦按定價向廣儲司咨領莊頭等交納粗糧折價銀兩採買應用 是年四月呈准每年入圈餵養豬二百口內於城外豬圈內留養一百口城內豬圈內餵養一百口應用俟用過二十口後將城外豬圈餵養豬口續入補足一百口 二十一年八月內務府會同光祿寺奏准向例奉先殿每逢誕辰忌辰節令每次致祭用豬二口係光祿寺交豬行民商採買備辦今裁革豬雞二行嗣後凡奉先殿致祭所用豬口照內庭祭祀所用敬神豬口之例交會計司莊頭備辦 是月據掌儀司呈准每年奉先殿壽皇殿致祭所有應用豬口每口重五十斤每逢致祭於前

二日令會計司派員送至大飯房省畢轉交奉先殿飯房應用

謹將奉先殿每年致祭用豬日期開後

正月

初三日忌辰

係用肉房冷牲不用豬口如屆期冷牲不到亦用豬四口

初七日忌辰

係用肉房冷牲不用豬口如屆期冷牲不到亦用豬四口

十一日忌辰用豬四口

十四日忌辰用豬四口

二十一日忌辰用豬四口

二十三日忌辰用豬四口

二十九日忌辰用豬四口

三十日誕辰用豬四口

二月

初七日忌辰用豬四口

十一日忌辰用豬四口

二十六日忌辰用豬四口

三月 十一日忌辰用豬四口

十八日誕辰用豬四口

四月 十七日忌辰用豬四口

二十九日忌辰用豬四口

五月 初三日忌辰用豬四口

二十三日忌辰用豬四口

七月 初十日忌辰用豬四口

二十五日忌辰用豬四口

八月 初九日忌辰用豬四口

初十日誕辰用豬四口

十一日忌辰用豬四口

十三日誕辰用豬四口

二十三日忌辰用豬四口

九月 二十七日忌辰用豬四口

二十九日忌辰用豬四口

十月 初六日誕辰用豬四口

二十五日誕辰用豬四口

三十日誕辰用豬四口

十一月 十三日忌辰用豬四口

十二月 初六日忌辰用豬四口

十一日忌辰 係用肉房冷性不用豬四口如屆期冷性不到亦用豬四口

二十五日忌辰 係用肉房冷性不用豬四口如屆期冷性不到亦用豬四口

清明令節用豬四口

端陽令節用豬四口

霜降令節用豬四口

重陽令節用豬四口

以上誕辰七忌辰二十六令節四

壽皇殿每年除夕恭懸聖容致祭用豬四口正月初二日恭收聖容致祭用豬四口

以上共三十九次致祭共額用豬一百四十口

是年九月呈准據掌儀司移稱奉先殿壽皇殿致祭所用豬每口重五十斤比較莊頭等額交常用豬口稍覺微小酌定嗣後莊頭等交納此項致祭豬三口准其折抵常用豬二口飭交催總領催等預行嚴催照例入圈敬謹餵養於致祭前期交送俟歲底將每年用過豬口數目及折交常用豬口數目入於題銷豬口本內具奏 二十六年七月呈准嗣後承辦祭祀豬口每年於會計司官員內除派二員值年專司其事所有莊頭等交納豬口以及辦買豬口令其督率催長等敬謹餵養以供祭祀又查會計司大糧房設有催長三名栢唐阿領催三十名內委署副催長三名承催莊頭一切應交豆草錢糧豬房設有催長二名栢唐阿領催六名內委署副催長二名承催莊頭等應交祭祀豬口嗣後無論大糧豬房催長領催令該值年官員視其人去得者揀選催長二名領催六名令其值年承催承辦其不值年之豬房催長領催等歸併大糧房當差再於會計司筆帖式內揀選

二員隨值年官員辦事執掌檔案其除派值年官員每年由堂回明除派該值年官員筆帖式均以一年一次更換至更換之時令舊值年官員務將經手錢糧併所用豬口明白交代其接年官員仍將交代清楚之處呈明存案至值年之催長領催等均以二年一次更換二十九年九月呈准嗣後承辦祭祀豬口值年官員每年自八月初一日起接辦至次年七月底止均令今年清年欸毋使牽混舊值官員所有經手錢糧用過豬口數目總於會計司奏銷莊頭一年雜糧差務通本以前由堂勒限令其自行覈銷清楚呈明於廣儲司領辦豬口銀兩外有不敷者仍向該庫找領如有存剩銀兩令該值年官員自行繳回廣儲司銀庫歸款若在莊頭名下拖欠未交者交司入本題參交東西二路徵糧官代徵解交廣儲司銀庫四十二年十月奏准會計司所入大糧莊頭等除每年額交糧石豆草折色銀兩外又例應交春秋二季大神應用牙豬七十八口坤寧宮應用白豬五百十八口做糕做酒應用紅黏穀七百八石四斗八升其莊頭應交豬口全行折色每白豬一口作價銀十三兩每牙豬一口作價銀二十六兩至紅黏穀一項應請官三倉按大宛二縣所報實價採買備用其莊頭等應交之穀卽照該倉所領之價折徵還項此項豬穀

折色銀兩每年自正月起至十二月止交豬房值年司員全行如數徵催完結於次年二月內題銷如稍有拖欠即將該莊頭參革 四十三年十二月呈准坤寧宮祭祀豬口每日進用豬四口如遇還愿日期只進常用豬一口春秋二季大神每季用大牙豬三十九口至四季敬神金帛變價每季抵用豬二十八口以上所用豬口數目嗣後請交掌儀司將坤寧宮某日係常神某日係還愿某日係大神某日係敬神某次祭祀用豬若干口每至月底取具司胙官報呈一面報堂一面移咨會計司存案覈銷通俟一年期滿掌儀司會計司將逐月用過豬口報堂細數彙總算清與堂上數目覈對確實進本題銷再查奉先殿壽皇殿每年忌辰誕辰並令節日期供獻豬口請交掌儀司傳知該處首領太監將用過豬口數目逐月呈報掌儀司併入坤寧宮敬神豬口數內報堂並移咨會計司存案以備題銷 四十四年七月呈准徵收各莊頭豆草銀兩定限不准過五月三十日至豬穀銀兩向無定限如有未完豬穀銀兩過於下年催糧官員代徵交庫現經四十二年十月內奏准每年以正月初一日起至十二月三十日止爲一年期滿更換值年官員其徵催銀兩務必年清年款不准拖欠亦不准過於下年糧官代徵嗣後豆穀銀兩仍照舊限

外其豬穀銀兩定於麥秋不准過六月三十日大秋不准過十一月三十日定爲二季亦令莊頭等自行赴庫交納查豬價有牙豬常用豬祭祀豬三色之分頭二等莊頭應交三口三四等莊頭應交二口請概以常用豬價每口交銀十三兩其穀價應照依大宛二縣呈報實價交納

豆稽莊納糧定額

初設立豆稽莊於壯丁內揀選補放莊頭給地六十五晌場院地二晌莊頭並壯丁共定爲五名給牛四隻倒斃不准補給量給房屋籽種農器免納糧石一年其納糧額數減糧莊之半賞罰勘荒比丁等例俱照糧莊其交厩豆稽酌量均派每豆稽十六束抵糧一東

斗合倉斗一斗八升
豆稽每束重七斤

此外各交常用豬二口鵝五隻雞鴨各二十六隻鵝蛋十八個鴨蛋七十二個雞蛋四百個秫稽一百二十捆燈油十五斤不准抵除額糧

康熙二十六年

三月奏准莊頭並壯丁共定爲七名 四十五年四月奏准每莊地定爲一百五十晌

五十年二月奏准每莊定額各納糧六十倉石 雍正二年五月呈准於豆稽莊頭內挑

選三十名暫編爲半分莊頭 六年六月奏准將所有豆稽莊頭七十二名俱編爲半分

莊頭

半分莊納糧定額

初設立半分莊其莊頭並壯丁共定為七名給地一百五十晌其納糧額數減糧莊之半

賞罰勘荒比丁等例俱照糧莊每年每名額交圈黑豆二十五倉石二斗於額糧內抵除

穀草一千束每束重七斤 秫稽一百四十捆每捆重十五斤 康熙五十年二月奏准每莊定額納糧

六十倉石 雍正六年六月奏准將豆稽莊七十名編入 乾隆十三年六月奏准於直

屬通州等九州縣所有酌留公用地並從前莊頭康經等十人退出官圈地內自九頃十

一頃不等租銀自九十餘兩至一百十餘兩不等編設半分莊頭地七圈於掣取莊頭筒

內掣放半分莊頭七名其編圈安設一應事宜俱詳糧莊納糧定額內 十七年十二月奏准將營造司所屬開

平居住交納缸盆等項莊頭一名兼帶原給官地九頃零改隸會計司為半分莊頭 二

十五年七月奏准於直屬通州青縣等四十四州縣現有存退餘絕地內派員查丈自十

頃零至十三頃零不等編設半分莊頭七十三圈於勤務農業莊頭之弟男子姪內有家

道殷實人去得者由屯千總各莊頭保送揀選安放其編圈安設一應事宜俱詳糧莊納糧定額內 現有半分

莊頭二百六十二名

收糧事宜

雍正元年十二月奏准將口內糧莊額納糧石每年委官二員分東西二路赴該地方按每石折銀五錢徵收交納廣儲司 二年五月奏准口外莊頭等額納糧石內除交納雜糧外其餘糧石每二石折米一石令莊頭等送至熱河等處倉內收存凡運米十石入倉准其抵除糧一石每年派官一員徵催入倉 七年十一月奏准官三倉所用雜糧停其莊頭等交納令值年內管領每年秋收後量一年足用呈明向廣儲司領銀訪時價辦買應用口內頭二等糧莊每分徵銀六十八兩八錢三四等糧莊每分徵銀六十兩二錢令派往徵收口內糧石官員徵收口外糧莊每分徵銀四十一兩二錢八分令派往徵收口外糧石官員徵收交納廣儲司 九年十二月呈准懷來保安等處居住莊頭等餵養羣馬餘剩派交各圈草束因路途遙遠嗣後停其交送厰圈每草一束折價交銀一分一釐令派往催徵糧石官員等催徵交納廣儲司 十年十二月奏准口外糧莊每年應徵糧石及交倉雜糧折價銀兩停其派員徵收交熱河總管管理每年令熱河值年官員徵收

將應徵糧石折米監視入倉其雜糧折價銀兩每年分作二次催徵交納廣儲司 乾隆

二年五月奏准每年糧莊應交粗糧雜糧折價銀兩停派員徵收每年分作二次於麥秋

後六月內交納四成秋收後十一月內完納著屯領催催齊各赴司交納由會計司轉交

廣儲司 四年二月奏請莊頭等應徵納錢糧每年除派催糧催總領催等赴各該莊催

徵奉旨若令催總領催赴各莊催徵錢糧未免騷擾莊頭仍照從前例派員催徵欽此

十七年十一月奏准將莊頭等餵養上駟院羣馬裁汰其每年額派豆一萬一千三百六

十餘石草六十九萬二千餘束照例黑豆折糧每石徵銀五錢草束俱係莊頭自備並不

開銷錢糧酌定蠲免一半將一半折徵銀兩令其交納 本年額派草豆除餵過馬匹外其未經餵用者俱折銀徵收自次年

起額徵草豆內除分派送圈外折銀徵收 三十年十一月呈准嗣後承催口內莊頭等應交糧石折價銀兩

務令東西兩路官員遵照定例於麥季徵納四成大秋徵納六成其徵得糧銀交納銀庫

俟出具庫收再行呈明將未完銀兩於稿內聲明即行陸續嚴催統定限於八月內催齊

將已完未成數分晰造冊呈明交司其承催熱河錦州莊頭等應交雜差米石銀兩亦

定限於八月內令該總管該副都統將已完未完莊頭等花名清冊移咨本司詳細查覈

於九月十五日送堂銷算如有不遵呈准定限有意遲延於九月內文冊始到者本司將承催官員職名呈堂按逾限例記過入本題叅如仍因循遲延至十月內始行呈送檔冊者即將有意遲延承催不力之員指名叅處將此載入則例行令口內口外關外承催莊頭應交錢糧之員一體永遠遵行辦理 三十二年十一月呈准採訪雜糧時價每石車脚銀三分合計值年內管領等呈明採買次年正月至十月備用雜糧七千五百石雞蛋四十萬個燒酒一千斤應給銀一萬七千七百四十九兩九錢四分七釐該值年內管領等出具印領由廣儲司於莊頭等交過糧石折價銀兩內如數支領如時價有減即照減價採買餘剩銀兩繳回庫內如價不減即照此價採買領銀之後及時作速全行採買於入倉之前造具清單一面報堂一面報管轄番役處官員等逐一詳細查勘照數監收入倉以備應用永爲定例遵照辦理 三十三年正月奏准嗣後每年官三倉應備雜糧等物取足供內用之數購辦以供應用其餘外項支領之物停其採買概照時價折銀給發聽其自行買用至官三倉既專備內庭糧米雜物每年量一歲足用給發銀兩於秋後購買上等雜糧備用其各作房所需米豆芝麻等物或應隨時購用或應先期發辦於每年採

買雜糧時一併呈堂領銀採辦所有內庭及外項應用雜糧等物款項開後

內項應用行款

內膳房分例

外膳房分例

內膳房賞用添用供用茶房分例

茶房賞用坤寧宮祭祀聖容前每日供獻餠餠桌張

宮內佛前供獻桌張供餅

阿哥公主福晉等位分例

年節筵宴餠餠桌張

賞用餠餠桌張

內管領預備雜糖等物

賞念經喇嘛等食茶

中正殿等處念經行取雜糧等物

養心殿等處點海燈

各寺廟供桌供餅

侍衛飯房分例

東長房分例

嫫嫫媽媽飯食

食膳房飯軍機章京中書畫畫人等飯食

以上內項並七作房每年約需雜糧六千六百餘石值銀一萬五千一百八十餘兩仍交
官三倉備辦

外項應用行款

熱河普寧寺普樂寺溥仁寺安遠廟念經行取雜糧

咸安宮景山官學教習飯食

慈寧宮中正殿永安寺等處太監喇嘛飯食

萬善殿教經和尚飯食

雍和宮和尚道士飯食

中正殿永安寺闡福寺仁壽寺弘仁寺慈寧宮法淵寺等處念經喇嘛飯食

造辦處武英殿御書處栢唐阿匠役人等飯食

奉宸苑行取景山瀛臺等處餵養牲禽雜糧

回子字官學領催蘇拉人等飯食

武備院造箭栢唐阿匠役人等飯食

造佛處栢唐阿匠役人等飯食

營造司廣儲司武備院等處行取雜糧

寧壽宮東長房三所南勲殿坐更燈油

雍和宮南府景山瀛臺承光殿坐更燈油

以上外項每年約需雜糧二千六百餘石值銀五千六百四十餘兩停止買備雜糧一概

折銀給發 是年二月呈准查官三倉一年應用雜糧九千二百餘石值銀二萬八百二

十餘兩此內除外項應用雜糧二千六百餘石值銀五千六百四十餘兩再查麪觔一項

與鍋渣豆腐事同一體今鍋渣豆腐既經奏准折價給發麪筋一項自應一體辦理亦照例覈給價銀每年約需麥子九百餘石值銀二千二百餘兩一併令各該處照覈定價銀數日向廣儲司銀庫自行支領應用 三十四年十二月呈准嗣後所有會計司莊頭應交雜糧等項折價銀兩亦照管理三旗銀兩莊頭處之例每年派會計司司官二員分東西兩路嚴催令該莊頭赴司交納停其在外徵收錢糧遇有查辦指交地畝案件仍令該委員帶辦料理其莊頭應交錢糧仍令麥大二季分四六成數令該屯領催將各屬下莊頭傳齊親身帶領赴司當堂交納至此項錢糧除會計司郎中專司監收並派會計司司官二員協同辦理所收錢糧數至千兩卽行呈明交廣儲司銀庫 是月奏准嗣後莊頭等每年應交上駟院慶豐司各圈豆草等項停止交送酌定黑豆每石折銀一兩二錢數草秫稽燈油照各圈隨時採買實價數目徵交廣儲司銀庫還項仍自九月初一日起限至次年五月內全行完結如稍有拖欠者不拘成數卽行叅革加倍治罪 三十五年正月呈准大糧莊頭等每年應交豆草秫稽燈油併雜糧等項折價銀兩赴司當堂交納應需天平一架法碼一分戩子二桿移付廣儲司咨行工部領取所收銀兩會計司應設立

銀庫暫行封存俟數至千兩即行呈交廣儲司銀庫看守會計司銀庫應需弁員由都虞司專派章京一員披甲人十名 二十六年四月呈准徵收莊頭等應交雜糧等項折價銀兩令莊頭等赴司交納停其委員在外徵收今甫及一年而錢糧反積欠三萬九千餘兩之多請仍令委員出京按站嚴催並將上年行取工部庫贖二桿交委員攜帶將莊頭等應交錢糧當面驗明平兌封固令該屯領催等按站護送來京赴司交納 四十三年十一月據慎刑司呈明嗣後莊頭應交豆草錢糧務令親身赴司當堂交納該司官員無論值年與否在署三四員以上即公同驗明成色不必彈兌即令莊頭親身畫押標日封固暫存該司遇銀庫開庫之期該司官員即令莊頭驗明原封帶赴銀庫交納查該司舊例每年差派催長領催分往各路承催莊頭豆草錢糧分投傳喚絡繹不絕莊頭等承領官地充當差務百有餘年亦熟知某項錢糧於某時交納按限清完歷年不爽即偶有一二拖欠者該司舊有叅革之條自可隨時懲治原無藉催長等沿莊追呼其弊不可枚舉即令莊頭親身赴銀庫交納錢糧且有司員當堂收驗其差派催長等催傳之事應請永行停止以杜弊端至該司銀庫原爲收存錢糧而設今隨收隨交且惟數無多該司不過

暫行存收應將該司銀庫裁去並停派值年之員其看庫章京披甲等應移知都虞司盡行撤回四十九年十一月呈准管理三旗銀兩莊頭處各莊頭錢糧均係本衙門當堂交納請嗣後仍照舊例莊頭等應交豬穀豆草銀兩准其交納會計司司員等公同當堂隨到隨收不准委令催長等率意交收所收錢糧遇開庫之期即行交納嘉慶六年十二月具奏莊頭共五百四十四名積年拖欠錢糧銀十七萬六千餘兩內請將乾隆五十七年並五十九年分分年帶銷糧石折價銀二萬九千九百五十八兩一錢八分六釐嘉慶三年分糧石折價銀三萬六千八百十兩四錢五分四釐三年至四年分稻米二百五十九石二斗五年至六年分豆草折價銀一萬九千七百九十七兩二錢五分四年分園頭拖欠五限菜蔬折價銀三百十八兩一錢三分五釐此四項共計銀八萬六千八百八十四兩二分五釐准予寬免其應交四年分糧石折價銀三萬六千七百二十七兩六錢六釐四年至五年分稻米二百七十六石四斗五升六合園頭拖欠五年分菜蔬折價銀五千三百十八兩四錢二分九釐此二項共計銀四萬二千四十六兩三分五釐緩至明年麥秋全數完納其應徵五年分糧石折價銀四萬七千四百四十六兩五錢七分二釐

緩至明年大秋如數完納儻臨限再不能完納即將該莊頭等照例治罪並請嗣後將莊頭等應交各項銀兩按年彙總分三七成交納其麥秋應交三成錢糧限以六月爲期大秋應交七成錢糧限以十月爲期如有屆限不行交納拖欠分釐者即行革退加重治罪至向來限內交納五成並限外復給五限之處概行停止至革退新圈莊頭百有餘名共積欠銀五萬三千一百九十七兩八錢七分八釐此項銀兩自應遵照原奏著落原保莊頭代賠但此項莊頭皆係無人頂替之缺其原承地畝業經退交該地方照例徵租解部即原保莊頭或因本身拖欠錢糧革退或已經物故此項代賠銀兩無可著追奏請豁免等因是月初六日奉旨內務府具奏會計司莊頭等歷年拖欠錢糧一摺該莊頭等應交之項自應按年清款悞限者照例革退但念本年雨水較多收成未免歉薄著加恩將各莊頭等積欠銀共十七萬六千三百餘兩內寬免銀八萬六千八百八十四兩零餘銀八萬九千四百九十二兩零緩至明年麥秋大秋二限完納以示體恤儻屆限不交即將該莊頭等照例治罪至另單所開已革退莊頭無著銀五萬三千一百餘兩著全行豁免餘依議欽此 七年正月呈准奉旨寬免莊頭等積欠銀兩請將莊頭等已交未交花名並

糧錢數目開寫清單遍行曉諭以杜侵蝕其餘緩至七年麥大秋時應交銀兩如有不完
卽遵照具稿革退照例治罪並請將莊頭等應交六年分豬穀豆草錢糧於七年分按三
七成麥大二季徵收如有拖欠卽行呈明革退按年入於通本內覈銷其莊頭等應交六
年分糧石折銀行令徵糧官於八年分按麥大二季分爲三七成徵收務於十月內完結
如有拖欠分釐卽行呈明革退其稻米莊頭應交稻米亦按三七成於八年麥大二秋如
數完納儻有拖欠俱照例革退治罪卽於年終通本內題銷嗣後遵照辦理至莊頭園頭
等一經革退向例隨傳該親丁等有無情愿頂替者俱令親身赴司具呈請嗣後莊頭園
頭革退後卽稟諭該路屯領催取具該親丁等無力充當甘結送司存案其情愿代完欠
項頂替者卽令該屯領催帶領赴司具呈辦理儻有遺漏等情照例治罪

豆糧莊頭交納豆草定額

投充豆糧莊頭六名內一名地一千九百四十三晌六畝每年額交豆五百二十二倉石
三斗六升一名地一千二百二十八晌五畝每年額交豆三百二十八倉石九斗三升二
合一名地一千四百五十五晌一畝每年額交豆三百八十六倉石九斗六升四合一

地一千七十七晌四畝每年額交豆三百九倉石五斗六升四合一名地一千四百五十五晌二畝每年額交豆三百八十六倉石九斗六升四合一名地一千七十二晌一畝每年額交豆二百九十倉石二斗三升二合其勘荒比丁賞罰之例俱照大糧莊頭 康熙十五年四月奏准投充豆糧莊頭等六名共地八千二百十四晌二畝照依銀兩莊頭地畝之例每畝作銀五分除伊等應交料豆每斤斗作銀二錢合計每地一畝銷除銀三分外其餘銀二分令其折交草一束共交草八萬一千九百四十六束按地畝分派交納

南苑安設糧莊

康熙九年四月奏准於頭二等糧莊內挑選四名在南苑安設莊頭每名額給南苑地三百晌其原糧莊缺令伊等之子弟頂補伊等原莊舊有壯丁內二十名撥往南苑十名舊有牛隻內十六隻撥給南苑八隻如不敷數補給

一應差務詳見南苑則例

十二年正月奏准南苑

添給莊頭一名其地畝壯丁牛隻俱照前例撥給 是年三月奏准撥往南苑壯丁等仍歸原莊冊內查比其原莊壯丁內如有逃走竊盜事故莊頭雖在南苑仍照例處分

安設稻田莊

原房山縣稻田莊頭一名所有稻地四十七晌每年每晌額徵稻米二倉石一斗六升五
田縣稻田莊頭一名所有稻地一百十晌旱地二十晌每年稻地每晌額徵稻米一倉石
四斗四升旱地每晌額徵糧二倉石七斗七升二合 康熙二十一年三月呈准戶部交
進涿州稻田莊頭一名原有稻地一百三十晌旱地二十八晌每年稻地每晌額徵稻米
一倉石四斗四升旱地每晌額徵糧二倉石七斗七升二合 六十年二月奏准將涿州
入官稻地五十晌交附近莊頭承種每晌亦額徵稻米一倉石四斗四升 雍正七年七
月呈准房山縣所有入官稻地一百三十二晌三畝安設稻田莊頭一名每年每晌亦額
徵稻米一倉石四斗四升

安設瓜菜園頭

凡安設瓜菜園頭每菜園頭一名給畦地十九晌每瓜園頭一名給地三十晌各給養家
口地二十五晌給牛四隻蒲簾一百二十五個編籬秫稽三千五百捆免差一年 康熙
五十一年二月奏准豐臺設立菜園頭十一名每名給地四頃內畦地一頃八十畝井六
眼牛四隻房三間 雍正十年五月呈准補放園頭因附近無應給畦地每畦地一畝補

給旱地五畝合計各給旱地九頃

一應事宜詳見掌關防內管領處則例

乾隆五年九月呈准查菜園頭

等所交差務折銀一事原奏內開每人折銀一百六十二兩交該內管領等徵催交納廣儲司庫所用菜蔬令該內管領等向廣儲司領銀採買備用園頭等從前輪班交納菜蔬乃日用所必需曾無拖欠今改折銀兩恐有耽延應請於菜庫內管領四員內每年委派二員值年以專責成其改折銀兩於麥大二秋限定分數嚴催交納其所買菜蔬價值令該庫每月造具清冊呈報掌關防內管領詳細查對外仍於歲底統將一年領過銀兩並折交銀兩數目呈報掌關防內管領與買過菜蔬所用銀兩數目詳加查覈呈明銷算具題如該園頭稍有拖欠或內管領承催不力並不能撙節除將該園頭革退從重治罪外仍將該內管領交該處嚴加查議等因奏准在案今內管領等於上年七月內領銀自八月辦理應請照大糧莊頭交納錢糧隔年銷算之例自上年八月初一日起至本年七月三十日作爲一年銷算每年於歲底題銷至園頭等錢糧欠至幾成應如何枷責革退承催之內管領承催錢糧完日如何議叙承催不力作何罰俸請照奏准定例各處應徵錢糧分爲十成徵催莊頭等應交錢糧麥秋不逾六月交納四成大秋不逾十一月交納六

成此內除所欠不至一成者毋庸議外將欠至一成以上之承催官罰俸三個月二成以上罰俸六個月三成以上罰俸九個月四成以上罰俸一年五成以上降一級六成以上降一級罰俸一年停其陞轉仍令帶罪徵催未完錢糧頭目栢唐阿等亦按成數治罪如能全完一年應徵錢糧者官員紀錄一次頭目栢唐阿於應陞之處記名連完六年應徵錢糧者官員加一級頭目栢唐阿於應陞之處列名莊頭等將應交錢糧欠至一成者鞭四十枷號二十日欠至二成者鞭六十枷號四十日欠至三成者鞭八十枷號兩個月欠至四成至五成者鞭一百枷號三個月將所欠錢糧仍行徵催交納欠至六成至七成者鞭四十枷號一個月革退莊頭充當壯丁所欠錢糧予以豁免欠至八成至九成者鞭六十枷號四十日革退莊頭充當壯丁所欠錢糧予以豁免欠至十成者鞭八十枷號兩個月革退莊頭充當壯丁所欠錢糧予以豁免遺缺伊等族人內有情願頂替者完交錢糧頂替如不能代交不准頂替另於別莊子弟及壯丁內揀選補放舊欠予以豁免等語今園頭等錢糧照依莊頭每年自八月起至次年七月止作爲一年於歲底銷算具題應請交掌關防內管領等嗣後承催園頭等錢糧亦分爲十成徵催其該庫內管領等議處議

叙罰俸及欠錢糧之園頭等按成治罪之處均照此例辦理 五十二年奏准掌關防管理內管領事務處所屬旱地園頭三十五名於乾隆四年奏准折交錢糧每名每年交錢糧銀一百六十二兩共應交銀五千六百七十兩此項錢糧係菜庫值年內管領等於年終催齊交納廣儲司銀庫收以備菜庫值年內管領陸續由銀庫支領銀兩隨時辦買供奉內庭菜蔬至畦地園頭二十五名內除豐澤園佔用一名其餘二十四名係按日自行交差一年計算旱地園頭輪流交差二百一十一日畦地園頭輪流交差一百四十四日今旱地園頭折銀交納其畦地園頭應交各項俱係菜庫值年內管領等代爲辦買殊未畫一查定例旱地五畝折畦地一畝今旱地園頭每名承種旱地九頃畦地園頭每名承種畦地一頃八十畝按例計算地畝錢糧相應請將畦地園頭亦照旱地園頭折交銀兩之例一體辦理每名折交銀一百六十二兩計二十四名共應折交銀三千八百八十八兩併旱地園頭共應交銀五千六百七十兩二共應交銀九千五百五十八兩於年終如數交納廣儲銀庫收所有採買菜蔬均交值年內管領等由銀庫陸續支領辦買供用所有京城採買價值按照各等處辦買雜糧等物之例令大宛二縣將時價一月二次申

報如遇隨圍熱河卽著承德府申報時價巡幸各等處於隨圍司員內揀派一二員確訪時價採買辦理其用過錢糧數目於年終派員查覈後彙總具題再查得大糧莊頭及旱地畦地園頭等地畝人丁戶口均隸會計司管理莊頭應交錢糧係會計司徵收旱地園頭等應交錢糧係菜庫值年內管領徵收今請將畦地園頭改折銀兩合計旱地園頭應折銀兩共九千五百餘兩銀數較多若仍令菜庫值年內管領徵收該員等在內承應差務不能兼顧請將旱地畦地園頭折交銀兩歸入會計司按限一體徵收交納廣儲司銀庫以歸畫一

交送進鮮糧米

每年八月初一日祭祀應用蘇子白小豆紅黏穀派朝陽門外居住莊頭一名房山縣居住莊頭一名各交蘇子二倉斗白小豆二倉升紅黏穀三倉斗六升交送官三倉存收備用其奉先殿供鮮及內庭進鮮應用大黃米粟米糜米高粱米大麥米均派朝陽門外居住莊頭八名交送官三倉以上二項俱不准抵除額糧

親郡王分府撥給莊頭

道光二年六月本府奏准惇親王瑞親王分府遵照成親王分府之例各賞給山海關內大糧莊頭十二名半分莊頭一名菜園頭二名山海關外大糧莊頭三名盛京大糧莊頭一名八年七月本府奏准惠郡王分府應得山海關內大糧莊頭十名半分莊頭一名菜園頭二名山海關外大糧莊頭二名盛京大糧莊頭一名咸豐二年四月本府奏准恭親王分府遵照惇親王瑞親王分府之例各賞給山海關內大糧莊頭十二名半分莊頭一名菜園頭二名山海關外大糧莊頭三名盛京大糧莊頭一名

莊頭旗戶編入保甲

道光四年六月呈准嗣後本府所屬各項莊頭及屯居旗戶等每遇地方官編查保甲之時聽從該管州縣按戶編查如有不服約束及滋生事端者除由該地方官呈報該督照例嚴行究辦治罪外本府定將該莊頭斥革該旗戶銷除旗檔仍從重治以應得之罪並不准再設有總催領催名目

咨送莊頭等家譜丁檔

道光十四年五月本司呈准嗣後盛京內務府錦州副都統熱河總管衙門造送莊頭等

家譜丁檔務將該親丁等名字斟覈如有取名未協者即行更改妥協造入譜冊咨送本司存收以備查覈概不准遇頂替莊缺之時改名以杜朦混再各處頂替莊缺等項事件來文向係投堂本司由堂鈔出辦稿覈覆鈔錄時恐有錯落嗣後該處遇有頂充莊缺等項事件除照例投堂外仍照原文徑行本司以便覈對而免錯訛

公主下嫁撥給莊頭租銀

道光二十一年本府遵旨具奏固倫公主每年進項不敷支用酌加賞給銀兩等因查固倫公主下嫁外藩在京居住應給當舖一座由會計司按給三等莊頭二名半分莊頭一名由官房租庫分撥取租官房數處所撥莊頭每年應交銀不過五百兩儻遇水旱稍有拖欠則無別項可補覈計每年用項實係入不敷出擬請稍爲變通酌量加增應請於原撥莊頭租銀五百兩之外每年再加賞銀七百兩共銀一千二百兩卽由會計司莊頭園頭每年應交銀七萬八千餘兩之內如數賞給將撥給莊頭之處擬請停止俾此後會計司莊頭園頭不致短絀而賞項亦有限制如蒙恩准嗣後固倫公主下嫁外藩在京居住者均照此次辦理等因一摺奉旨依議欽此

欽定總管內務府現行則例

會計司卷二

餵養馬匹交納草豆

初交莊餵養御馬每匹每日餵豆二升五合九勺草十六七斤不等駑馬每匹每日餵豆二升五合八勺草十一斤每年自九月十五日入莊餵養至次年四月初一日出青合算日期於頭二三四等莊頭內抵除其上駟院慶豐司等處所屬騾馬厰牛羊圈每年自九月初一日起至次年八月三十日按該司院咨文口分數目通計日期將莊頭等額納草豆及銀兩莊頭額納草束併營造司所屬炭軍等額納草束分派各處如不敷用呈明咨行戶部領取該司院逐月將口分細數移付會計司覈算

康熙十八年九月奉旨派交各厰黑豆著將黑豆倉米各給一半

雍正元年二月奏准減御馬一羣駑馬五羣共減草二十九萬四千束豆三千二十四石令莊頭等交送各圈

是年七月奏准御馬口分照駑馬例每日每匹餵草十一斤每年共減草三十六萬七千一百四十二束亦令莊頭等交送各圈

是年八月奏准先經奏減馬羣並餵養口分減得草束共六十六萬一千一百四十二束令莊頭等減半每年額交各圈草三十三萬五百七十一束又每年自九

月十五日起扣至次年三月三十日合算日期將所需草豆數目並奏准裁減馬羣口分
案內節省交圈草豆數目通計於莊頭內酌量遠近按等第分派其居處窳遠難於餵養
之莊頭令將派定草豆交送各圈其便於餵養之莊頭令其按派定日期餵養 六年三
月奏准餵養騫馬小馬駱駝騾匹停其給發倉米照依倉米數目折給黑豆其御馬內養
對子馬俱係肥馬將所餵倉米減去一半照依減去數目折黑豆餵養 十一年十一月
奏准各廐所需草豆除各莊交納草豆外其不敷應用草束停其向戶部領取令該處各
派值年官一員同該廐員役確訪時價辦買應用除實價外每千斤額給苫蓋銀四錢其
不敷應用黑豆仍咨行戶部將山東河南運到黑豆內撥給一萬五千七百餘石補派各
廐應用 十二年二月呈准戶部額給山東河南料豆外如仍不敷用令該處值年官員
確訪時價由廣儲司領銀辦買應用 乾隆十七年十一月奏准上駟院額設十一羣馬
匹每年俱係自九月十五日起分撥各莊餵養但莊頭等俱在各州縣村莊散落居住其
路途遠近不一且途次並無另行預備接續餵養草豆難得臆分徒費草豆於應用之處
不甚得力毋庸派餵將此項羣馬悉行裁汰 是月奏准莊頭等餵養上駟院羣馬既經

裁汰所有每年分派餵養羣馬莊頭嗣後令其照依交納京城既圈草豆莊頭之例將每年應交各圈草豆數目一體均勻分派交納 十八年十一月奏准莊頭等應交各既豆草定於每年自九月起至十二月乘其秋收物阜之時令其交納六成所餘四成限於次年正月起至五月麥秋時全行交納儻有不能全完者即照上駟院所奏將該莊頭參革治罪併將該司官員照承催不力之條察議所欠豆石向部領用草束由粗糧銀兩內動用買補所遺莊頭之缺有情願完納欠項者准其頂替 三十四年十二月奏准上駟院慶豐司各圈應需黑豆概由戶部支領應需穀草照時價由廣儲司銀庫支領於秋成後按時價採買應用莊頭及炸軍炭軍等應交豆草俱折銀交納廣儲司銀庫還項 三十五年六月據上駟院咨嗣後餵養小馬應照餵養駑馬口分例每馬每日減料豆一升添餵麩子四升 是年十一月據上駟院咨嗣後京城上乘御馬駑馬圈應行購買草束十成之內俱酌減二成南苑六圈應行購買草束十成之內酌減一成半存住圈小馬圈二騾圈內上乘御馬小馬驢騾俱不放青所餵青草既多仍照上年應行購買草束之內減買三成所餘銀兩以備購買青草雜項應用 嘉慶十五年七月呈准每逢皇上駐蹕熱

河所有御馬等圈添餵馬匹均經上駟院咨報會計司以及熱河總管衙門惟派撥喀拉河屯圈餵養馬匹向不咨報年終覈銷礙難查覈應請嗣後凡有派撥喀拉河屯圈餵養馬匹亦令遵照御馬等圈之例一體咨報會計司並轉咨熱河總管衙門添給口分如無咨報年終概不准開銷 十六年閏三月奉旨所有御馬內賞過名號者著加恩增半口分欽此隨遵卽於加增一半口分之內黑豆改換豇豆

咨領羊草

初上駟院慶豐司所用羊草覈算需用數目咨行戶部按每束領銀六釐五毫一絲令各該圈採買應用 雍正十二年六月奉宸苑奏准各圈需用羊草停其採買著將各該處將所用數目咨行南苑領取應用其運價堆垛每束給銀三釐仍向戶部支領 乾隆十六年九月奉宸苑奏准查上駟院散給各處進馬人役並慶豐司餵養羊隻每年所需羊草約計不過七萬餘束每束價銀三釐五毫一絲並腳價苫蓋銀三釐統計無多此草既向南苑領取其草價銀兩並拉運苫蓋之費請無庸向戶部領取交該處嗣後卽向廣儲司由南苑所交羊草銀兩內照數支領應用 嘉慶十七年七月奏准豐臺六羊圈請移

入南苑建蓋房間查豐臺六羊圈羊隻每年自九月十六日至次年三月十四日入圈餵養約用羊草七萬餘束向由南苑運至豐臺每羊草一束例用腳價銀三釐共約銀二百餘兩將羊圈移入南苑每年拉運羊草腳價即按例減半發給是月呈明南苑羊圈即照依減半支領車腳銀一百八兩牛圈應領銀三十六兩一併咨行廣儲司如數給與

黃豆煤炭

凡派給各厩黑豆每一倉石四斗四升倉米每二倉石一斗六升俱額隨煤四十五斤炭四斤八兩將半分莊頭等額納秫稽每捆抵煤七斤八兩炭十二斤分派各圈外其不敷煤炭呈明咨行工部領取

交納各厩燈油

上駟院馬圈十六處騾子圈三處共十八處每處每日給燈油一斤慶豐司所屬內三牛圈每年每圈額給油一百二十斤南苑三牛圈每年每圈額給油六十斤做乳餅牛圈每年額給油五十斤合算日期油斤按口內莊頭等第分派交納 乾隆三十四年十二月

奏准嗣後上駟院慶豐司各圈所需燈油照時價由廣儲司銀庫支領於秋成後按時價

採買應用莊頭應交燈油照各圈隨時採買實價數目徵交廣儲司銀庫還款

採買預備草豆

凡遇巡幸所有上駟院隨往馬匹慶豐司隨往牛隻內管領隨往騾匹所需草豆俱按口分日期均派附近居住莊頭等沿途交納此項料豆准於額糧內抵除其草束不准抵除
乾隆六年十一月呈准沿途需用過莊頭等草束准其照餵養羣馬餘剩草束折價銀兩例抵除錢糧

交納雜項物件

凡關內糧莊無論等第每名每年額交廣儲司紅花八兩內管領掃帚二十八把笞帚三十把瓢十九塊芥菜子一斗蓼芽子一升再鷹鷄房所需飄翎花爆作所用麻稽造佛處所用麥麩廣儲司所用麥稽據各該處來文數日均派口內各莊頭輪班交納其營造司等處所用稻草亦據來文數日均派稻糧莊頭交納
乾隆五年四月呈准各處如用稻草麥麩麥稽麻稽等項均令各處呈明數目領取歲底仍令各該處將領用過數目造冊呈堂
六年十一月呈准嗣後凡遇巡幸沿途莊頭等所交膳房雞蛋均照雜糧額內

雞蛋折價銀兩數目每個作銀一分仍於雜糧折價銀兩內抵除

折交秬稽銀兩

凡關內莊頭不論等第每年每名額納秬稽二百二十三捆交納內管領所屬秬稽廠
雍正七年十一月奏准將秬稽廠裁汰莊頭等額納秬稽每分折銀六兩八錢八分催徵
交送營造司買辦應用其收納銀兩數目及買用秬稽數目年底由營造司奏銷
十三年六月奏准各處所用秬稽有應換給木柴者換給營造司木柴其不應換給者動用官
房租庫銀兩買辦應用莊頭等交納秬稽折價銀兩由會計司催徵交送廣儲司年底會
計司奏銷

奏銷關內納糧事宜

雍正七年十二月奏准山海關內各莊頭每年所報新糧數目自八月初一日起至次年
七月三十日所納糧數及餘存糧數於本年十二月內具題又每年正月初一日至十二
月三十日掌關防內管領處收用及餘存雜糧數目於次年八月內具題又每年派給各
廐草豆羊草煤炭等項數目自九月初一日起至次年八月三十日將實用及餘存數目

查覈於次年四月內具題又各莊頭每年所納祭祀豬口併四季敬神金銀緞匹等項易價採買備用之豬口自八月初一日起至次年七月三十日將實用及餘存數目覈算於本年十二月內具題

承催官員賞罰

雍正九年三月奏准各處一應應徵錢糧分作十分催徵拖欠不至一分者無庸議外其欠一分以上者承催之催總鞭責二十領催鞭責三十官員罰俸三個月欠二分以上者催總鞭責三十領催鞭責四十官員罰俸六個月欠三分以上者催總鞭責四十領催鞭責六十官員罰俸九個月欠四分以上者催總鞭責六十領催鞭責八十官員罰俸一年欠五分以上者催總鞭責八十降爲領催領催鞭責一百斥革官員降一級欠六分以上者催總鞭責一百斥革領催枷號一個月鞭責一百斥革官員降一級罰俸一年停其陞轉帶罪督催所有未完錢糧歸入次年銷算催追完報如將一年錢糧催徵全完者官員紀錄一次催總領催於應陞之處記名三年全完者官員加一級催總領催等於應陞之處列名陞轉十三年正月奏准嗣後一年錢糧承催全完之官員照例紀錄一次外其一

連三年全完者承催官員停其加級亦准紀錄一次至六年全完之官員准加一級乾隆五年十一月奏准承催莊頭等應交各圈草豆並內管領等所屬各項雜差之官員於逐項徵收完納概行題銷後給限四十日按各項差務成數統計合算如有拖欠者分作十分該承催官員等照徵催倉糧例定議賞罰八年十二月呈准嗣後各該處承催莊頭園頭等應交錢糧無論新陳錢糧俱入於應徵數內催追至銷算時將新陳錢糧一併分爲十成銷算如數催完者照例議叙拖欠者按成議處三十一年四月呈准查熱河所屬莊頭等一切應交差務俱由該總管等承辦承催遇有承催錢糧不力應行鞭責之催長栢唐阿若咨送會計司辦理則該處承催人員無以觸目警心嗣後熱河如有應行鞭責之催長栢唐阿卽交該總管照例鞭責並移會錦州副都統照此一體辦理

關內糧莊納糧賞罰

乾隆三十一年四月呈准查口外熱河等處拖欠錢糧應行治罪之莊頭等若咨送會計司辦理該處一切衆莊頭等不能觸目警心無以示儆且革退莊頭等赴京領罪不惟由會計司咨行慎刑司再由慎刑司轉送刑部治罪領枷守候需時如屆熱審之期又須照

例釋枷交付該處領回俟秋後復行咨送赴京仍由會計司轉咨送部補枷辦理未能允協請嗣後口外熱河等處如有革退莊頭應行治罪之處行令該總管移文兵備道衙門遵照原奏按拖欠成數枷號至枷號期滿仍移送該總管照例鞭責俟枷號鞭責完結仍覆知會計司結案並移會錦州副都統一體辦理

比查壯丁

凡比查壯丁三年一次奏派本司官一員前往各莊查比將新增戶口註入其逃亡者亦註冊過七十歲者開除查比完日造具清冊呈明仍交會計司存案 雍正十年十二月奏准口外比丁俱其派員交熱河總管三年一次派熱河值年官員查比亦造冊咨送會計司存案 乾隆四十三年三月據慎刑司咨懷來縣廣慈寺廟內納糧半分莊頭二名與會計司莊頭事同一體伊等承領地畝並非廟內私產遇有莊頭遺缺更名等事自應照定例辦理今將廣慈寺納糧半分莊頭二名交會計司照依莊頭之例一體辦理經管嗣後凡遇比丁之年所有該莊頭等名下壯丁男婦人口照例歸入丁冊 五十一年十月奏准嗣後會計司官員查比會計司所屬丁口 六十年十一月呈准嗣後革退莊頭

遺缺無人頂替者如該本族有現充莊頭之人即將該革退莊頭親壯人丁撥給該本族莊頭名下作爲親丁壯丁如本族中無充當莊頭之人即將該革退莊頭子孫一併交比丁官另造孤戶壯丁檔冊以備查比 嘉慶二年十二月呈准嗣後會計司所屬莊頭園頭親丁自二三歲至十歲者即准其入檔如年逾十歲概不准濫入檔冊

查勘旱澇

乾隆十一年三月奏准嗣後莊園人等偶遇旱澇偏災停其除派司員查驗即令該莊園人等將被災地畝坐落頃畝數目一面呈報內務府存案一面呈報地方官即行詳報附近大員委派鄰境州縣及時監同履畝查勘如果被災情實按其被災分數詳報該督由該督取具該地方官及鄰境委員並無隱漏捏報印甘冊結陸續咨送內務府到日與莊園人等原報數目查對相符所有應免差務應給口糧即行照例辦理統俟該督咨送到齊之日彙總具題儻莊園人等希圖僥倖所報地畝與原冊不符按其捏報數日照例分別治罪如地方官將實在被災地畝隱諱不報或徇庇莊園人等以少報多附近大員即行揭報該督指名題參 嘉慶四年四月奏准照乾隆四十七年以前之例如有歉收一

分卽免一成錢糧其賞給口糧之處仍請停止 十四年十二月奏准嗣後偶遇水旱偏災該莊頭園頭以及豆糧莊頭入等即隨時報明地方官申詳戶部務於十月開徵錢糧以前咨送到內務府入於本年年終題銷本內照例減免如具題後補行造報者概不准其減免

補放莊頭

凡口內口外莊頭缺出於該莊頭子弟內揀選呈明承替如該莊頭子弟無可承替者准於殷實壯丁內揀選呈明補放 雍正十年十二月奏准口外莊頭如有補放革退等故由熱河總管辦理仍呈報內務府 乾隆四年四月奏准莊頭內如有緣事拖欠錢糧革退之缺伊族人內有情愿代完所欠錢糧者方准其承替如族人不能代完卽於別莊壯丁內挑取補放舊欠俱准豁免 五年三月奏准拖欠差務革追之莊頭遺缺伊族人內情愿代交全完欠項者准其頂補若無代完欠項者於別莊親丁內揀選家道殷實者補放若別莊親丁內無可補放者於各莊保送勤農務人樸實之壯丁內補放將拖欠差務豁免 是年四月呈准更名補放莊頭各給鈐印執照一張 十四年十一月奏准查向

例如有拖欠差務或違悞餒馬革退莊頭之缺先行稟諭該莊頭族人如有愿完欠項者准其更替伊族人內若無完納欠項者復稟傳四路莊頭子弟有情愿代完欠項者亦准補放至四路莊頭子弟內亦無代完欠項者由掣放莊頭筒內掣補將欠項豁免如革退莊頭族人及四路莊頭子弟內有二三人至數人具呈愿完欠項項替莊頭者向無定議及稟傳之後亦無定限請嗣後如遇革退莊頭缺出有二三人至十數人具呈者若係本族人丁會計司查勘丁檔分別遠近長幼補放若係四路莊頭子弟會計司監看伊等掣籤補放至傳喚之後凡革退莊頭族人及四路莊頭子弟無論路途遠近各定限一個月如於限內赴司具呈者准其入名掣籤補放其逾限到司具呈者概不准頂替 十七年十二月呈准嗣後凡遇大糧錢糧莊頭缺出會計司與管理三旗銀兩莊頭處各按本處莊頭丁檔論其支派之遠近補放不准越格妄行呈控爭替 二十七年十二月呈准嗣後凡頂補病故及年老告退莊頭等遺缺仍領原圈按原等第充當無庸議外如拖欠錢糧革退遺缺本族人丁內有情愿代完欠項承領原圈地畝按原等第當差者准其頂補儻非隨來圈佔地畝陞長等第遺缺本族人丁等內有情愿代完欠項退地減等當差者

亦准其頂補退地減等當差 三十年二月奏准嗣後投充錢糧莊頭等拖欠錢糧革退遺缺不准伊等子孫頂替有族中弟兄叔姪及別姓投充莊頭等弟男子姪內情愿承當者完納陳欠後方准頂替 四十三年五月呈准嗣後莊頭園頭等有子孫承替祖父遺缺者仍照舊例辦理外其異姓頂補之缺務擇其年歲富強可以承應差務之人方准其頂補如年尙幼穉不能承當差務此等幼孩概不准頂補 五十五年六月呈准嗣後遇有革退莊頭遺缺請給限兩個月曉諭本族親丁等赴司具呈代完欠項頂替如逾兩個月限期不到者不論遠近支派雖有代完錢糧概不准其頂替即將遺缺照例票傳四路附近居住另姓莊頭親丁等亦請定限兩月令其代完欠項充當如遇傳諭四路另姓莊頭時卽在官圈地畝之附近居住莊頭名下親丁內傳令赴司具呈准其代完欠項入筒籤掣 嘉慶六年十二月呈准向來莊頭園頭等一經革退隨傳該親丁等有無情愿頂替者俱令親身赴司具呈至曉諭本族人丁頂補定限兩月恐有未周請嗣後曉諭本族頂替莊頭給限三個月如過期無人充當即票諭另姓頂替亦給限三個月如過限之後卽將地畝照例退交地方官徵租解部 二十一年九月呈准定例莊頭園頭遇有拖欠

錢糧革退者親丁內給限三個月有能代完欠項者限內具呈准其頂替如無力代完欠項亦於限內具結限外雖有錢糧不准充當曉諭另姓莊頭園頭名下親丁亦給限三個月有能代完欠項者限內具呈准其頂替如限滿無人即將地畝退交地方官徵租解部近年以來革退莊頭園頭缺出出票曉諭後該本族親丁等有無代完欠項均不能按限具結另姓親丁內因本族親丁無結不敢代完呈替額缺久懸錢糧拖欠請嗣後遇有莊園頭革退即行出票派委本路領催協同該屯領催令其即行曉諭本族親丁等有無代完欠項者按原定三個月限外再加寬限一個月本路領催屯領催加結帶領該親丁赴司具呈照例辦理如四個月限滿無結即照例出票曉諭另姓外將本路領催及屯領催料理其另姓莊頭園頭等名下親丁有無代完欠項亦照例辦理 道光元年九月本司呈准嗣後莊頭園頭一經革退即照例出票曉諭該本族親丁給限四個月近支有能代完欠項赴司具呈完欠者即准其頂替如有遠支親丁於限內遵例赴司具呈完欠頂替者令其出具限內如有近支赴司完欠接充之人伊情愿將所交欠項銀兩領回仍讓近支充當甘結至限滿之日近支無人具呈完欠即准已完欠項之遠支接充無庸取具近

支親丁無力完欠不愿接充甘結以杜有意勒措事後爭控之端 十一月本司呈准凡莊頭園頭有子孫承替祖父遺缺者仍照舊例辦理其異姓頂替莊頭園頭遺缺向例既未載有年歲無所遵循嗣後如遇異姓應接充莊園之缺照例票諭另姓親丁總以年至十六歲者准其代完欠項頂替如未至十六歲者概不准其充當 四年七月本司呈准莊頭退交官徵地畝酌擬曉諭孤戶親丁照完欠項准令一體接充查定例莊頭遇有拖欠錢糧革退遺缺先行曉諭該本族親丁接充如限滿無人即照例曉諭另姓親丁接充如限滿無人即將地畝退交地方官徵租解部惟此項地畝一經退入官徵則莊頭遺缺即歸爲無有年復一年久後則退交之地畝日多額設之莊頭日少於錢糧差務均有關係茲查有孤戶親丁一項本係莊頭等之親丁因原莊頭革退本族別無充當莊頭之人無可依附是以另立丁冊別以孤戶之名查此項人等並非本身獲罪與革退莊頭之親丁子孫永遠不准充當者可比乃一經歸入孤戶遂致日久有力愿充莊頭而亦無可得之缺似屬向隅嗣後莊頭遺缺如七個月限滿無人接充即票諭各孤戶親丁無論本族另姓統行給限三個月如有情愿代完欠項者即准其照例接充如限滿接充無人再將

地畝退交地方官徵租解部查園頭事同一體亦准其照此例辦理 二十五年二月本府呈准嗣後革退莊頭園頭遺缺例限已滿無人接充之地畝再行給限三個月曉諭附近量地減差之莊園頭等如有人地相宜情愿承領補足原額者即行呈明撥補足額或有多餘之地畝按照地畝覈計加交差銀以符原額至充當滿差之二三四等及半分莊頭等如有情愿承領無人接充之地畝自應准其一體承領如限內並無人地相宜情愿承領者仍將地畝咨行戶部退交地方官徵租解部 三十年十二月本府奏准嗣後莊頭園頭如有拖欠錢糧革退後親丁另姓孤戶等三限均無人接充將地畝派令現充莊頭園頭就近認領計畝交差如現充莊頭園頭籍隸退交地畝寫遠不愿認領者即責成地方官按照莊頭園頭在內務府每畝交納租銀一錢八九分之數按年以六月交納三成十月限內交納七成由會計司派委員役前往各州縣牌取

補換地畝

乾隆二十年三月奏准嗣後莊頭官圈地畝內如有實在薄鹼沙窪不堪耕種者准該莊頭據實呈報派員會同地方官秉公查明出具印甘冊結即於附近州縣所存入官地畝

內揀選撥換如無可撥換之地即交該地方官招種徵租解部外仍照例量其現有地畝計成令其當差如有捏報不實者即將莊頭革退同妻子一併撥發關外充當壯丁 三十五年十二月奉旨向來內務府所屬莊頭每有因地畝薄鹹沙壓呈請退交另換者此等地畝莊頭等久經撥定當差伊等承充有年沾被恩惠不少設或地有肥磽年有豐歉即加功墾闢亦分所當然乃因有退交之例動輒藉口瘠淤紛紛呈請殊屬非理且伊等恃有此例或與佃戶等交好即退出交官藉減租數或覬覦上產而以所授之田捏報求換貪得無厭而滋生事端種種情弊皆所不免嗣後各莊頭所種地畝概不准其退交其中果有悞差不能承當莊頭者即著內務府大臣查勘確實另與能承種者承當莊頭欽此 三十九年五月奏准嗣後凡有水沾成河之地由地方官勘實具結內務府行文戶部註冊其缺額之地不准另行補給即就現在地畝計成交差再凡革退莊頭除有情願帶完欠項領地承充外其無人領種之地即交戶部歸入存退餘絕地畝項下查明原租酌中徵收辦理 嘉慶七年戶部奏准八旗官兵人等有兌換官地作爲墳塋者以自置地三畝換官地一畝仍覈明本身地租與官地租息有無盈絀准其兌換

壯丁爲民

乾隆四十四年二月奏請准戶部轉咨綏遠城將軍咨稱助馬口外革退莊頭等四名家屬一百四十餘口交與該處莊頭等名下充當壯丁現生齒日繁無力養贍照例懇請放出爲民等因奉旨此等莊頭旣因拖欠錢糧革退本係獲罪之人轉因接辦之莊頭以人多不能養贍請將伊等之兄弟子孫放出爲民令其自謀生計內務府大臣雖係照例議准日久不能保無流弊莊頭等欲圖出旗自便故意拖欠錢糧罪止革退而其子孫轉得爲民仍可倚以自贍日後並可考試俸登仕籍皆情理所必有不可不防其漸嗣後凡獲罪革退之莊頭其家屬有呈請爲民者除踈遠族戶准仍照舊例辦理外其本身及子孫俱應發往打牲烏拉充當苦差以示懲儆此案即照此例行欽此

派撥各處當差莊頭

乾隆十一年正月奏准自康熙二十三年建設暢春園以來所有園內並西廠二處應種稻田一頃六畝每年俱由頭等莊頭內輪流除派一名撥給石景山等處地十一頃三十畝四分每年得租銀三百八十餘兩內除納錢糧銀二百兩外餘剩銀一百八十餘兩

養贍壯丁顧覓人夫耕種稻田需用此外每年仍交稻米一百三十四石此項租銀除應交錢糧外餘剩銀兩不敷供應耕種稻田一切費用且莊頭等散居四外州縣各有耕種本身分例地畝及餵養馬匹等差不能兼顧請照撥派菜畦園頭一名給地十八頃房一所之例添設暢春園稻田莊頭一名於附近州縣所有官地內撥給六頃六十五畝六分並舊有地十一頃三十四畝四分共爲十八頃之額仍給官房一所此項莊頭卽於莊頭子弟內揀選安放每年應交錢糧銀二百兩稻米一百三十四石照例交納暢春園如安放莊頭之後應交錢糧儻有拖欠卽照莊頭拖欠錢糧按成數治罪之例料理 十八年六月呈准補放四等莊頭一名承領量租編圈地二十一頃六十六畝六分七釐兼帶草房四間撥給靜明園充當稻田莊頭地不徵糧所辦差務不隸本司 十九年閏四月奉宸苑奏准將瀛臺永安寺闡福寺所有空閒之地開種油菜於會計司所屬四等莊頭內撥派一名作爲專設播種油菜莊頭隨經掣派大興縣采育居住四等莊頭一名隨帶原圈地畝撥給奉宸苑充當播種油菜莊頭地不徵糧所辦差務不隸本司 四十二年七月圓明園奏准熙春園綺春園共有耕種地二頃八十餘畝請照靜明園之例交內務府撥派四等莊頭一名前來令其

專司承種此項地畝每年所得糧石除留籽種其餘糧石柴草照例交納大倉等處收用
隨經派得寶坻縣四等莊頭一名撥往圓明園接辦耕種地畝當差

地不徵糧所辦
差務不隸本司

口外莊頭應交雜糧銀兩

乾隆十四年十二月熱河總管具奏古北口喜峰口外莊頭共一百三十六名每人承種
官圈額地三十九頃一年應交額糧折米一百八石四斗四升倉差雜糧折銀四十一兩
二錢八分又各莊頭等承種兵丁納糧地九百頃應納糧折米三千石一年統計應交米
一萬七千七百餘石係徵交熱河喀喇河屯化育溝三處倉內支放本處駐防官兵俸餉
之需其應交雜糧折銀五千六百十四兩八分每年徵收派員送京交廣儲司銀庫查口
外自巴克什營至張三營等處看守行宮食俸千總十六員委署千總二十六員兵六百
十一名千總每年各食俸銀六十兩一年共應領俸銀九百六十兩委署千總每月各食
錢糧銀一兩兵丁每月各食錢糧銀五錢一年應領錢糧銀三千九百七十餘兩又熱河
總管首領太監等每年應領錢糧銀五百餘兩千總委署千總兵丁太監等統計一年共
應赴京支領錢糧俸餉銀五千四百餘兩千總俸銀係二八月差人赴京由本佐領管領

下支領兵丁錢糧每年歲底除派人員赴京具呈內務府轉咨戶部支領又咨兵部除派官兵沿途護送至熱河庫內收存按月支放其車腳盤費由本兵錢糧扣除至折交雜糧銀兩送交廣儲司銀庫其車腳盤費由莊頭攢湊供用支領錢糧解送糧銀徒糜車腳盤費等因隨經內務府奏准將口外莊頭等每年應交雜糧銀五千六百十四兩八分停其解送京城截留熱河庫內以備支放千總兵丁太監等俸餉公費應用所有餘剩銀兩令其仍交廣儲司銀庫如遇添餵馬匹等項差務銀兩不敷應用令該總管造具細冊聲明向廣儲司補領並交該總管嗣後每年自正月起將熱河千總兵丁太監等所食俸餉公費銀兩數目並伊等旗分佐領管領花名分晰造具細冊呈報內務府交廣儲司詳細查覈按冊如數咨行戶部領銀抵補熱河截留雜糧銀兩之項 二十二年十一月奏准避暑山莊普寧寺辦買佛前供獻並啐經所用什物等項月例用銀十七兩年例用銀三十六兩每年共用銀二百四十兩於該處莊頭所交納粗糧銀兩內支給應用 三十七年五月奏准熱河佈達拉廟添設喇嘛三百名內除喇嘛一百名應得米石由京城扎薩克喇嘛掌印處辦理得給外其餘每月各食二斗米之喇嘛二百名再鄂勒忒喇嘛楚魯穆

達林之徒弟三名每年四季共應領米四百八十七石二斗即歸入採買官員兵丁等米石數目一併咨行戶部轉飭地方官採買入倉以備陸續支放將用過確數咨報戶部覈銷

口外莊頭餘地納糧事宜

乾隆十五年正月熱河總管具奏口外莊頭等八十一人報出開墾餘地二百一十一頃六十六畝仍交各該莊頭照舊承種照莊頭承種報出餘地之例每晌徵糧四斗每糧二斗折米一斗合計共應納糧一千四百一十一石六斗零折米七百五石五斗三升零自本年起陞科徵收存收熱河等倉放給官兵食用令熱河同知於應行採買米石內照數減買隨經內務府奏准此項莊頭等報出之地未經查丈請交該總管會同熱河兵備道率領地方官詳細查丈如再有盈餘照例添交米石將地畝四至頃畝數目並每年應交米石數目分晰造具印冊呈報內務府以備查覈其未經呈報開墾餘地之莊頭五十五人亦會同兵備道率領地方官詳細查丈儻官圈額外有開墾餘地即行文明照例交納米石是年十月熱河總管具奏口外莊頭共一百三十六名會同兵備道傳齊各莊頭令其

各將所有餘地據實盡行首報此內除莊頭于廷相未報餘地外前報餘地莊頭八十一人今又續報餘地五百六十頃又莊頭五十四人報出餘地四百十八頃共地九百餘頃連前所報二百餘頃共報出餘地一千一百餘頃即於本年陞科納糧等因隨經內務府奏准應將所報餘地均於本年起令其徵糧如嗣後再有續報及查出餘地亦照此例一體辦理

補放瓜菜園頭

乾隆三十年十二月呈准凡病故園頭等遺缺俱更名與伊長子長孫如無子嗣按其近支更名與伊族中子姪從前瓜菜園頭等更名俱由掌關防管理內管領事務處將應行更名與何人之處擬定呈明交與會計司查對丁檔如與丁檔更名之例俱屬相符卽由會計司復行呈明准其更名儻與丁檔更名之例不符會計司仍駁查該處照例定擬俟覆送到日再行查對辦理往返駁查不無稽延請嗣後瓜菜園頭等缺出該庫呈報掌關防管理內管領事務處轉行移送會計司由會計司查對丁檔傳喚伊等子孫取具甘結照例定擬呈明辦理 道光二年六月本府奏准會計司所屬瓜菜園頭一項原分定哇

地園頭二十五名旱地園頭三十五名共六十名如遇分封王府撥給一名即補放一名以符原數自乾隆四年以後因拖欠錢糧陸續革退畦地園頭七名旱地園頭二十名此項地畝歷年久遠有被水冲沙壓地俱薄鹹衆園頭親丁皆不敢認充曾經交地方官開除至今缺額無人接替現據該園頭等呈稱伊等名下親丁生齒日繁除領地當差外別無生計懇請將虧額園頭二十七缺照分撥王府之例撥給地畝接充等因呈請前來且查該園頭等情願將伊親丁內補足二十七名接充之處覈與例載原設園頭六十名數目相符其園頭所交錢糧較之各州縣議徵租數尙屬有盈無絀當經移咨戶部查明有無堪撥地畝嗣准戶部咨覆現查另案項下未經入奏地畝堪以撥補應照例傳諭衆瓜菜園頭名下親丁等有願領地充當者具呈籤掣畦地園頭七名旱地園頭二十名移咨戶部飭交直隸總督於附近各州縣現在另案入官未經入奏地畝項下按畦地園頭七名每名照例撥給地四頃內畦地一頃八十畝如無畦地每畦地一畝折給旱地五畝旱地園頭二十名每名照例撥給堪種旱地十二頃令伊等承領當差以符定制

盛京糧莊納糧定額 以下盛京

盛京糧莊每莊原納糧一百二十斤石 康熙五十五年六月奏准盛京糧莊按等第納糧每年頭等莊每名額納糧三百二十二倉石二等莊每名額納糧二百九十二倉石三等莊每名額納糧二百六十二倉石四等莊每名額納糧一百九十二倉石除四等莊不納豬口外頭等二等莊每名額納豬四口三等莊每名額納豬三口每豬一口折交糧十五倉石 現有大糧莊頭八十四名內頭等三十五名二等七名三等八名四等三十四名

徵收糧石

初盛京糧莊所報糧石除給與三旗人丁口糧等項外所餘之糧於該莊窖存 乾隆三年二月奏准盛京莊頭窖存糧石定爲三萬石每年將用剩新糧易出陳糧照時價糶賣所得銀兩交納盛京戶部 六年二月奏准盛京莊頭等窖存糧三萬石內撥出一萬石入於奉天府倉內存收備用其窖存糧二萬石每年仍將用剩新糧入倉易出陳糧照時價糶賣所得銀兩交納盛京戶部其倉存糧一萬石每年將各莊交到辛者庫人等口糧入倉易出陳糧放給 二十四年七月盛京內務府總管具奏承領官地納糧莊頭八十

四名每年所交糧二萬四千八百餘石內除散給西陵併內務府三旗食辛者庫人等口糧餵養三旗羣馬黑豆及油紅黏穀等項抵折糧共一萬六千餘石外其餘糧七千餘石舊例作爲三分一分入於宮殿後倉內存收兩分於各莊頭住處掘窖埋存歷年積儲額定倉內存糧一萬石窖內存糧二萬石備用外如再有餘剩始按時價減糶其窖存糧石如至霉爛著落莊頭賠補惟自十五年以來因有用項倉窖所存糧石均未足額其倉儲糧石每年尙進新出陳搭放口糧應用至於窖存糧石並無進新出陳之項年久難免雨濕霉爛等因隨經內務府奏准請將現在所有糧二萬石內一萬石入倉一萬石存窖嗣後每年八十四莊應交糧二萬四千餘石除入倉窖易陳作爲各項口糧費用外其餘糧石仍令照舊例按時價糶賣所賣銀兩令其交納盛京戶部 又該總管具奏莊頭共領種官地十二萬餘晌交納官項錢糧如旗人自置地畝在盛京六十里界內者每晌徵草一束豆一升交納盛京戶部內倉遠處地畝每晌徵米二升六合五勺五抄交納各城旗倉秋成之後官項與旗倉一時併徵莊頭兩處交納錢糧不無逾限之弊請將伊等每年應交盛京戶部與旗倉豆草米石改照西錦州莊頭之例折銀徵交等因隨經內務府奏

准嗣後該處莊頭應交旗倉米石照錦州莊頭之例每糧一石折銀二錢合計每米一石折銀四錢草一束照每年賣價折銀三釐其豆亦作糧折銀徵交盛京戶部

人丁口糧

盛京三旗各管領下人丁及福陵昭陵管領下人丁十歲以上者爲一口五歲以上者爲

半口每口每月給糧一斤斗每半口每月給糧半斤斗

每斤斗合倉斗三斗六升

於莊頭所報額糧內

支給如有逃亡按日扣除據該佐領呈報冊檔覈算題銷 嘉慶元年九月盛京將軍奏

准嗣後盛京食辛者庫人等遇有閏月之年及每年不足口糧卽照例每粗糧一石折銀

三錢合計口數賞給

糧莊交納鷺鴨

盛京莊頭每年共交鷺三十隻外無論等第每名額交鴨一隻 雍正三年正月奏准莊

頭等無論等第每名每年交鷺一隻

奏銷糧石

雍正七年十二月奏准盛京糧莊每年所報新糧並舊窖陳糧及用過餘剩糧石數目據

該佐領咨文到日限一月查覈具題

編查莊頭等第

乾隆十一年九月奏准前於乾隆八年曾經奏准嗣後口內莊頭停其十年一次編查酌陞等第今盛京所有莊頭共八十四名此內陸續陞等者已及五十名伊等所當差務與口內莊頭原屬一體並無差異自應一體辦理嗣後盛京莊頭亦照口內莊頭之例停其編查等第

比查壯丁

初盛京寧古塔黑龍江等處壯丁係該將軍會同該管官查比 雍正四年七月奏准盛京等處壯丁停派司官內管領往查仍令該將軍等三年一次比查造冊咨送內務府

查勘旱澇

盛京莊頭地畝如遇旱澇據掌關防佐領呈報被災輕重分別奏請按被災分數免差

補放莊頭

凡盛京莊頭缺出該佐領於該莊頭子弟內揀選呈報內務府承替如該莊頭子弟內無

可承替者准於家道殷實壯丁內揀選呈報內務府補放 道光十七年十一月戶部議准錦州莊頭應交盛京戶部餘租銀兩如延至造報考成之時尙未全完勒限一年嚴行比追限滿仍有尾欠即照拖欠官地差銀之例立予斥革所遺莊缺亦歸旁支近派代完欠項循例接充伊之子孫免其歸入壯丁用示區別

盛京餵養祭祀牛羊

乾隆三十年正月奏准盛京餵養三陵祭祀應用黑乳牛羊隻草束於盛京戶部徵收餵養二館牛羊項下草束動用照糶賣與官兵以平市價例令莊頭等交價所需豆草外其不敷豆二千五百餘石請照上駟院慶豐司每年所用餵養馬騾牛羊豆草定例除口內莊頭額交豆草外其不敷豆由戶部支領之例向盛京戶部等倉支領餵養將所需豆石卽咨行該部照例覈銷毋庸莊頭等照糶賣例交價於所報糧石項下開除其餵養牛犢小米照例於莊頭應報糧石項下銷除

安設關外管莊官員 以下關外

山海關外中後所原設筆帖式二員領催二名催徵關外莊頭糧石等事 康熙三十六

年七月奏准添設領催二名無品級催總一員

係領催額內

雍正元年八月兵部奏請除派

錦州值年管理糧莊事務奉旨著派副都統阿薩納以副都統職銜管理大凌河馬羣及

此項事務欽此 十三年十一月奏准停派內府郎中值年其關外一應事務俱交與錦

州副都統辦理 乾隆十六年閏五月錦州副都統具奏管理三城八路九邊及莊屯事

務殷繁如無協理之員實難辦理請派包衣佐領一員協理隨經內務府奏准應如所請

毋庸三年一次更換如該佐領遇有陞轉等故令該副都統於該處官員內無論外旗內

府揀選辦事勤敏者出具考語保題以資辦理 二十四年二月錦州副都統具奏協理

莊屯事務佐領等遇有各佐領下差務前往辦理每至數目不得常在錦州莊屯事務請

停止協辦佐領嗣後副都統如遇公出將管莊關防交錦州三品駐防協領守護如遇遠

出應行案件即交駐防協領照例辦理等因隨經內務府奏准應如所請至副都統每年

前往錦州義州二城考試兵丁步射騎射巡查道路關口等差既稱往返日期無多除將

管莊關防交該駐防協領守護外其應行事件令催總筆帖式等仍送赴該副都統閱過

以副都統職名咨行 三十六年五月錦州副都統具奏該處管理莊屯衙門食三十六

兩錢糧虛銜催長三員賞給九品頂戴令其食三十三兩俸祿再將筆帖式催長內人去
得能事者揀選一員做爲六品頂戴委署主事仍食原俸掌管一切事務等因隨經內務
府奏准令錦州副都統將應放委署主事人員揀選咨送內務府帶領引見補放 四十
一年五月錦州副都統具奏該處革退管理莊糧事務委署主事一缺現無得力之人請
由內務府或主事或委署主事揀選一員遣赴錦州辦理莊糧事務等因隨經內務府奏
准錦州所屬莊頭二百餘名每年應交差務折銀二萬餘兩錢糧緊要內務府各處設有
主事一員專辦一切檔案添設委署主事一員幫同辦事若揀選轉放懸缺該處檔案仍
係一人辦理查錦州委署主事一缺原係筆帖式催長內選放請由會計司管理三旗銀
兩莊頭處筆帖式內揀選二員擬定正陪帶領引見放爲六品頂戴委署主事仍食筆帖
式俸祿令其赴錦州隨同副都統辦理莊糧事務三年期滿如果差務謹慎該副都統據
實出給考語具奏送回內務府候補委署主事之缺其續出之缺該副都統處如有得力
人員仍照前例揀選送京帶領引見儻仍不得人出具緣由於內務府揀選帶領引見令
其前往

糧莊地畝定額

初山海關外糧莊地畝原無定額。雍正三年三月奏准將山海關外地畝每六畝編作一晌頭等莊頭每名額給地九百晌二等莊頭每名額給地八百五十晌三等莊頭每名額給地七百五十晌四等莊頭每名額給地六百五十晌新設莊頭每名額給地五百晌亦作爲四等莊頭其餘地畝暫交與該地方官招民承種按地徵糧。乾隆二十年十月呈准撥換地畝條例惟指口內莊頭而言口外莊頭並無定議伊等名下官地自三十餘頃至五十餘頃不等較之口內莊頭名下官地倍多所交差務又與關內莊頭懸殊該處附近州縣亦無官地可撥不便照關內撥換地畝之例一體查辦如實有水衝石蓋者雖有餘地撥補之例亦不准量地減差。現有糧莊二百一十一名內頭等六十六名二等四名三等二十名四等一百二十一名。二十三年二月奏准據錦州副都統奏請該處莊頭等名下丈出餘地二萬餘晌援照熱河莊頭等餘地每晌徵糧四斗之例加倍交糧八斗折銀交納內庫等因案查奏准丈出餘地租銀數目約計錦州莊頭等餘地二萬餘晌應交租銀六千餘兩若照每晌交糧四斗之例加倍交糧八斗每石折銀二錢計算只

交銀三千餘兩但查莊頭等餒馬當差以及養贍家口與旗民私地不同此次丈出餘地實係莊頭等積年私行開墾並不在原撥額地之內按每响應交租銀自四錢二分三錢六分至三錢不等合算每响計地六畝每畝只徵銀七分六分五分不等較之旗民私行收租數目減少尙多卽按例輸租與莊頭等餒馬當差並無虧損查盛京內務府所屬莊頭內亦有丈出餘地九千四百九十餘响現今照依旗民餘地一例交租其山海關外莊頭餘地事同一體應照原議旗民餘地章程畫一辦理至莊頭餘地租銀若交城守尉協領徵收轉解實多不便應請將山海關外錦州所屬莊頭盛京內務府所屬莊頭併盛京戶部所屬莊頭等餘地租銀統交與各該處經理徵收解交盛京戶部其承催督催考成自應照例辦理再莊頭等丈出餘地既不在原撥額地之內如有事故情願更替以及欠租無力承種等情准其呈報查明原報地畝數目全行撤出另行招種不得將膏腴砂磧地畝任意留退 五十六年四月奏准大凌河馬廠荒地現經查看得東西廠應墾荒地三十一萬八百餘畝查山海關外錦州莊頭向係額設二百七十餘名各交納本身錢糧並將牧廠官馬三十四羣輪流餵養又查分賞出府王公地畝向在二三四等莊頭內撥

給現在該處頭等及四等莊頭尙有一百八十餘名二等莊頭僅餘四名三等莊頭僅餘一十八名實屬不敷預備賞賚之用今既丈出地畝至三十一萬八百餘畝之多自應按放莊頭以備賞撥查莊頭缺出即由該處親丁內揀補上年內務府辦理口內莊頭案內奏請將地畝編圈應補莊頭該處按名保送由內務府公同籤掣此次安放莊頭應一律辦理請令錦州副都統會同奉天府府尹將丈出地畝分別肥瘠搭配編圈查明現在私開地畝應行治罪莊頭名下親丁不准安放外將安分親丁多爲保送開具名冊咨報由內務府衙門籤掣充補至此次安放莊頭原爲備賞出府王公地畝之用祇應分別二三等莊頭毋庸開列頭等又查舊設莊頭餵養馬羣既有新放莊頭均勻攤派差使較輕應請著令新舊各莊頭加納銀糧請令該副都統等詳悉查明該莊頭等酌加銀糧確數咨報再查該處紅冊地外文出多餘地一萬八千九百餘畝實屬私開隱漏應照從前奏請定以二年首報限期之例扣算無論私開年分久遠總以四十二年爲率扣至五十五年統計十三年花利約畧銀一萬六千九百餘兩勒限一年於該犯名下照數著追入官其丈多私開之地若照例將地畝全行撤出另行招佃多寡不一應仍令原業承種照例陞

科並將業戶花名及陞科錢糧細數分晰造冊送部存查等因續經奏准錦州副都統等咨開查丈得東西廠荒地三十一萬八百餘畝按地畝數目應設二等莊頭三十八名三等莊頭二十六名其二等莊頭每名應撥地五千一百畝三等莊頭每名應撥地四千五百畝但地土肥瘠不等兩廠須按六十四分分別肥瘠均勻搭配編圈於冊內編列字號以備籤掣除將私開地畝現應治罪莊頭名下親丁不送外隨將家道殷實安分莊頭名下親丁堪可充當莊頭者揀選九十名造具花名清冊先行咨呈內務府外再舊有大糧莊頭二百零四名今應放二三等莊頭六十四名共莊頭二百六十八名遵照原議在舊有莊頭餵養驢馬匹數內撥出一千五百一十五日均勻攤派新放莊頭名下一體餵養至新舊莊頭餵馬日期均有覈減俟新放莊頭開墾地畝二年限滿於陞科之日起新舊莊頭一體加增錢糧等因所有送到應挑放莊頭親丁九十名公同傳齊令其眼同當堂入筒籤掣得六十四名按照編定等第字號地畝冊檔填註花名仍令帶回錦州遵照辦理並將各莊頭等應領地畝出給印照一張交新掣得莊頭等具領帶回錦州前赴該衙門呈驗以憑按冊查對指交認領至該副都統等所呈新舊莊頭加增錢糧九兩二錢

五分九釐係按餒馬日期節省草束內覈計加增此項銀兩俟新放莊頭開墾地畝二年限滿於陞科之日起新舊莊頭一體加增

糧莊納糧定額

初山海關外糧莊每莊納糧一百二十斤石

每斤石合倉石三石六斗

康熙五十一年八月奏准將

莊頭編作頭等二等三等四等每年頭等莊每名額納糧三百二十二倉石二等莊每名額納糧二百九十二倉石三等莊每名額納糧二百六十二倉石四等莊每名額納糧一百九十二倉石每年每名不論等第各交雜糧二十九倉石一斗六升內蘇子二十四倉石三斗穀四倉石八斗六升俱准於額糧內抵除

徵收糧石

初山海關外糧莊所報糧石內除交倉雜糧並官用粗糧外餘剩糧石原於該莊窖存

康熙三十七年十二月奏准將關外窖存糧石並嗣後糧莊所報糧石除每莊存收一百石備用外其餘糧石交錦州等州縣積存 雍正七年十一月奏准山海關外糧莊等每

年每莊額交雜糧折銀四十一兩二錢八分該副都統催徵交納會計司轉交廣儲司

八年二月奏准關外糧莊等應交粗糧每石折銀二錢該副都統亦徵催交納會計司轉交廣儲司 乾隆二十四年正月錦州副都統具奏山海關外莊頭二百一十九名承領官地除每年應交正項錢糧餵養羣馬等項差務外每晌仍捐納地方旗倉米二升六合五勺五抄但伊等每人名下地畝坐落均不止一處其交納旗倉米石有在三四處四五處者即舊有地方倉廩離伊等所住村莊亦一二百里不等今又令其向盛京倉廩交納米石隔有三百餘里每晌所交米數無幾其運送待收盤費等項較之額米多至數倍且伊等交差俱有定限幾處錢糧一時並徵莊頭隻身分辨不及若圈禁追比轉致遺悞餒養羣馬及拖欠正項差務錢糧六成以上俱例應革退請將所屬莊頭等每年應交旗倉地米四千一百石零比視伊等應交餘剩粗糧每石作銀二錢之例加倍折銀於每年交納錢糧之時令其交納京城內庫查盛京莊頭交納旗倉米石係在本處現准折交銀兩錦州莊頭遠在三百里外其應交盛京旗倉地米自應一體辦理請令每石折銀四錢交納且錦寧廣義四倉額徵地米內除莊頭等應交之米改折銀兩外其每年旗人應交地米除支給該處俸米站草折米約用四五百石仍存餘米一萬五千餘石每年出三存七

賣給兵丁外尙有米一萬餘石存收四倉偶遇歉收年分足備借賑之用亦不致拮据等因續經內務府議駁具奏奉旨內務府議駁德祿奏請該處莊頭應交旗倉米石折銀交納一案辦理甚屬錯謬盛京莊頭應交米石在本處尙有准其折銀交納之例而錦州相隔三百餘里反不准其折銀交納情理俱爲倒置此案本年正月奉旨交議直延至九月底具奏即有移查何至延緩若是且摺內又不將原奏奉旨日期填寫似此漫不經心非尋常疎忽舛錯者可比所有會計司承辦之員著降爲二等調用係郎中著降爲主事係員外著降爲筆帖式其餘同司各員俱著罰俸二年內務府總管及堂郎中俱著罰俸一年餘依議欽此 二十五年十二月奏准錦州莊頭等地畝自雍正三年按等定額以後至雍正五年盛京十四城清丈地土之時將各莊頭名下原圈額地內復丈出地三萬四千二十六晌五畝九分仍留各莊頭名下幫補當差上年莊頭當差額地交納旗倉地米改折銀兩摺內並未載入此項地畝查此項地畝共應交米九百三石零亦係交納錦州寧遠廣寧義州瀋陽等五處旗倉之項應請將錦州莊頭等名下復有丈出餘地應交米九百三石零亦照額地米四千一百石零之例一併准其一體折銀交納內庫

餵養大凌河羣馬

大凌河所有騮馬十羣騾馬三十羣每騮馬一羣每年冬季額給豆九百十四倉石四斗穀草三萬束羊草七萬四千束每騾馬一羣每年冬季額給豆四百五十三倉石六斗穀草一萬八千束羊草六萬束 雍正十三年十月奏准將南苑餵養之騾馬一千六百餘匹交送大凌河餵養此項馬匹分撥各羣每羣每年冬季增給豆五十倉石穀草三千八十束羊草一萬一千五百二十束此項料豆俱於莊頭額糧內撥給草束均派莊頭 乾隆十九年十二月軍機處奏准由養什牧哈達處歸併大凌河八羣馬匹內添設騾馬四羣現設騮馬十羣騾馬二十四羣其添設之騾馬四羣即照大凌河騾馬羣之例每羣每年冬季各派給黑豆四百五十三倉石六斗穀草一萬八千束羊草六萬束每年秋季視上駟院文到按羣分派山海關外錦州等處莊頭撥給 嘉慶十五年正月軍機處奏准大凌河牧羣馬匹入圈餵養嘉慶十二年該將軍具奏馬匹入圈時例係按應餵之數交各莊頭輪流餵養每十數日另行趕換一處責成不專出圈時多有倒斃請將此項馬匹按照莊頭等第分撥常川餵養以專責成等因嗣因牧掌牧副牧丁等不敷分圈調撥看

守議駁今該將軍覆奏目覩各莊頭圈養處所棚槽窄狹馬匹既多餵養不盡如法牧掌等僅止在彼閑住而各莊頭等棚槽既窄則馬匹擁擠勢所不免騶馬臆分騾馬孳生均有妨礙與其令各莊頭輪流餵養莫若按定各莊頭等第均勻分養責成既專可收實効查現有一等莊頭六十六名各分養馬五十四五匹二等莊頭四十四名各分養馬三十八九匹三等莊頭四十四名各分養馬三十二三匹四等莊頭一百十三名各分養馬二十五六匹統於馬匹出圈時點驗臆分分別賞罰至牧丁等每莊頭一名派撥牧丁一人
在彼照料已無不敷其牧掌牧副仍須輪流稽查本羣馬匹查該將軍所奏與馬政似有裨益應如所請並請責成該副都統於交收之際實力點驗臆分分別賞罰不准牧丁等短交莊頭等少餵如有賄囑通同虛收虛交隨時確訪立即參辦

糧莊交納雜項物件

山海關外糧莊無論等第每名每年額交茜草五十斤線麻十八斤小根菜菔蒿菜各十六斤黃花菜十斤納糧莊頭五名內一名地二百六畝一畝二名各地一百五十一畝一名地一百五十畝每年各交糧七十倉石鵝一隻一名地一百畝每年交糧六十四倉石

鵝一隻 雍正三年正月奏准關外糧莊無論等第每名每年交鵝一隻 乾隆四年十月奏准關外莊頭等每年應徵茜草每斤作價銀七分令該副都統徵交廣儲司其武備院應用茜草令該院咨取廣儲司銀兩採買應用

比查壯丁

凡山海關外壯丁三年查比一次即令派出查比關內壯丁之官員查比造冊呈明交會計司存案

應增應除戶口照關內之例

雍正元年七月奏准查比關外壯丁停其派員令錦州副都

統查比造冊咨送內務府仍交會計司存案

奏銷糧石

雍正七年十二月奏准山海關外糧莊每年所報新糧並舊窖陳糧及用過餘剩糧石數目據該副都統移文到日限一月查覈具題

查勘旱澇

初山海關外莊頭地畝如遇旱澇據中後所之筆帖式領催等呈報被災輕重分別具奏另定額糧分數 康熙九年二月奏准山海關外莊田遇有旱澇停止派內管領往驗

五十七年十一月奏准停止中後所值年司官其查勘旱澇仍據該筆帖式等呈報辦理

雍正元年七月奏准因錦州添設副都統郎中等官其山海關外莊田旱澇俱據該副

都統郎中查勘分數辦理三年七月奏准莊田遇災按分數免差其捏報者按捏報分

數治罪

免差併治罪條例詳見關內糧莊事宜

補放莊頭

凡山海關外莊頭缺出該副都統於該莊頭子弟內揀選呈報內務府承替如該莊頭子

弟無可承替者准於家道殷實壯丁內揀選呈報內務府補放乾隆十五年九月呈准

查從前錦州遇有莊頭缺出即於莊頭子弟及壯丁內揀選補放並未載有代完欠項之

條口內定例遇有革退缺出莊頭子弟內有完納新陳欠項者准其頂補如伊族中無完

項之人或別莊頭子弟內有代完新陳欠項者亦准其頂替錦州項補革退莊頭遺缺雖

無完欠之條而該處現今查照口內則例辦理自應與口內一體令其將新陳欠項盡行

完納方可准其頂補未便以本內豁免參革莊頭錢糧作為新替莊頭予以豁免之項應

行令該副都統傳示頂替莊頭人等不獨新欠代完務將遺缺所有陳欠一併完結解交

廣儲司庫再行頂替所有該處補放革退莊頭遺缺請均照口內則例定擬辦理

打牲烏拉安設糧莊

康熙四十五年五月奏准打牲烏拉處蜜戶內挑選五名安設莊頭每莊安設莊頭並壯丁定爲十四名給牛二十隻開墾荒地耕種每年每莊納糧一百六十八斤石建倉收存接濟本處之用一應催徵比查等事俱隸打牲烏拉處總管管轄每年將出入糧石數目呈報內務府 雍正六年三月奏准莊頭等歷年所報糧石內存收二萬倉石備用外其餘交該地方官較時價徵減糶賣所得銀兩存庫其所賣糧石數目及所得銀兩數目呈報內務府查覈

打牲烏拉修理倉廩衙署

乾隆二十二年六月奏准從前打牲烏拉倉廩及衙門房間牆垣俱係八旗攢湊蓋造陸續粘補修理嗣於雍正十二年奏請修理倉廩停止攢湊動用賣穀銀兩修理又經奏准修理衙署房間事同一體且東三省衙署倉庫粘補修理亦有動用官項之例其修理此項衙署房間及圍衙土牆動用糶賣變色糧價銀兩所用銀兩數目造具清冊呈報該部

並內務府照例覈銷註冊嗣後該處如有應行粘補修理之處仍令該總管奏請動用糶賣變色穀石銀兩修理 二十四年正月奏准打牲烏拉總管具奏該處莊頭收存所交糧石倉廩於乾隆二十三年七月被水冲壞查從前舊倉因建在城外西南臨於江沿始致被水冲壞今看得城內東北角地勢高阜平坦堪可立倉請將倉廩挪蓋城內東北角高阜地面蓋造其應添木植磚瓦灰斤等項估計約需銀三千七百餘兩動用糶賣變色糧石銀二千九十四兩零其不敷銀一千七百兩請援照從前粘補倉廩領過盛京戶部錢糧辦理之案暫由盛京戶部支借應用所借銀兩俟倉儲莊頭所交糧米積盈即行照例奏請易出變色糧米糶賣所得銀兩陸續歸還盛京戶部統俟工竣將實在用過銀兩數目逐款分晰造具細冊咨送工部由該部照例奏銷仍造細冊咨報內務府註檔備查

駐馬口外安設糧莊

康熙五十七年十一月奏准於壯丁內挑選十五名在駐馬口外彌陀山等處安設莊頭各給荒地三百晌自備籽種牛隻農器開墾莊頭並壯丁共定爲二十名每年每莊交米二百倉石俱隸右衛將軍統轄其應徵米石每年催徵交納本處旗倉初墾之時免納米

石三年其補放莊頭及比丁等事俱由該將軍辦理 乾隆三十五年閏五月戶部奏准駐馬口外莊頭等應交糧石折徵銀兩每米一倉石改徵銀九錢飭令莊頭等按年輸納存留朔平府同知庫內以充兵餉仍於徵齊之日分晰造冊送部覈銷並知照內務府存案

歸化城安設糧莊

康熙三十四年三月奏准於莊頭子弟及壯丁內挑選十三名在歸化城安設糧莊每莊給荒地三百晌自備籽種牛隻農器開墾莊頭並壯丁共定爲二十名每年每莊交米二百倉石由歸化城都統催徵交納本處旗倉初墾之時免納米石三年如有革退補放等事該都統呈報內務府辦理三年一次比丁即令查比口外壯丁官員查比 乾隆二年年三月奏准歸化城十三莊自力開墾地二千六百餘頃內每莊額給地六十頃令歸化城新城將軍統轄其餘地一千九百餘頃撤交地方官招民承種徵租

欽定總管內務府現行則例

會計司卷三

挑選女子

凡內務府三旗佐領管領下女子年至十三歲每年該佐領管領查送會計司彙總奏交宮殿監督領侍太監等請旨帶領看閱其看閱女子等項需用綠頭牌白木牌移付營造司領用 乾隆六年二月奉旨看閱八旗內府佐領下女子其大臣官員之家尙有車輛若兵丁等女子俱係僱覓車輛嗣後看閱女子內無論大臣官員兵丁女子每人賞銀一兩僱車應用今歲看過女子均著補賞此項賞給之處若八旗者動用戶部庫銀若內府佐領下者動用廣儲司庫銀欽此 是年七月奉上諭總督瑪爾泰奏伊女恆志原與德佩議定姻親尙未挑選今年已十七歲懇恩完姻一摺此時德佩尙未到京俟德佩到京時另降諭旨至八旗女子必須挑選後方准結親此本朝之舊制也旗人等理應欽遵奉行近視旗人等竟有將未選女子許配與人試思如有奏事之責大臣等雖係奏明請旨然與理例究未允協所有挑選旗人女子原爲與王阿哥等選揀福晉若未選之前便與人許聘結親不但有違舊制似無奏事之責人員等之女業經許聘與人朕併不知其詳

另指與人大有關係况八旗女子於十三四歲時即行挑選併無遲悞之處將此交戶部通行曉諭八旗嗣後將未選女子斷不可私行與人結親務須照例挑選後方准結親欽此 七年八月奉上諭嗣後引看女子皇太后皇后之姊妹嫡親兄弟之女嫡親姊妹之女如有記名者著戶部奏聞除名再妃嬪等之姊妹嫡親兄弟之女嫡親姊妹之女有記名者著內務府告知總管太監奏聞將此永著爲例欽此 八年十一月奉旨看閱女子將旗下外任文武官員之女概令送京看閱路途遙遠不無往返跋涉之勞嗣後閱看女子著外任文官同知以下武官遊擊以下官員之女停其送閱欽此 十八年四月值年旗奏准凡選驗秀女恩賞僱車銀兩照依所報人數先行領出存於印房臨選時即行散給儻有事故扣存交部等因隨經呈准每年內府三旗應選女子俟各該參佐領管領等將花名送齊會計司覈計總數呈明預期由廣儲司銀庫將應賞車銀領出交三旗參領散給如有事故悞看者查明將銀繳回內庫 二十八年十一月奏准會計司每逢挑選女子存放花名冊檔木牌需用帳房四架請嗣後屆期向武備院行取應用 三十三年二月奉旨嗣後再挑女子六人著爲一排欽此 三十九年二月奉上諭嗣後各宮挑補

女子著定於二月十月朕在宮內時就便挑補至妃嬪所用女子名數較多偶缺一二名即稍遲挑補未爲不可其貴人以下女子額數本少有欲隨時挑補者尙屬可行然亦令各本宮照朕挑看女子例按照女子名數各賞給車價銀一兩以資其往返之費若妃嬪中有欲於貴人常在挑選女子時就便挑補其本宮缺額之數者其應賞給車價銀亦令一例給與如此則備挑之家免滋不時之費以示朕軫惜內府寒微衆僕之意欽此 四十年十月奏准嗣後福晉等位下現使喚官女子暫且使喚俟有女子缺出傳交內務府著該各家選買送內使喚 四十三年正月健銳營奏准查京城所有回子等應選女子俱入在內務府佐領下辦理舊新番子等應選女子亦入在內務府佐領下辦理 嘉慶五年十一月奉上諭向來挑選秀女皇后皇貴妃妃嬪之親姊妹俱應備挑體制殊有未協嗣後自嬪以上其親姊妹著加恩不必備挑戶部內務府即遵照辦理著爲令欽此是月奏准嗣後嫔嬪親生女不必入選 六年二月八旗護軍統領等具奏選看女子之日進內之大臣官員俱令由東華門西華門走不准由神武門走女子所坐車輛仍派該旗管排章京等按原排次序進神武門外東柵欄跟車人等只准一人跟隨不許多跟其

帶排太監等仍照女子原排次序送出宮時交與戶部該旗管轄章京等一同看管由中路西邊上車從西柵欄放出等因奉旨從前引看八旗女子每遇出門之際候接女子之人及出入人等甚多擾混阻路以致女子驚怕迷路此朕所深知所有此次引看女子朕正欲降旨交前鋒統領護軍統領嚴加管轄毋令擾混擁擠今日業經前鋒統領護軍統領等會同擬議具奏所慮甚是可嘉著卽照所請行外其引看女子之日卽王子亦不准由神武門行走著爲常例永遠遵行自定此例之後儻仍有擾混或另有差錯爲該前鋒統領護軍統領是問欽此 十一年五月奉上諭明年挑選女子八旗內外滿蒙三品以上文武官員之女如明歲年至十三歲者一體入排備選如選看後續經年已及歲遇應選之年不必復行備選此後仍照舊例辦理併交八旗滿洲蒙古等旗詳加查驗該女子實在年歲切不可妄報欽此 是年五月奉上諭嘉慶九年二月間應選女子見其所穿衣服不惟衣袖寬大兼有纏足者竟屬忘本太不成事體彼時已經飭令明發上諭曉諭八旗矣本月初九日曾降諭旨嗣後備選女子八旗漢軍文職自筆帖式以上武職自驍騎校以上官員之女一體備選其兵丁之女不必備選此特姑恤窮兵之至意乃該兵丁

等若因此任意將女子纏足衣袖做寬致違朕仁愛之至意也我朝服制起自皇祖欽定且從前太宗文皇帝曾降諭旨服制式樣著後世子孫永遠遵行斷不可改諄諄誥誡又經皇考高宗純皇帝仰體聖意復行推廣聖旨勒碣於箭亭以垂久遠敬思太宗文皇帝皇考高宗純皇帝聖旨昭然大有深意後世子孫應永遵奉行儻年久流入漢習亂改式樣關係匪淺男子服色治之猶易婦女恒居家不出伊等穿戴難於稽察將此交八旗大臣官員兵丁等各整齊家教將婦女所穿衣履務照舊制穿戴毫不可沾染漢人習氣仍交八旗滿洲蒙古漢軍都統副都統參領佐領等留心嚴查儻有八旗滿蒙女子內仍做寬袖衣服漢軍女子內有纏足者一經查出將該女子父兄指名參處不可徇情俟題參之後只將該女子父兄治罪該都統章京等盡行寬免經此明示曉諭後仍不爲事續經揀選女子之時或被朕看出或被旁人參奏除將該女子之父兄治罪外仍將該旗都統章京等俱行革職斷不輕恕將此交八旗滿洲蒙古漢軍等旗務令家喻戶曉通行曉諭一體遵行欽此 十二年二月奉上諭朕前於嘉慶五年間曾經降旨令自嬪以上親姊妹俱加恩不必備挑其親弟兄親姊妹之女則不在此例辦理尙未畫一自應恭繹聖訓

酌定章程嗣後皇后妃嬪之姊妹及親弟兄親姊妹之女於挑選秀女時仍一併備挑著戶部內務府聲明另爲一班不必拘定年歲作爲各本旗頭起帶領著爲令欽此 十八年二月奉旨嗣後內務府三旗挑選女子均著各按女子之父官階品秩排列兵丁之女亦著按照各項錢糧分晰依次排列仍分三旗毋庸各按佐領管領次序其悞看女子亦著照此排列欽此 道光二年二月總管內務府大臣英和面奉諭旨自道光三年始內務府三旗女子內所有回子番子之女俱毋庸入排引看欽此 十八年十一月奉上諭朕恭閱皇考仁宗睿皇帝實錄嘉慶九年二月內欽奉諭旨鑲黃旗都統查出該旗漢軍秀女內有纏足者並各該秀女衣袖寬大竟如漢人裝飾著各該旗嚴行曉示禁止等因欽此仰見皇考訓誡周詳允宜永遠遵守今相沿日久恐奉行不力又復視爲具文或致再蹈此等習氣不可不重申例禁加之整飭我朝服飾本有定制不惟愛惜物力亦取便於作事若如近來旗人婦女往往衣袖寬大甚至一事不可爲而其費亦數倍於前總由競尙奢糜所致至做倣漢人纏足尤屬違制此等惡習大約內務府漢軍及屯居漢軍旗人俱所不免於國俗人心關繫甚鉅著八旗滿洲蒙古漢軍都統副都統等嚴飭該管按

戶曉諭隨時詳查如有衣袖任意寬大及如漢人纏足有違定制者一經查出即將家長指名參奏照違制例治罪儻經訓諭之後仍復因循從事不能實力奉行將來經朕查出或被人糾參定將該旗都統章京等一併嚴懲決不寬貸將此通諭知之欽此 十九年七月奉旨嗣後凡遇各宮未滿年限交出女子著總管內務府大臣派員詳細查驗後據實具奏欽此 十二月奉上諭朕因近來旗人婦女不遵定制衣袖寬大竟如漢人裝飾上年曾經特降諭旨令八旗都統副都統等嚴飭該管按戶曉諭隨時詳查如有衣袖寬大及如漢人纏足者將家長指名參奏照違制例治罪凡我滿洲蒙古漢軍人等諒不致視若具文仍前玩泄惟思明年又屆挑選秀女之期恐此等澆風仍未能消除淨盡不可不重申例禁著八旗滿洲蒙古漢軍都統副都統等轉飭該管各員恪遵前旨家喻戶曉一切服飾悉遵定制儻明年挑選之期仍有不遵定制者一經查出除照家長例治罪外定將該旗都統章京等一併嚴懲決不寬貸勿謂言之不早也將此通諭知之欽此

內府女子准與八旗結親

初內府管領下女子不准與內府佐領下人結親內府佐領下女子不准與外旗人結親

各莊園壯丁等女子惟與伊等壯丁內結親 乾隆二年二月奏准各莊園壯丁女子准與三旗管領下人等結親 是年四月奉旨凡看閱過女子無論內府管領佐領八旗任從伊等結親欽此

挑選嫫嫫媽媽里

凡挑選嫫嫫媽媽里據宮殿監督領侍太監等所傳即交各佐領管領查選將應選之人送與宮殿監督領侍太監等挑取 雍正七年十月奉旨阿哥公主等之嫫嫫媽媽里著照雍和宮例每月賞給銀二兩白米二斛看燈火媽媽里賞給銀一兩白米一斛半欽此 遵即呈准此項銀米每月移付廣儲司掌關防管理內管領事務處領取 乾隆二十九年二月奉旨嗣後挑選照看阿哥等媽媽著在京居住東三省侍衛官員妻室內會清語者挑選欽此 嘉慶五年戶部奏准所有看守嫫嫫墳塋人等請照乾隆年間冊檔一併給與家口米石 二十五年十月敬事房傳出總管太監常永貴奏准照乾隆元年例皇太后前親選四十歲以外五十歲以內無子嗣窳嫫婦媽媽里四名俟住壽康宮時著伊等進來侍奉其應得口分等項照官女子之例得給 道光五年十二月本府奏准據

吉林將軍遵旨派員送到清語婦人三名請交敬事房預備典禮等項差使

挑選茶飯上人

凡茶上飯上人缺出將應挑之栢唐阿護軍領催披甲人及外旗保送人等由內務府揀選帶領引見補放 雍正元年正月奉旨茶飯上不必挑取外旗人員俱挑取內府人員朕已將內府官員員缺俱以內府人員補授再茶飯上人朕亦各示鼓勵有授爲侍衛及藍翎侍衛者諒必多有情願之人如無情願之人再行具奏挑取此項人員若庫使護軍栢唐阿內有年久諳練本處差務者不必挑取欽此 乾隆四十四年十一月茶膳房奏准嗣後遇有茶飯上人缺出無庸由內務府挑選本處將庖丁承應人內挑選能者照例帶領引見其二兩錢糧缺出挑取閑散人補放

挑選各項差務

凡挑選鷹鷂房狗房等處栢唐阿及廐丁匠役人等據各該處來文交各佐領管領下將應挑選之人保送會計司轉咨送各該處挑選 乾隆二十六年五月養狗處奏准於鄂勒特回子內揀選二十名挑取養狗栢唐阿今酌定於八旗外養狗處栢唐阿四十名內

裁汰十名內府養母狗栢唐阿二十名內裁汰十名共裁二十名作爲內府回子佐領下之缺於該佐領下保送閑散回子內揀選記名者帶領引見挑補 四十六年十一月奉上諭前曾降旨步軍統領衙門添設京城五營兵丁已令將八旗漢軍敖爾布步軍閑散人等與民人一體挑選惟念包衣佐領下漢軍閑散人等今已生齒日繁現在衆多著交步軍統領將包衣佐領以及管領下漢軍人等擇其漢仗好者一併歸入挑選欽此

除派熱河值年員役

雍正十年十二月奏准每年會計司除派筆帖式一員催總一員領催二名於熱河值年催徵口外莊頭等糧石等項 乾隆二十九年九月呈准會計司筆帖式催長領催等輪班在熱河值年向例俱係一年一換該值年筆帖式催長領催等間有該總管呈請連班者未便長久連班請嗣後熱河值年人員仍按例一年一換該總管請留亦不得過三年

道光二年閏三月呈准會計司筆帖式催長領催等輪班在熱河值年向例俱係一年一換請留不得過三年今照熱河總管等呈請該處值年人員均令三年一換以資熟手年滿不准再請保留

收驗太監

凡禮部咨送太監及投充太監會計司掌儀司官各一員監視掌儀司年老太監驗淨後交與宮殿監督領侍等辦理其挑入當差者應得之錢糧附於各管領下支領 雍正二年十二月奉旨嗣後新進太監如不係旗人年二十五六歲以下者著掌儀司會計司官員并驗淨之首領太監公同驗明具奏欽此 十三年七月奉旨新進太監等經引見後將應留者留用應撥者撥回外面何得因伊年歲已大遂行撥回嗣後新進太監勿論年歲大小俱著移送欽此 乾隆三十一年六月奏准嗣後各王公大臣家遇有招募太監令其呈報內府查照該太監果非素有劣蹟在逃者方許招募當差若有私相援引並不呈報內府查對或經事犯或被查出照例加倍從重治罪各王公大臣家太監內儻有緣事逃走者亦應聲報內府並禮部存案備查嗣後王公大臣家遇有招募太監俱將該太監年貌姓名籍貫遵照原奏咨報內府移文掌儀司轉交總管太監等查照認識如非宮內逃出太監即交該王公大臣家聽其招募驅使其有緣事逃走者亦將逃走日期該太監年貌姓名招募日期並緣何事逃走之處一面咨報禮部並步軍統領衙門一面咨報

內府存案備查將此行文宗人府值年旗通行各該旗轉行本旗王公大臣家一體遵照外並行文禮部嗣後招募太監務將該太監從前曾否在何處充當過差使之處確實查明於文內聲叙以憑辦理仍知照步軍統領衙門 三十七年四月奉旨交內務府大臣等嗣後新進太監過九歲者著收用未至九歲者著不必收用欽此 四十一年十二月奉旨向例太監先由禮部報名記檔再交內務府大臣驗看後分給各處充役近來報名者甚少或因部中胥役需索致伊等觀望不前亦未可定此例蓋沿明季舊習本朝內廷諸務既有內務府大臣管轄其收錄太監一節自應總歸內務府大臣畫一辦理以專責成嗣後太監報名不必仍由禮部欽此 五十年六月奉旨向來刑部定律凡有私自淨身人犯俱問擬斬候因念此等人犯大抵因貧所致是以加恩釋放發在熱河當差現有太監王成一名朕面加詢問伊係直隸安肅縣民原報今年十六歲實年纔十三歲前年因家中貧苦父母爲之淨身問擬斬罪在縣監禁一年上年始發至熱河當差初次報縣時該縣胥役因向伊父王二格需索不遂曾將伊父一併收監四十餘日後因窮不能給始將王二格釋放遂捏填王成年十五歲定擬詳報等語此事經朕親向詢明且看其身

軀幼小並應對明白實無虛飾知縣爲親民之官雖不致昧良舞弊貪圖微利若此此必胥役鄉約人等因私自淨身有干例禁希圖訛詐又緣索詐不遂爲之加增年歲以入其罪並將伊父無辜久羈聞之殊覺惻然而該縣竟漫無覺察任憑胥吏等勒索捏報種種弊混亦難辭咎現因各處當差太監乏人尙在曉諭招充且向例太監於投進當差時祇賞給銀五兩其每月應得分例亦不過二兩若未經投進之先吏胥亦向其需索則是得不償失誰復肯將其子弟充當太監者近日進宮太監短少之故必由於此况王成淨身時實年不過十一歲必係父母窮苦無聊遂爾將伊閹割與伊何涉乃擬大辟而復滋胥役索詐捏飾之端乎此案著劉峨詳查參奏因思私自淨身又犯律擬斬候者雖爲慎重傷生起見然一經閹割便成廢人苟非實在窮苦孰肯甘心出此今因有此律而轉致吏胥藉端勒索甚至加增年歲故入其罪况此輩供奔走掃除之役自古已然是宮闈在所必需而及治之以罪從前定例本未允協所有私自淨身間擬斬候一條竟應刪除並著直隸總督順天府尹嚴飭各屬州縣嗣後如有並無他故自行淨身准其投內務府派撥當差照例驗看如有他故內務府大臣再行文問之地方官不得竟拘其家屬致滋擾累

儻有仍前需索滋擾者即將該州縣等據實參處其現因私自淨身問擬斬候己未招解併在監羈禁未經釋放者亦著刑部同直隸總督查明具奏釋放解送內務府分別派撥當差欽此 五十年六月刑部奏准查原例內載敢有私自淨身者本身及下手之人處斬全家發邊遠充軍等語此條原係相沿明季舊例蓋明季官員干政往往奸徒私自闢割希圖投進是以定例綦嚴我國家綱紀肅清所有太監止供使令從不能干涉政務己絕圖謀進用之源每因需用乏人不得不招募以充其數查乾隆四十四年續纂條例內開投充太監聽其報明有司闕割後即令其自行投報內務府驗明送內當差仍行文該地方官取結存案等語續纂例意其於報官闕割後即令自行投報內務府不復令地方官具文申送者正以杜胥役勒索之弊併以廣貧民投充之路今欽奉諭旨令將私自淨身擬斬之例刪除查此等淨身之犯情節各有不同有因貧而圖充太監者有畏罪而故自傷殘者今舊例既刪將來遇有此等案件自應區別請嗣後如有委係貧難度日私自淨身別無他故者應即照例令其自投內務府驗看派撥當差外如係畏罪情急起意闕割希圖漏免此等人犯除實犯死罪及罪應外遣無可再加外其餘俱按其原犯科條上

各加本罪一等定擬 嘉慶四年三月奉旨向來宗室王公及一品文武大臣所用太監並未定有額數以致投充私宅太監人數過多宮內服役者轉不敷應用不得不向各王公大臣家取進而王公大臣家中有太監少者現用重價尋覓亦有皆朕所深知自應分別定以成數用數體制嗣後親王准用七品首領一名太監四十名郡王准用八品首領一名太監三十名貝勒准用太監二十名貝子准用太監十名入八分公准用太監八名一品以上文武大臣准用太監四名公主額駙准用太監十名民公准用太監六名其不入八分公及二品以下民爵侯以下俱不准私用太監經此次定額之後如有不願多役太監者聽其自便亦不必拘於成額儻有仍前任意濫用致踰定額者即以違制論總之外宅太監之數寧絀毋盈而宮內所需太監此後亦不復再向外宅挑取將此通行通知一體遵照並著現在王公大臣宅內太監名數有浮於新定之額者即交到內務府衙門送進宮內當差嗣後宗室王公等名下太監著年終報明宗人府查覈一品文武大臣等名下太監著年終報明都察院衙門查覈俱各彙奏一次著爲例欽此 七年十一月奉旨本日內務府具奏二次逃走被獲之太監胡進玉請發往黑龍江給兵丁爲奴一摺已

依議行矣該太監胡進玉於嘉慶三年二次逃走後屢改名姓投往各王公門下已歷六處豐伸濟倫一經查出卽行奏交慎刑司審辦所奏甚是嗣後各王公大臣於招募太監之時查其情形委係民間初來之人自可留用儻形蹟稍有可疑卽呈明內務府查認如係由內逃走者自應照例交司審辦認非由內逃走者方准其各王公收留其業經給票爲民之太監投至各王公大臣家雖准收留亦令各家呈報內務府查覈並著各王公大臣家於每歲年終將有無收過太監名數及收過者並非由內逃走之人彙報內務府存案欽此十三年六月奉旨太監一項在近御當差自應揀選年幼之人承充近來挑進太監多有在二三十歲之外且有別省之人皆由總管內務府大臣不加揀選之故此等無稽之人豈可留在內庭隨侍但旣已充當太監若不加收用未免無所謀生向來宮內短少太監尙在王等家內挑取莫若酌量更換該太監等旣可得資養贍而王等使用亦不乏用嗣後凡投充太監該管大臣務須逐加選擇除在二十歲以內及雖在二十歲以外尙可選充者毋庸置議外若年歲過大或係別省之人卽奏明給與親王郡王家內使用另將該王家內二十歲以內太監送進當差按照王等次序辦理每太監四名作爲一

次週而復始永著爲例卽傳知諸王等遵照欽此 是年六月奉旨向來交進太監十歲至二十歲者俱賞銀五兩十歲以內二十歲以外者俱不交給銀兩嗣後所有賞進太監六七歲至二十歲者俱賞給銀五兩二十歲以外者著加恩賞銀三兩欽此 十三年六月奏准嗣後凡發遣釋回太監卽照新定年長太監撥給親王郡王之例奏明按照次序一體給與王等使用另將該王等家內太監二十歲以內太監更換挑進當差 十六年二月奉上諭朕恭閱皇考高宗純皇帝實錄內載乾隆四年十二月欽奉諭旨四執事總管首領將太監李璠放假四五日往弘皙處將宮內之事信口傳說太監等告假不過一日兩日豈有四五日在外之理將四執事總管首領查明議罪爾總管等曉諭旗下太監等旣已身離旗下復往何爲現今將李璠夾訊卽是榜樣等因欽此仰見我皇考整肅宮庭嚴禁弊端之至意旗下太監旣進宮內服役卽不應再回伊原主家中所以嚴內外之防而杜關通之漸乾隆年間宮內太監尙多其由旗下交進者少彼時尚有如弘皙家所交之李璠藉放假爲名竟敢私回伊原主家中傳說宮中之事况近來宮內太監較少由旗下交進者多豈能皆是良善恐胆玩性成未必不出外滋事茲時嚴定章程嗣後旗下

太監一經送進宮內當差不許再回本主私宅該王公等於交出之後再見該太監潛來私宅即著立時斥逐勿准片刻逗遛如斥逐不遵或仍行潛往即著鎖拏奏交以便懲創祇治該太監之罪其本主皆毫無不合若不斥逐拏解或竟任其傳說宮內之事一經發覺不但重治該太監之罪其本主亦獲戾不小必不姑貸將此旨通諭諸王公知之仍載入宮中現行則例欽此 十八年十月奉旨盧喜著刑部定擬具奏餘依議嗣後王公等之首領太監無許與宮中太監交結往來著內務府大臣留心查察如有陽奉陰違者嚴參治罪欽此 是年十月奉旨總管內務府遵旨議奏嚴禁太監等放假等事釐定章程一摺嗣後總管首領太監隨侍太監遇有祖父母及親喪事故者准其放假十六日其餘各等處太監准其放假十二日著總管內務府大臣派官役前往該太監門首稽查俟其假滿進內再將官役撤回但不許太監等向官員兵丁民人等無故攢收分金至巡幸應行隨往之太監等於起身前准其放假二日備辦一切不許過夜餘依議欽此 是年十一月奉旨嗣後阿哥福晉出入所有巷口攔擋布帳街道管轄閑人著照內庭主位出入之例預備至御前太監出入由總管內務府大臣派領催一名披甲人一名隨同前往並

著設立冊檔一本將伊等出入時刻到去所在及由內派出何人隨住由外派去何人隨往詳細註寫以便稽察欽此 十九年五月奉上諭朕恭閱皇考高宗純皇帝實錄內載乾隆五十年六月內欽奉諭旨進宮太監由內務府派撥當差如其人桀驁不馴或言語支離即行文原籍查其有無別故另行辦理此事全在總管內務府大臣隨時查看方能妥協宮禁森嚴所關匪細著諭令總管內務府大臣嗣後於太監甫經投進者必當二三人同看務宜留心驗看查訪明確再行交進當差毋得濫收致有弊混等因欽此是時禁圍無事我皇考駐蹕熱河於幾暇特降是旨仰見先幾燭照垂訓周詳實當萬年遵守近來總管內務府大臣於進宮太監並不詳細查驗一經人數短少率將充投應募之人濫收撥用而諸王府於交進太監時尤不慎加選擇祇圖塞責一致奸徒得以溷蹟其中上年九月內被林清勾結謀逆之太監共有七人內劉得財爲首傳教劉金率先與謀餘五人由該二犯轉相糾約是以特廷訊劉得財劉金盡法懲治此二犯從前卽係王府所進朕不爲已甚彼時未加深究亦不復追論但此後不可不嚴立禁令上年臣工等條奏稽查太監條款甚多因其動有窒礙未經允行太監給使內庭古今通例與其於進宮之後

多爲禁防不如慎之於進宮之始較爲得要嗣後進宮太監其自行投充者著總管內務府大臣等公同查驗詳問來歷行文該地方官查明實因家道貧苦在籍並無爲匪不法情事結報到日方准收進派撥當差其由諸王公交進者著該本王自行詳擇必須給使已逾三年察其馴謹樸實實可放心者方准交進如其居心行事不敢具保者不許濫進充數設有疎忽弊混惟原驗之總管內務府大臣及該本王是問其各凜遵毋忽欽此

十九年九月奉旨嗣後王府交進太監著內務府行文該太監原籍地方官查明來歷出具印結到日方准交進當差如該地方官不行出結將送到太監仍撥回王府另行更換欽此 是年十月奉旨刑部內務府會奏太監私自淨身摺內所議新進太監先令在外圍當差一條尙未妥協太監等供役內廷進身時固不可不加以慎重必須專人管教俟其少諳規矩再行分撥各等處當差嗣後新進太監著先交地方熟火兩處首領太監其應學藝者交各該處首領太監各派年陳老成之人作爲本管太監照管衣食查其行止如堪供策使告知總管太監等分別各處如有不安分者即告知總管太監等交出照例分給親郡王將各該王府太監換進各該管首領太監若不經心查看率行分撥各該處

經各該處查出該太監劣蹟將原管之首領太監等治罪至太監原籍出結之地方官處分亦應定以限制進宮太監除飲酒賭錢以及逃走等事免其參處外設犯罪至軍流以上者再將濫行出結之各該地方官參處餘依議欽此 二十一年十二月總管內務府大臣英和面奉諭旨向例招募太監取具該地方官印結殊爲具文嗣後凡招募太監由內務府驗看後即行交進不必取具該太監原籍地方官印結欽此 是月奉旨向例新進宮之旗檔太監賞銀三兩民檔太監賞銀五兩嗣後著加恩將賞三兩者賞六兩賞五兩者賞八兩欽此 二十三年四月奉旨向來招募民籍太監係恩賞銀五兩王府交進太監恩賞銀三兩經朕加恩俱各加賞銀三兩乃該太監等不知感恩竭力當差每於領得賞銀後即乘間逃走滑懶不堪卑鄙下賤實屬可惡嗣後民籍太監賞八兩者減賞銀二兩改賞銀六兩王府交進太監賞六兩者減賞銀二兩改賞銀四兩著爲令欽此 二十四年十二月奉旨本日內務府具奏查覈新放首領太監一摺聲明新放七品首領太監焦進玉等十名係奉旨特放等語所奏非是此項新放首領太監俱係年終帶領引見補放非隨時特旨補放者可比嗣後查覈具奏宮內圓明園之八品補放七品首領太監

者俱不必復行查覈年限具奏其新放八品及無品級首領者仍著照例查覈著爲令欽此 二十五年十月奉旨現有撥往壽康宮等處當差太監宮內太監不敷使用著親王交進太監八名郡王交進太監六名貝勒交進太監四名貝子交進太監二名至內務府會計司交太監亦著趕緊招募陸續交進欽此 道光三年七月奉上諭內廷向存各省道府名單以備查閱朕因歷年已久不符者居多將名單另鈔一分面交軍機大臣等諭令查明更換並未向奏事處太監等提及一字乃曹進喜妄逞己見輒敢在勤正門外向軍機大臣等查問聲稱吏部疲玩詞色俱厲經軍機大臣面奏朕特派綿課汪廷珍那清安將太監曹進喜面訊據曹進喜供認係伊自出主見令吏部開單送伊閱看並欲定以期限如到期不換伊須查問併欲向兵部堂官要武職名冊等語我朝列聖相承家法極爲嚴肅太監不過供宮廷灑掃奔走之役從不許干預朝政所以杜漸防微者至深且遠曹進喜在內庭豢養多年於伊職分內不應辦之事輒敢越分干預出言無狀實屬狂妄可惡之至此風斷不可長曹進喜著革去五品總管交乾清宮總管太監重責二十板另派差使並將此旨載入宮中現行則例欽此 六年十月奉旨本日內務府具奏逃走太

監治罪摺內擬撥換王府太監林進福苑傑二名著不必撥換王府仍照例各責六十板發吳甸鋤草一年期滿送進分撥外圍當差嗣後內務府招募太監內有年歲較大不堪供役者仍准撥換王府太監交進其逃走太監凡有瘡疾等情俱不必撥換治罪後交總管太監查看酌撥外圍當差餘依議欽此 七年十一月奉旨以後每遇黑龍江等處釋回年滿之太監俱著當差三年無過再行賞給加賞銀五錢著爲例欽此 八年十二月奉上諭總管內務府具奏現在恭逢恩詔乾清宮各等處總管首領太監等可否賞給錢糧一摺此次乾清宮各等處總管首領太監等均著加恩賞給一月錢糧嗣後每逢恩詔其總管首領太監等賞給與否候朕酌量施恩毋庸由內務府題奏欽此 十年十二月奉上諭嗣後王公一二品大臣使用太監數目不必定以限制多少聽其自便自明年爲始宮內當差太監如人數不敷著仍照舊例由宗人府傳知各王公按從前數目由內務府行知著令交進當差應先期諭令知之欽此

太監退役爲民

乾隆四十五年十二月呈准嗣後如有放出爲民太監到境發給執照即將伊等安插妥

協仍不時稽查如遇病痊該地方州縣官查驗確實呈報內務府即行送內當差由內務府自行辦理設若伊等竟有病痊捏改名姓任意各投王公門上當差者一經查出除將爲民太監治罪外併將未經查出之該地方州縣官一併參處並請知會值年旗轉飭各王公門上亦須詳查嗣後遇有此項由內放出爲民之太監不准收留儻有該府太監引進朦混收留者併將該引進太監加倍治罪 嘉慶十四年十一月奉旨向來宮內圓明園首領太監等遇有年老殘疾不堪當差者經總管太監等具奏即准其爲民從未特派人驗其中恐有情託捏飾等事不可不預防其漸嗣後凡有年老殘疾患病不能當差者經總管太監奏明後著內務府大臣等逐加親驗其有臥病不起者著內務府大臣揀派司員前往查驗屬實奏明後方准爲民儻有捏飾等弊將該太監嚴行審訊並將總管太監等參奏治罪著爲令現有奏請爲民首領太監等十名卽照新例辦理欽此 二十一年六月奏准太監等向來患病准令告假在外調養如病至一年未愈裁退錢糧給予執照爲民均於年終彙奏辦理但其中不無托故乞假告病爲民延至年終循例奏請者應請嗣後太監內如有患病令該總管首領等驗明暫停差使在該太監本處或本他

坦調養病愈卽照舊當差不准給假出外調養儻病勢沉重總管等驗明屬實具奏後准令給假在外調養或在興隆寺養病病痊後卽行交進原處當差此內如有篤疾及實在年老殘疾之人病至一年不能就痊會同該總管等驗明屬實卽行奏明給予執照爲民不必拘定年終彙奏其爲民執照將年貌詳細填寫給予收執此後儻病勢就痊情願進內當差者仍准令送進當差其未能痊愈或別謀生理聽其自便如有過犯照例治罪至太監內如有酗酒不法不服約束及有嫌隙托故不願在內當差藉詞告病爲民者該總管首領等務將實情奏請辦理如未經查明被其朦混遽准其告假出外調養爲民者一經查出卽行參奏太監於所犯本罪上加責二十板總管請照於應行禁約之事日久廢弛例罰月銀六個月首領加罰月銀四個月如該總管首領等有心徇庇隱飾濫准告病爲民除太監加責外總管加罰月銀六個月首領革退充當太監差使 道光二年六月本府奏准嗣後爲民太監必俟年力就衰實不能當差及得有廢疾者由會計司司員查驗屬實始准爲民聽其自謀生理如係年未衰老身無殘疾暫時患病者應撥出調養病痊後卽行進內當差或係久病不能痊愈查驗確實亦准爲民均由該地方官於該太監

到境後發給執照安插妥協仍不時稽察如遇病痊由該地方官呈報總管內務府送內
當差儻該太監等捏改姓名投往各王公大臣家服役者一經查出除將該太監治罪及
未能覺察之該地方官參處引進之人加倍治罪外並將率行收用爲民太監之王公大
臣由總管內務府分別奏請交宗人府吏部兵部都察院議處 八年十一月總管內務
府大臣耆英阿爾邦阿面奉諭旨凡有太監告病爲民者如係年老有疾於查驗屬實後
卽准其爲民如係年力精壯告病爲民者恐有托故之弊著總管內務府大臣詳細查驗
以杜朦混欽此 十一年八月本府奏准嗣後凡遇太監等有告病在外調養者病至一
年仍由總管內務府大臣會同總管親加驗看其有臥病不起揀派司員查驗如係年逾
六十五歲或實係篤疾方准給予執照爲民仍由該地方官不時稽察儻該太監等捏改
姓名投住各王公大臣家服役別經查出卽照道光二年本府奏准之例辦理其年未逾
六十五歲之太監等雖患病在外調養至一年尙未痊愈者概不准給予執照爲民仍按
月揀派司員前往查驗一俟病痊卽將該太監照舊交進當差其中儻有捏稱篤疾虛報
年歲或乘告假之便私行外出無論有無滋事一經發覺除將該太監治罪外並將率行

給假之總管首領太監等參奏懲治及查驗不實之司員一併議處 二十七年九月本府奏准嗣後凡遇因病爲民之太監仍遵定例覈實辦理其合例准其爲民者於執照內註明病痊繳銷字樣諭令該太監病勢就痊卽稟明該地方官呈報本府由本府驗看奏明交進當差並於准其爲民發給執照時卽將該太監年貌籍貫飭知本府番役通行步軍統領衙門順天府五城暨該太監原籍地方官隨時嚴查除係年逾六十五歲精力已衰或本係篤疾雖可就疾而勢難供役者無庸查拏外儻有病實痊愈頗可當差而不稟報病痊者一經訪獲卽行拏交本府查驗屬實將該太監爲民執照追銷發往吳甸鋤草三年期滿交進當差以杜捏病偷安之弊

太監挑補首領年限

道光二十五年十二月奉旨舊例宮內圓明園挑補首領太監俱係進宮三十年方准挑補立制本爲周妥且行之年久差使無誤後經改爲二十五年卽准挑補究非舊制著自明年爲始仍照舊例進宮三十年方准挑補本年所挑宮內及圓明園各處首領太監其已滿三十年者方准戴用首領頂戴其未滿三十年者只准食首領錢糧仍係扣滿年分

方准戴用頂戴永遠爲例欽此

鰥寡孤獨錢糧

雍正十三年十二月奏准內務府佐領管領下有年老無嗣及孤子孀婦等除有地畝產業錢糧者不給外其實在並無養贍之人由該參領詳查呈明每月給與一兩錢糧米石以資養贍俟孤子長成挑補披甲栢唐阿之後將所給銀米裁退此項銀米統於歲底查明數目具奏 乾隆二年四月將內府三旗佐領管領下應行賞給錢糧之鰥寡孤獨名口數目查明具奏奉旨內務府仍不時稽察務期無侵蝕情弊始副朕恩養內府人等之意如稍有情弊發覺之時朕惟總管內務府大臣是問欽此 三十九年四月呈准嗣後內務府三旗凡有子嗣之孀婦除伊子長成挑補披甲栢唐阿差使概不准予孀婦錢糧外至凡食一兩錢糧者無論在其母守節先後均准行給養贍孀婦錢糧米石 五十一年十月呈准內務府三旗各佐領管領下孀婦從前原有戶下額甲養贍後因此項額甲裁汰奏請將內務府孀婦每月各賞給一兩錢糧養贍孀婦子嗣挑補蘇拉匠役後即將孀婦錢糧裁退又經呈准凡有子嗣孀婦俟伊子長成挑補披甲栢唐阿等差使再將孀

婦錢糧裁退其子嗣挑補蘇拉匠役者仍照舊得給孀婦錢糧此係孀婦錢糧在先子嗣挑補蘇拉匠役在後至子嗣先得一兩錢糧而其母守節在後者概不給予孀婦錢糧請嗣後內府三旗凡有子嗣之孀婦除伊子長成挑補披甲栢唐阿差使概不准予孀婦錢糧外至凡食一兩錢糧者無論在其母守節先後均請照例得給孀婦錢糧查各該管參佐領管領承辦孀婦錢糧雖先送堂按例查覈後始行呈明支領但該孀婦名下實在有無房產地土並子嗣錢糧多寡之處恐日久因循未免冒濫查各旗保送甲缺先將有無房產並錢糧多寡之處開報都虞司斟查驗看後按次序挑補嗣後應行孀婦錢糧請照都虞司驗甲之例飭交各該管參佐領管領遇有應行孀婦錢糧先將該孀婦名下有無房產及現食錢糧子嗣詳細開註移送會計司按照冊檔確覈如果該孀婦名下並無房產亦無食二三兩錢糧子嗣者方准交該旗照例呈明辦理此內俟該孀婦子嗣得食二兩三兩錢糧即將該孀婦錢糧裁退再食三兩四兩錢糧冊檔事隸都虞司辦理會計司無憑查覈應移會都虞司查覆辦理惟查鰥寡孤獨錢糧向係會計司一年一次彙題嗣後孀婦錢糧會計司將查覈過各該管參佐領管領呈報孀婦錢糧案件於三個月一次

彙總呈堂備案照例彙題外如有房產並食二三兩錢糧子嗣朦混請給孀婦錢糧者由會計司查明即行呈堂將該管參佐領管領從重料理

易買豬口

凡每年春夏秋冬四季月敬神每次各色緞十匹作價銀八十五兩五兩重金二錠作價銀四十八兩五十兩重銀二錠作價銀一百兩布四十四匹作價銀七兩馬二匹作價銀三十兩牛二隻作價銀十六兩交與催豬催總鬻賣將所得銀兩購買豬二十八口以備祭祀 雍正五年八月奏准嗣後敬神牛隻送交順天府鬻賣 乾隆十九年八月呈准嗣後每年四季敬神牛隻於本日敬神後即交催總等先行送往順天府轉交大宛二縣鬻賣俟會計司照例呈明之時再行鈐用堂印補劄

入官人口

凡入官奴僕由會計司查收俱撥給各莊園充當壯丁 康熙四十七年四月刑部奏請將搶奪商南等處州縣之叛犯等給與功臣爲奴交內務府料理等因奉旨著交戶部轉交內務府欽此隨將此等叛犯撥給各莊園充當壯丁 雍正五年四月奏准八旗交送

抵項人口由會計司呈明轉交崇文門監督作價鬻賣。乾隆二年九月奏准莊園頭子孫滋生日繁舊有壯丁尙不能養贍復給此等叛犯實屬無益應交與值月都統照舊例查明八旗功臣具奏賞給。嘉慶十七年八月戶部奏准旗員緣事抄產應行入官人口內有看守墳塋家奴向係免其入官變價歷經照辦在案惟例無明文恐致辦理差參應請嗣後凡入官人口內有看墳家人令該旗查明取具切實印結送部一律免其入官。

入官地畝

凡入官地畝由會計司查收交該地方官收管。雍正元年三月奏准各處查送入官地畝及隨地房屋移咨戶部委員領取部劄會同地方官定租招民承種抵項入官地畝按租價之多寡作價亦交該地方官招民承種取具印結呈堂其每年應交地租銀兩據該地方官交送到日由會計司移付廣儲司交納。三年六月呈准抵項入官地畝將每年所得租銀分作十二個月按每月利銀一分一釐計算作價抵項。十年六月奏准各州縣收管入官地畝錢糧有交送戶部者亦有交送內務府者不能畫一將此項錢糧概令交送戶部由戶部將收過數目仍知會內務府。乾隆四年十一月戶部奏准入官地畝

分爲四等作價頭等地每三十畝作價銀四十八兩二等地每三十畝作價銀三十八兩
三等地每三十畝作價銀二十八兩四等地每三十畝作價銀十八兩荒地每三十畝作
價銀十二兩 二十二年十二月戶部具奏現今存退餘絕地有三千二十八頃零應酌
留地一千頃存爲撥補官用其餘地畝請仍照從前安放莊頭之例會同內務府派員同
地方官查明堪以當差地畝由內務府酌量安放莊頭再嗣後凡有入官地畝交與該旗
查明原業原收租數行令地方官照數徵收按年解交戶部等因奉旨依議其入官地畝
交該旗查明原業原收租數行令地方官照數徵收之處此等地畝以加惠小民而論即
租額再爲輕減亦無不可但向來官地租額雖輕而民佃多不沾實惠蓋地租一項既不
在官又不在民則不肖官吏轉得視爲利藪該部請照原納租數徵收自爲杜絕弊端所
議是但旗人原收租數或係市平市斛而官爲納收勢必用庫平官斛則租數雖屬相符
而貧民所加已屬不少嗣後入官地畝地方官照原數徵收著即照原收平斛令其輸納
庶俾承佃各戶交租不致畸重而官吏不致中飽矣欽此 三十四年軍機大臣會同戶
部等衙門奏准嗣後各旗報出入官地畝毋庸另委旗員即由該督於戶部文到之日飭

司遴派委員會同該地方官履畝詳勘傳齊佃戶問明原租額據實約定出具印勘冊結由該管道府覆覈加結送司覈轉該督覈實咨部入冊輸租如有聽囑受賄減租情事一經發覺除地畝不准承種外仍將原佃照欺隱田糧律治罪其委員及地方官並加結各上司俱嚴行參處凡近年入官地畝原辦之地方官現任該地方勒限半年令其自行查明檢舉更正如入官年久原辦地方官已經去任者卽飭令現任州縣於一年限內詳查從前入官定租案據確查鄰地租額及現承種佃戶自行首報內除所議租數與原租鄰租相符者毋庸議外其有照原租短少及比鄰租輕短者俱令比較確實酌覆原租具詳府道藩司覆覈造冊由該督咨部徵收其遵例檢舉之州縣自首之佃戶免其議處治罪如不依限首明卽將地畝追出不准承種仍治以欺隱田糧之罪並將該州縣嚴行查參仍嚴禁胥役人等不得藉端需索違者從重治罪其官地內儻實有城薄不能按照原租輸納者許其據實呈報委員勘實申報該管道府覆勘實在情形由司覈詳該督酌定減租若佃戶等有因照原額輸租不願承種者准將地畝退出另行招佃輸租再查直屬官地除回贖民典奴典旗地業經查照原業租數酌定租額毋庸另辦外其餘如存退餘絕

一切官爲徵租之地亦恐不無輕短之弊應均令統照此例責令該督轉飭各屬覈實辦理以歸畫一將此文該督八旗內務府一體遵照辦理 三十九年五月戶部奏准乾

隆四年招買公產旗地定例按租作等按等定價每畝租銀三錢以上者作爲頭等定價銀一兩六錢每畝租銀二錢至二錢九分者作爲二等定價銀一兩二錢六分六釐每畝租銀五分六釐至一錢九分者作爲三等定價銀九錢三分三釐每畝租銀五分以下者作爲四等定價銀六錢自此以後八旗人等遇有拖欠公項不能自行變交願將本身地畝報抵入官者即照認買公產之例按租作等按等作價辦理抵項查今戶口蕃滋人多田少地價頓增數倍若按照從前按租作等實有原買千金之產以之抵帑不及十之五六應請嗣後八旗官兵人等凡有將地畝報抵入官者無論典買均有原置契據逐以據實呈報計租定價統以一分三釐之息爲斷如所報地畝其租銀得一百三十兩者准其抵帑一千兩租得銀二百六十兩者准其抵項二千兩 嘉慶十七年八月戶部奏准原

例內載八旗應行入官地內有墳園祭田數在三頃以下者免其入官若在三頃以上者

除給還三頃外餘地悉行入官查旗員入官地內有墳園祭田數在三頃以下既准免其

入官漢員遇有此等案件事屬相同亦應一體准免請將原例查明修改以昭畫一。道光十年七月本府奏准查抄英和等入官地畝五百七十一頃六十二畝七毫自應遵照前奏另擬章程免至日久廢弛查本府會計司所屬莊頭向設有六百四十餘名每歲所徵錢糧供應一切差務嗣因歷次分府以及欠差革退今僅有莊頭四百四十餘名查分府園頭每遇撥用缺額向有隨時按名補額之例所有現在收得地畝擬請照分府園頭隨時按名補額之例將現有地五百七十一頃六十二畝七毫儘數編定等第計可得二三四等莊頭二十五名計差交課每年共應交差課銀七千餘兩俾其照例輸將似於補額增課兩有裨益並附片奏准嗣後莊園人等遇有歉收應請仍照嘉慶四年以前民地被災之例辦理一分至四分不准減免錢糧旗民地畝毗連若有虛捏妄報等弊別經發覺不但將該莊園人等從重治罪並將不實力詳察之地方官嚴參示懲

派給管領下無田地人口糧

初各管領下無田地人年十歲以上爲一口五歲以上爲半口每月每口給糧一斛斗每半口給糧半斛斗於莊頭等所報糧內派給。康熙元年二月奉旨各管領下無力耕種

田地者將田地收回交各管領給與本身口糧奴僕不准給糧欽此 是年二月奏准有
丁一二名不能耕種田地者准給口糧有願領田地者給與田地耕種若三丁以上者令
其耕種田地不准給與口糧 五年四月奏准各管領下領種田地者不准將田地繳回
令其永遠耕種 二十三年二月奏准各管領下無田地人之口糧停其於莊頭所報糧
石內派給每糧一斗折米五升向戶部支領 五十六年六月奏准無田地人口每月應
給口糧歸併錢糧米檔內支給 雍正六年八月奏准有俸餉米石之官員栢唐阿蘇拉
匠役人等既食俸餉又給口糧未免重複應將伊等口糧裁退其未食錢糧之男女及幼
丁女子並平素勤勉差務因老病退差人役等仍給口糧 乾隆二十五年六月呈准向
例每年張家口外遊牧處馬駝羣牛羊羣送到該處牧羣蒙古等支領口糧檔冊會計司
將添裁家口數目查對相符呈明咨行戶部今據管理三旗牛羊羣總管呈查三旗牛羊
羣現有內府二十八管領下無地畝奴僕食官糧人大小家口一千七百六十三名伊等
一年所領口糧按倉石合計五十餘石此項人等俱散住各羣與察哈爾人等一體看羣
當差伊等家口添裁數目每年於十二月內各協領詳查造冊呈報到日由總管處咨行

慶豐司其次年口糧於張家口直隸萬全縣縣丞衙門衆蒙古等前往支領但此項檔冊自本處咨行該司之後並無回文其如何轉行地方官並地方官如何放給蒙古等能否如數關領無憑可查等因請嗣後將此項冊檔咨行戶部轉行直督交與該地方官將米石妥協預備並將支領米石檔冊送萬全縣縣丞衙門知會該總管處由總管處委員出給鈐押關防印領領取到日再行放給復將蒙古等一年整口半口得給米石數目查明咨覆到日轉交該總管處存案備查又查向例馬駝羣牛羊羣總管處支領口糧檔冊由上駟院慶豐司咨送掌關防管理內管領事務處轉交該管領下造具清漢檔冊移送會計司將家口數目查對相符轉咨戶部請嗣後該院該司視此項支領蒙古等口糧檔冊咨送到日徑送會計司交該管領下造具清漢檔冊保送查對相符即行咨送戶部以免耽延所有定擬之處由戶部轉飭地方官遵照交慶豐司轉咨該總管處一體辦理

絕嗣產業

康熙九年十月奏准各佐領管領下絕嗣產業除無奴僕者不議外凡有奴僕田地者俱派人二口給田五晌仍歸併本佐領管領下令其看守伊主墳墓其有奴僕無田地者止

派奴僕看守餘者該部收管其有親女者亦派守墓人二名給田五晌至內府三旗人等雖分各佐領管領下俱在內府數內其絕嗣產業儻有親女親姊妹告理者除派守墳墓人二口並田五晌外其餘人口田產交該佐領管領按數分給親女二分姊妹一分若無親女而姊妹告理者除派看守墳墓人二口並田五晌外其餘在同佐領管領下者將家產奴僕一併令其承受若在別佐領管領下者將奴僕器皿等項令其承受其田產業房屋交與該部 雍正十二年八月戶部奏准從前已經繼立異姓爲嗣者毋庸再議外嗣後如有絕嗣之人繼立異姓親屬者令該旗取具兩性情願甘結並該管參領佐領及族長保結送部存案如無兩姓甘結及該參領佐領族長等保結者不准繼立其所遺家產仍照舊例辦理 乾隆二十五年四月戶部咨准嗣後八旗絕嗣地畝內如無遠近族人遺有親女者地至數頃仍照例七分入官三分留爲祭掃外如地止一頃以下即給與伊女地三十畝以爲祭掃之用不及三十畝者全行給與以昭畫一通行八旗內務府一體查照辦理 三十九年正月戶部奏准繼子承祀自應按照昭穆次序擇立應繼之人或應繼之人係例不出繼之獨子或平日先有嫌隙則擇賢擇愛聽從其便其有本非所愛

而族中希圖財產勒令承繼慫恿擇繼以致涉訟者地方官立即懲治仍訊明所愛之人斷令立繼至繼後不得於親亦准其告官別立又已故之子或係夭亡未婚者自當先儘故子同輩中按照服制次序仍爲其父立繼不必再爲幼子立繼若闔族中實無故子同輩可爲其父立繼之人亦祇得爲未婚之子立繼至子已婚而故其婦又能孀守並已聘未娶其媳能以女身守志者均應爲其子立繼若其婦雖未能孀守而其子之當立者自在似亦仍爲其子立繼再如其子雖未經聘娶而因出兵陣亡亦應爲之立繼以示體恤若支屬內實無昭穆相當可爲子立繼亦應仍爲其父立繼又大宗無子不可將小宗之獨子以爲後於同宗昭穆內次序相當者另行議繼若族中實無相當可繼之人應俟小宗獨子生有二子過繼一子以爲大宗之孫儻獨子並無所出或僅生一子則當於同族孫輩中過繼一孫以承大宗宗祀

清查旗民地畝

初各佐領管領下人及莊頭等與民人互相控告地畝等案會計司呈明除派司官一員移咨戶部領取部劄會同該地方官審理定案後仍由會計司呈明將原劄繳部 嘉慶

十七年八月戶部奏准旗婦控理田土房間無抱呈者照例不准外凡抱呈而控屬虛誣者罪坐抱呈 旗人圈地及契置地畝界址不清爭控到官地方官眼同地隣勘丈明晰有多餘地畝在四至以內與原地毗連者准其管業其隔斷另塊不與原地相連者仍撤出入官再內務府莊頭王公府莊頭所領差地四至以內丈有多餘即令該莊頭加交差銀如在四至以外有多餘者仍照例撤出入官 旗人將祖遺及自置田房典買與人不將原契跟隨或捏造民契過稅出賣後本人物故其子孫恃無質證執持原契控告者審實照契價計贓以訛詐論有祿人加一等大糧莊頭及旗人看墳管地家奴如係在屯居住實無養贍呈請撤地承種者查明實係莊頭親丁以及在檔家奴與本村居住在十里以內者准將該地按畝撤給三成作爲養贍不准全行撤出其撤地原佃如將地畝全行撤出准在未曾撤地各佃名照前成數撥補勿使失所儻撤地後承種一二年另佃與人一經控發仍照奪佃戶例斷給原佃承種並將呈請撤地之人治罪 旗人現買地畝實係新立墳塋佔用地畝若干准其向佃戶撤地外其餘地畝仍租給原佃承種儻撤地後並不立墳另行招佃者仍照奪佃例辦理

派除看管麥田莊頭

瀛臺麥田由會計司派莊頭一名值年看管

咨領內用米糧等物

內用米糧蜂蜜蠟燭鹽斤原屬米鹽庫管理 雍正三年十二月奏准裁汰米鹽庫將內用三色老米水稻黏稻蜂蜜蠟燭鹽斤俱歸併官三倉管理官三倉值年內管領每年將應用米糧蠟燭鹽斤數目移付會計司呈明轉咨戶部支取年底將收用餘存數目造冊移送查覈題銷 六年四月奏准將各寺廟所用白蠟俱換用茜紅柏油蠟茶飯房等處所用黃蠟俱換用羊油蠟 七年十二月奏准官三倉每年收用餘存水稻黏稻鹽斤蜂蜜數目值年內管領造冊移送查覈於次年六月內題銷其收用餘存三色老米黃白蠟燭柏油羊油蠟燭數目值年內管領造冊移送查覈於次年八月內題銷 乾隆二年四月奏准壽皇殿等處供用白米及宮內女子並侍衛栢唐阿飯房景山南府食用白米仍用白米外其餘喇嘛太監和尚道士養心殿太監栢唐阿匠役及咸安宮教習學生各處栢唐阿匠役辦道場所用白米俱行改給粳米每用白米一石之處改給粳米一石二

斗五升 二十七年六月戶部奏准內庭等處應用羊油柏油蠟隻交內務府辦理 是年七月內務府奏准嗣後羊油柏油蠟隻即交與官三倉值年內管領等支領廣儲司銀兩按時價節減採買散給各處應用至宮內等處所用黃白蠟隻仍照例著戶部顏料庫辦理 四十三年九月呈明官三倉雜糧等項嗣後請交會計司辦理官三倉蜂蜜鹽斤粳米江米並雜糧黃白老米蠟隻等項題本俱照廣儲司藍冊部項之例每三個月一次將細數造冊具稿送堂銷算存案俟一年題銷之時仍將三個月一次銷算細數清冊彙總覆加查覈

緣事閹割

道光十二年十二月總管內務府大臣博啓圖面奉諭旨嗣後遇有緣事閹割太監著照撥換定例辦理欽此 十三年七月奉旨刑部覆奏辦理逆案緣坐犯屬嗣後反逆案內律應擬凌遲之犯其子孫訊明實係不知謀逆情事者無論已未成丁均著照乾隆五十四年閹割之例交內務府閹割發往新疆等處給官兵爲奴其年在十歲以下者令該省牢固監禁俟年屆十一歲時解交內務府照例辦理並著內務府大臣遇解到閹割人犯

即遴派司員認真看驗並出具無弊切結送交刑部刑部堂官於該犯送交後即派司員再行覆驗如有情弊卽回堂奏參總須查驗明確再交兵部發往新疆給官兵爲奴此次臺灣逆匪張丙等家屬卽著遵照辦理並著內務府刑部存記遇修例時纂入則例欽此

旗民結姻治罪章程

道光十六年四月戶部遵旨奏准嗣後八旗內務府三旗旗人內如將未經挑選之女許字民人者將主婚之人照違制律治罪若將已挑選及例不入選之女許字民人者將主婚之人照違令治罪其民人聘娶旗人之女者亦一例科斷

按摩人役事宜

道光十八年七月本府具奏請將按摩處現設頭目二名照舊留作教習其學業人十名內裁去六名酌留四名肄業以備接挑教習應添學習剃頭太監卽於會計司招募太監內擇其年歲可以學習者挑選數名令其在外常川學習如果手藝嫻熟再爲聲明交進若學習無成仍入招募數內交進其每月月銀由本府加賞太監錢糧項下每名給銀二兩應得口分等項與現留人役六名一體照例向各該處領取至掌儀司衙門向有太監

承應差務處所此項學習太監即令歸併一處棲止並責成該處首領照管俾一切有所稽察等因一摺奉旨會計司招募太監內擇其可以學習剃頭者著在會計司棲止餘依議欽此

發遣釋回太監不准挑選首領

道光二十年四月奉旨嗣後宮內圓明園各等處應挑首領之太監著該總管等詳加查覈如有曾經發遣吳甸打牲烏拉黑龍江釋回者概不准列名挑選併著總管內務府衙門詳加查對如有曾經發遣朦混挑選者指名參奏欽此

欽定總管內務府現行則例

會計司卷四

咨領栢唐阿太監匠役等錢糧

康熙四年六月奏准內府三旗佐領管領下栢唐阿太監匠役人等應領錢糧由該佐領管領具結移送會計司呈明咨行該旗轉行戶部領取 雍正元年七月奏准內府三旗佐領管領下栢唐阿太監匠役等應領錢糧令該參領佐領管領查明造具清冊移送會計司查覈彙造總冊呈明咨行該旗由該旗鈐用印信轉行戶部領取 乾隆十三年五月戶部奏准嗣後各旗錢糧冊檔仍照例以每月十五日作為送部定限其下月應領錢糧冊檔務於上月十五日送部或因一時查造坐扣等項頭緒紛繁不能依限造送即將必應展限緣由確實聲明咨部准其展限五日再已經送部冊檔如有舛錯等項即行傳令該旗承辦章京赴部領回更正亦不得逾五日之限統以二十日為率若有遲至二十日以外送部者即將該旗承辦各員照例查參 是年閏七月兵部咨准條例內府三旗栢唐阿校尉匠役太監等銀米俱由內務府造冊其下月應領錢糧米石餉檔於上月初十日以前咨送該旗查覈用印咨部關領 是月呈准嗣後內務府造具兵丁栢唐阿人

等支領錢糧米石檔冊交與三旗參領於咨送檔冊之上月二十五日以前即將檔冊造妥凡二十五日以前有添裁錢糧米石文移准入檔冊添裁二十五日送到文移均令入於下月檔內造送其催送此項檔冊交與三旗參領於二十五日起至二十七日此三日內催全送赴都虞會計二司如逾二十七日不將檔冊催全送至該司即將送檔逾限之處報堂將承催送檔之該參領佐領內管領等記過外其辦理檔冊領催等即令該參領等查明送堂處治 十五年五月戶部咨稱官員代扣俸銀既經一體展限兵丁人等錢糧遇有代扣之項亦令一體辦理并通行各該旗處嗣後官員兵丁人等如有代替他人坐扣之項凡遇隨圍俱展限坐扣畫一辦理 十七年二月奉上諭向來八旗甲米俱按四季支放但放完之後因去下屆放米之期尙遠舖戶得以乘機囤積米價日漸昂貴若將甲米陸續支放俾源源接續殊有裨益但就一季之中再爲分撥支放未免紛繁其應如何酌派旗色按月輪放之處妥議具奏欽此 是月內閣奏准酌定鑲黃正黃二旗於正月四月七月十月支放正白正紅鑲白三旗於二月五月八月十一月支放鑲紅正藍鑲藍三旗於三月六月九月十二月支放自四月起下季應領米石照此按月輪放 二

十九年八月戶部奏准嗣後若放三成錢文之月將一成錢文俱於初一初二等日同一成餉錢一齊搭放將此文八旗等衙門遵照辦理 三十六年四月奉旨凡隨圍官員兵丁等乘騎官馬內有倒斃者每馬賠補銀七兩勒限兩月交納戶部官員等各有俸祿於限內賠補伊等之力尙能兵丁等每月所得錢糧無幾亦與官員等一體兩月限內賠補未免拮据於伊等生計無益嗣後官員等倒斃官馬仍於兩月限內賠補兵丁等倒斃官馬著施恩由伊等應得錢糧內每月坐扣銀一兩完結著永遠爲例欽此 四十年十月奉上諭八旗兵丁甲米閏月例不支放向雖特恩賞給並非常例第念京師五方雜聚食指浩繁兵丁所得甲米饗殮自給之餘或將剩米出糶尙可潤及閭閻數十萬戶仰資其利現在閏月例無應放之米兵民口食未免拮据著加恩賞給閏月甲米卽於本月十五日開放其十一十二兩月放米之期並著移於每月十五日明歲新正以後仍循其舊則禦冬度歲更得饒裕市價亦可藉以益平於兵民生計均有裨益嗣後凡遇閏月俱照此一體賞給甲米俾各永沾實惠著爲令該部遵議速行欽此 四十三年三月戶部奏准閏月米石欽遵永爲定例謹擬四條 一所有本年閏六月一個月米石應令八旗另

行造冊於前六月十五日過部作爲定限由戶部覈明即於閏六月初一日劄倉開放其一切支領裁除均以過檔之日爲準分別覈辦 一本年閏六月一個月米石既定每月新挑兵丁及食週年半餉之孀婦人等如在過檔定限以前者應准其支領如在過檔定限以後者概不准其支領 一閏月米石既以永爲定例其支米冊檔自應仍由各旗覈轉送部查辦 一閏月米石既爲定例自應仍令該侍郎照四季甲米之例預期查明應放倉口報部辦理

應給閏月米石

騎饒校 前鋒校 護軍校 前鋒藍翎頭目 委署步軍校 裁汰副護軍校裁汰副

驍騎校 兵丁補放貼寫筆帖式 兵丁補放印房筆帖式 兵丁考取教習 原品休

致食整錢糧半餉護軍校驍騎校 前鋒護軍 領催 披甲弓匠木昆達 弓匠 門

甲 聽事人 步甲領催 步甲鐵匠 未食完四季米石之週年寡婦 永食錢糧寡

婦 鰥寡孤獨 食一兩各匠役 食二兩錢糧打牲各項栢唐阿 守庫亭渡吏守清

河倉通倉領催披甲 各部院鞭子手傳事人 寡婦幼丁 圓明園護軍校 護軍

健銳營護軍校前鋒

不應給閏月米石

各部院筆帖式閑散考取貼寫筆帖式 庫使外郎 佐領副尉步軍校等隨甲 革職

官考取教習 食完四季米石週年寡婦 咸安宮學生

四十五年十一月戶部奏准奉上諭朕從前有旨將直隸旗租銀仍賞給八旗兵丁經部議挑選八旗兵丁中差使勤慎者賞給兩月錢糧以示鼓勵今思一人得兩月錢糧亦不能立家產不過隨手花費而不得賞者未免向隅且分別挑選該管官員不無瞻徇出入之弊殊非朕普惠八旗兵丁之意嗣後著將直督解到銀兩足數普賞八旗兵丁一月錢糧時該部即奏聞普賞一次欽此查直屬乾隆四十四年分應得旗地租銀實解到三十八萬八千三百餘兩本年恩賞一月錢糧統計共銀三十七萬五百餘兩請即於此項解到銀兩內動支銀三十七萬五百餘兩普賞一次嗣後每年額徵旗租應令該督俟徵存候解之時將徵收實數先行報部覈明足數普賞八旗兵丁一月錢糧之時即行遵旨具奏 四十七年十一月呈准嗣後將每月辦理支領錢糧米石大檔自二十五日以後不

添不裁之例改至三十日所有各處添裁文移俱入現辦大檔添裁自初一日以後文移俱入下月大檔內造送其各佐領管領下每月限至二十七日全行造冊送司覈辦之例亦請改至下月初三日全行造冊送司覈辦仍於初十日以前咨送該旗轉咨戶部支領其各佐領管領下如有逾限至初四日送檔者仍遵照前例辦理 五十一年六月奉旨各處栢唐阿內惟上虞處預備弓箭傘處養鷹狗等處栢唐阿等每年隨圍差務亦屬近要此內除兼食護軍馬甲錢糧外所有食二兩錢糧栢唐阿差務較比馬甲差務繁要其所食錢糧反少於馬甲究屬不均今著加恩將食二兩錢糧栢唐阿交各旗俟本佐領管領下馬甲缺出令其坐補俾生計寬裕著爲例欽此 嘉慶十八年七月奏准太監等每月關支錢糧蒙恩著在廣儲司銀庫開欸下籌項將食二兩之太監等每月各加賞銀五錢今請於本年春季兩淮應交玉貢折價銀二十五萬兩著該鹽政存留十五萬兩交商按一分生息每年應得利銀一萬八千兩查現在各等處食二兩太監等共一千五百一十名每月各加賞銀五錢一年約用銀九千餘兩請於利銀解到時以一萬五百兩交廣儲司銀庫收存各該旗管領等按每月每名各加賞銀五錢赴廣儲司銀庫支領分賞其

賞餘銀兩仍交銀庫另欸存收年終具奏一次其餘利銀七千五百兩交納廣儲司銀庫歸款合計二十年所借本銀如數清完查恩豐倉歷年餘存土米現經奏准節飭約可得稜米八百餘石擬請以四百石交總管太監分賞各該處食二兩太監其餘米石暫存倉內以備明歲賞用再查恩豐倉收存放給各太監等米二萬石內蒙頭厰底進餘米五百五十餘石內除折耗約可餘淨米二三百石土米二三百石所有土米向係於存積較多之時奏明節飭一次交官三倉搭放嗣後請將此項土米每年節飭一次得有確數並所得餘米於年終奏銷後一併分賞各該處食二兩太監

領取交送官物人員馬匹糧草

盛京佐領處交送野牲果品等物及護送記名女子人員自到京之日爲始有品級者每員每日給白米二倉升無品級者每名每日給粳米一倉升跟役人等每名每日給粳米一倉升每本身馬一匹每日給豆四倉升穀草一束羊草一束其馱物之官馬每匹每日加給煮豆木柴二斤烏拉等處交送東珠等物人員均照前例給與白米料豆草束外每名每日加給煮飯木柴三斤本身馬匹每匹每日給煮豆木柴二斤由會計司將米豆穀

草數目及羊草按數折銀六釐五毫一絲合計數目呈明咨行戶部工部領取
乾隆元年三月奏准盛京佐領處送野牲等物來京人員馬匹其到京之日准給五日口糧草豆
停其在京領取每名每日口糧折銀五分每馬一匹每日草豆折銀五分預動盛京房租
銀兩給與 十九年三月呈准嗣後凡打牲烏拉處齎送官物來京之領催披甲牲丁人
等應得口糧木柴草豆毋庸都虞司呈堂復交會計司呈明行給視其人到都虞司止將
人數日期開明徑行移付會計司由會計司照例覈計應得數目呈明移咨戶部得給口
糧草豆工部得給木柴 三十五年十二月奉旨每年打牲烏拉處交送東珠官員牲丁
等俱係本身馬來京嗣後每年打牲烏拉處交送東珠官員牲丁等往返程途俱施恩酌
量賞給驛站乘載仍照例得給口糧再每年來之人數即照今年所來之數除派著爲令
欽此

添裁栢唐阿匠役人等錢糧

凡栢唐阿匠役人等錢糧已經咨送大檔後遇有應行添裁者俱入於次月大檔內補行
添裁 康熙五十六年八月九卿奏准官兵俸餉米石已造入檔內行倉者雖有陞轉不

准添補其病老告休物故者亦不令裁扣獲罪革退者仍令該旗移咨戶部裁扣 雍正十二年八月戶部奏准兵丁內有領過錢糧後革退逃走者其領過錢糧銀兩即按革退之日追繳其領過米石後一月內革退逃走者追交後三個月米石兩個月內革退逃走者追交後兩個月米石三個月內革退逃走者追交後一個月米石三個月以外革退逃走者免其著追米石 十三年十月奏准兵丁內有支領過錢糧米石後逃走者將多領過錢糧米石催追存各該旗庫每年三月內彙總繳回戶部 乾隆二年五月呈准遇有添裁錢糧者俱於每月十五日爲限如十五日以前付文到者准其彙入本月檔內如十五日以後付文到者不准彙入本月檔內 四年五月呈准栢唐阿太監匠役人等每季應得米石冊檔令該參領於支放米石之前一月二十日以前咨送會計司二十日以後如有付文添米石者不准趕得入於下季米檔內得給應裁米石仍交該參領等存倉本司於前一月初五日以前咨送各該旗 十二年四月戶部奏准官員俸銀俸米總以十二月十五日六月十五日兵丁人等錢糧米石總以上月十五日作爲過檔定限分別關支裁扣如官兵人等告休身故在定限以後准其支領銀米在定限以前不准支領銀米

是年十一月奏准嗣後逃走革退兵丁栢唐阿等應交錢糧庫銀等項銀兩務令該參領每月於支領錢糧之日即行催扣齊備出具印文移送該司驗看畫押封存由該司出具交銀咨文後仍交值月參領嚴飭派出交送銀兩之驍騎校將應交銀兩每月一次交送該旗存收即令該參領將該旗收付送司驗看如該司已經出具交銀咨文而該參領以及派出之驍騎校任意遲延不將該旗收付送驗該司即行查明延緩情由料理再嗣後兵丁栢唐阿等病故革退應繳錢糧等項三旗參領等務須按例確查明白出具印文呈報該司呈堂轉行該旗交納如將應交者不行交納不應交者任意造報令該司查明將該參領等料理如實無遺漏妄報等情亦行聲明該司存案 十四年九月戶部咨准各旗官兵人等在十五日以前十五日以後告休身故者例內原分晰明確確惟是適在十五日過檔之期告休身故者未經議定現在八旗錢糧奏明總歸俸餉處辦理其十五過檔之日告休身故官兵人等銀兩米石概不准支領應通行八旗內務府嗣後凡官兵人等適在十五日過檔之期告休身故者銀米概行裁扣畫一辦理 十六年十一月三旗滿洲都統咨准戶部定例旗人領催披甲以及各項栢唐阿人等如有告役前往外省者

給與路引執照前往儻逾限不回查出鞭責五十等因在案是兵丁告假逾限不回者既有處分之條每月所得餉銀理宜停止相應通行八旗轉咨內府上三旗嗣後各旗兵丁人等如有告假前往外省者儻限滿不回將次月錢糧毋得仍照從前入檔支領 三十年十一月呈准嗣後各該處當差人等如有滑懶應行革退者該處自革退之日起十日內行文會計司裁革錢糧米石如有逃走病故者該佐領管領下自逃走病故之日起五日內投報該處自報到之日起十日內行文會計司裁革錢糧米石如逾限辦理者查出將該管官員並承辦人等一併送堂料理再嗣後各該處當差人等如果係逃走該參領佐領行遞過逃牌者准用逃走字樣如當差滑懶者祇以當差滑懶革退裁汰錢糧米石未便含糊用逃走字樣又嗣後各處有新挑差者自挑差之日起於十日內行文會計司得給錢糧米石如逾限辦理者查出將該管官員及承辦人等一併送堂料理 三十九年十二月呈准凡報捐之人除鷹狗備箭等項栢唐阿仍在原差上行走聽候銓選不准開缺外至各管領下食一兩錢糧蘇拉與八旗養育兵無異如有報捐即行開缺請嗣後挑補此項蘇拉時秉公詳察如果家資饒裕概不准其挑補儻挑補後復有報捐者即將

該管領等指名題參仍將所食錢糧米石一併著賠

領取出差人員盤費

凡隨從出外栢唐阿匠役人等據各該處來文每名每日給盤費銀一錢三分俱由會計司呈明咨行戶部領取如有應繳回者亦由會計司繳回 乾隆十五年九月戶部咨准一切路費絲毫俱關帑項各該旗處應交應補銀兩今立定期嗣後各該旗處官兵人等支領路費務於回京之日起凡有應交銀兩定限四十日內查辦完結如逾限不行交納即將承辦遲延職名咨部查辦如有事故不能速領者務於文內將緣由分晰聲明方准補給各該旗處一體查照辦理 十八年正月總理行營王大臣奏准凡隨從之侍衛官員護軍栢唐阿人等所領路費回程之後計算如日期少免交如逾三日補行得給將此永爲定例遵行 是年四月值年旗奏准凡官兵人等隨圍以及出差所領路費銀兩向來該部並無關領定期嗣後各該旗處領銀之文到部三日即照數支給 是月戶部咨准查免交路費銀兩雖未指定日期但逾三日者既准補領則免交之項自應亦以三日爲准酌定嗣後凡有出差官兵俟回京之後扣明日期如所少之日在三日以內者將

領過銀兩免其交納外其所少日期在三日以外者仍照例催追交納二十五年三月

都虞司會同呈准嗣後凡遇巡幸所有各處派出隨往之外旗員役人等應得盤費等項

事宜

其批本處奏事處官員併諳達等隨圍應得盤費官馬詳都虞司則例

一喇嘛每遇隨圍伊等路費銀兩向例由會計司轉行得給但喇嘛係理藩院所屬伊等

路費自應呈報該院辦理不便行文內府轉行嗣後出外之喇嘛應得路費停其行文

內府令其自行呈報理藩院咨行戶部照例得給

一藥房民醫生每逢出外應得路費亦係行文會計司轉行戶部得給但查伊等餉銀係

太醫院自行該部支領並非行文會計司轉行其出外應得盤費亦應自行咨部支領

以歸畫一嗣後招募民醫生等應得盤費停其行文會計司令其自行咨部支領

一中正殿有外旗蘇拉筆帖式蒙古音律處有外旗栢唐阿營造司有外旗匠役每逢出

外遇有此等外旗之人中正殿蒙古音律處營造司行文會計司轉行路費但伊等俱

係外旗之人而應得幫銀又係該旗承辦惟盤費行文會計司辦理不能畫一嗣後停

其咨行會計司令其自行該旗辦理

現今蒙古音律處營造司隨圍栢唐阿匠役均派內府之人

是年七月都虞司會同呈准理藩院咨稱出外之喇嘛應得盤費並無辦過成例仍應內府循舊辦理嗣後出外之喇嘛應得盤費照依伊院所咨仍由內府移咨戶部得給

其照管經

馱向例派外旗披甲今呼圖克圖處改爲派伊徒門前往照管其應得盤費與達喇嘛喇嘛一體每日每名行給銀一錢 是月奉上諭八旗兵丁凡

遇派出差務在部支領路費銀兩原係按日支給之項設有在途病故者例應計日扣算追繳但念伊等因公奉差在途病故其中無力交還者居多嗣後凡遇出圍牧廠及一切差務如有在途病故者著加恩一概免其追繳永著爲例欽此 二十六年六月呈准自此次起嗣後凡隨從出外派出之茶膳房栢唐阿人等應得路費銀兩停其移付會計司即照上駟院等處之例由該處自行辦理得給再膳房人茶房人庫使庫守果房人等派出隨圍帶射布靶亦照上駟院等處之例自行委員帶射其養心殿造辦處中正殿念經處藥房南府景山學藝處管理喇嘛處廣儲司掌儀司都虞司營造司慶豐司掌關防管理內管領事務處所派栢唐阿人等應得路費銀兩仍由會計司彙總得給

派給道士口糧

康熙六十一年六月奏准藺溝冷泉廟道士四名給與口糧於附近糧莊處派給每名每

月給口糧三倉斗六升

領給嫗嫗等買乳婦銀兩

阿哥公主格格等之嫗嫗進內過八個月後應買給乳婦之處據宮殿監督領侍太監等傳出由會計司派領催一名會同該佐領管領下領催訪買其價銀不過八十兩將訪得乳婦價值若干之處令該佐領管領具保由會計司呈明移付廣儲司領給 嘉慶十年四月奉旨阿哥公主之嫗嫗八個月期滿向例由廣儲司賞銀八十兩今著加恩嗣後按每月賞銀十兩此次四阿哥八公主之嫗嫗已逾兩月即著各賞銀二十兩欽此

領取紙張筆墨炭斤

每年應領本紙一百張臺連紙一千張棉榜紙二千五百張於二月內呈明咨行戶部領取 每年應用水筆三百枝大筆一枝南紅紙五張銀硃一斤印色二斤墨二斤於十一月內呈明移付廣儲司領取 每年十一月初一日起至次年正月三十日每日應用燠硯炭三斤移付營造司領取

領取公費

每月公費郎中每員銀三兩員外郎主事每員銀二兩二錢筆帖式每員銀一兩呈明移咨戶部領取雍和宮後佛樓學經小道士十名每名每月公費銀六錢六分據道錄司道官報到會計司呈明咨行戶部領給所有領過公費次月呈明將上月原呈撤出移送戶部都察院江南道查對對訖仍繳回存堂收存 乾隆二十一年十二月戶部奏准將應領在京大小各衙門公費銀兩一體改給局庫錢文每銀一兩酌給制錢九百文按月關給 二十二年十二月呈准六品職銜委署主事每月公費銀二兩二錢行給大制錢一千九百八十文 五十九年十月戶部奏准將在京各衙門公費銀兩一體改給局錢每銀一兩酌給制錢一千文按月關給 道光二十五年七月本府呈准各司處官員等每月應領公費制錢向由各該處分稿呈辦殊繁案牘嗣後各司處應領公費制錢均著造冊送堂由堂彙總行領

咨送莊頭子弟考試

康熙五十五年閏三月奉旨莊頭俱係舊人伊等子弟亦著考試欽此 雍正十二年九月呈准凡壯丁內挑選安設之莊頭鈔入莊頭投充莊頭入官家人安設莊頭等之子弟

不准考試外其舊莊頭子弟內如有情願考試者由會計司對明丁檔移付掌關防內管領處轉咨該處考試 嘉慶十一年七月禮部奏准嗣後凡八旗戶下帶地投充莊頭毋庸論旗檔有名無名均不准其應試出仕再嗣後八旗及漢人家奴實有勞績服役已經三輩伊主情願放出者准其放出旗人則取具本主甘結加具參領佐領圖結報部存案民人則取具本主甘結報明地方官存案俟放出三代後所生子孫方准應試出仕仍照舊例外官不得至三品京官不得至京堂 道光十年四月本府議覆奏准盛京內務府三旗所屬應准予考試之棉靛鹽捕魚染皮鵬翎鶴翅王多羅樹打捕牲丁人等覈與本府各司各處所屬大糧莊頭園頭投充莊頭蜜戶葦戶灰軍渣軍炭軍及鷹戶省戶打補戶野鴨戶鵪鶉戶打狐戶鴉鶻戶牲丁等親丁名色相仿似應比照准其報考應由盛京內務府詳細酌覈編立冊檔照例辦理其該處不應考試之莊頭屬下壯丁既非正身旗人應照本府所屬革退莊頭園頭之子孫作爲壯丁不准考試之例一律辦理至所稱三旗所屬應准予考試之星尼等八戶各門下人丁及不准考試之投充看白喇嘛蘇拜等墳人大法寺香火人等本府遍查並無類此可以比照礙難覈擬應請由該將軍確切查明

自行酌定章程遵照辦理並將如何酌定之處咨覆本府以備查覈而免冒濫十二年
閏九月本府議覆奏准嗣後盛京內務府所屬已革莊頭之族中親丁如有投考報捐以
及置買地畝等事均由該管處確切查明丁檔實係正身親丁委無別有違礙等弊准其
照例考試捐納置買地畝至革退莊頭作爲壯丁者其本身及子孫均不准置買地畝至
其曾孫方准置買民產

遞送公文

凡咨行盛京山海關外等處一應公文呈明移咨兵部轉行遞至

栢唐阿領借庫銀

乾隆七年四月奏准支給內府三旗銀十五萬兩內除借給兵丁十一萬五千餘兩仍餘
剩三萬四千餘兩如將此借給內府三旗食一兩錢糧之人伊等所食錢糧無幾除每月
坐扣本銀所有餘剩實無濟於生計再食二兩錢糧人等內有官學生學藝人教習油畫
栢唐阿什幫栢唐阿伊等差使不甚勞苦概不准借給至內府所屬各處栢唐阿內有外
旗之人錢糧由該旗得給毋庸辦理外酌量擬定食四兩錢糧之茶膳房等項栢唐阿一

百八十三名食三兩之掌傘領班頭目等項栢唐阿三百三十一名食二兩之黏竿等處各項栢唐阿二千四百六名其食四兩之栢唐阿比視護軍領催例各借給銀二十兩每月扣本銀六錢食三兩錢糧之栢唐阿照披甲人之例各借給銀十五兩每月扣本銀五錢至十個月後找給之處均照護軍領催披甲人之例辦理食二兩錢糧之栢唐阿視披甲人遞減五兩各借給銀十兩每月扣本銀三錢至十個月後找借給銀三兩以爲接濟其借給此項銀兩利息均照八旗一體作爲五釐如有指錢糧認買官項房地者暫不借給俟伊等扣滿完項之日再行借給如有不願支借亦各聽其自便遇有陞轉入於俸餉檔內坐扣所借銀兩並坐扣之項俱於錢糧檔內咨行戶部辦理如借銀人內有病故年老告退者照原議豁免獲罪之人著落家產子孫賠償儻實無產業子孫不能賠還者該參領佐領管領查明具結將所欠銀兩邀恩一體豁免歲底將免過銀兩數目送部彙總具奏亦將利銀陸續抵還原項 十八年四月值年旗奏准向例兵丁人等關領庫銀並無一定日期今酌定嗣後支借庫銀左翼每月初九日右翼初十日支領 是年六月值年旗咨准戶部以各旗每月支借庫銀冊檔過部日期向無定限嗣後此項冊檔定於上

月二十日以前送部 二十八年三月奏准內務府護軍領催披甲人俱准借給庫銀其栢唐阿內如茶上人膳上人承應人庫使庫守養鷹狗栢唐阿亦俱准借給庫銀至學藝處栢唐阿匠役廚役等並未借過庫銀嗣後匠役廚役仍遵例毋庸借給外其學藝處栢唐阿請准其支借

幫助隨圍栢唐阿人等銀兩

乾隆十一年十二月奏准內府三旗各佐領管領下自食二兩錢糧至五兩錢糧應借庫銀人員共一萬一百有奇每次除派隨圍約計二千餘人今擬定食五兩錢糧之護軍校驍騎校所得庫銀十兩內各扣銀二兩食四兩錢糧之護軍領催栢唐阿等於所得庫銀六兩內各扣銀一兩六錢食三兩錢糧之披甲人栢唐阿等於所得庫銀五兩內各扣銀一兩二錢食二兩錢糧之栢唐阿於所得庫銀三兩內各扣銀八錢至匠役蘇拉等所食錢糧甚少毋庸坐扣外其應扣人員內如有從前指本身錢糧認買官房官地之人雖因伊所食錢糧不敷坐扣未准借給庫銀但伊等亦在應派隨圍之列與借過庫銀之人應行一體於找借庫銀之時由伊等錢糧內照數坐扣其坐扣此項幫助銀兩交各該參領

等由部領銀持赴都虞會計二司與該司官員各佐領管領等公同驗看如數坐扣將共扣銀兩數目呈堂註冊交廣儲司銀庫收存如遇巡幸附近地方隨往在數日之內毋庸給與外凡遇哨鹿圍獵等處經月之差其派出隨往食五兩錢糧之護軍校驍騎校每員各給幫助銀十兩食四兩錢糧之護軍領催栢唐阿每名各給幫助銀八兩食三兩錢糧之披甲人栢唐阿每名各給幫助銀六兩食二兩錢糧之栢唐阿每名各給幫助銀四兩食一兩錢糧之匠役蘇拉等亦入於應給數內每名各應給幫助銀二兩交該司預期覈明除派人數及應幫銀數移付廣儲司於此項銀兩內支取散給如有餘剩銀兩仍存庫內儻遇隨圍日期甚多量其所存銀兩多寡覈計添給如派出隨圍人內於領過幫助銀之後儻有緣罪不能前往者將所領銀兩追出給與頂替派出之人如果有本身承辦服制以及病故或不能動轉等情實係不能前往所領幫助銀兩業經置辦行李者免其追繳二十三年十二月具奏內府三旗栢唐阿兵丁人等幫銀與八旗兵丁人等一體於伊等領借庫銀內坐扣幫給因伊等領借庫銀內所扣銀兩不敷幫給自乾隆十六年以來陸續奏准由內庫領借其領借銀兩除交過所還外尙有抵還未完銀四萬一千四百

三十九兩今八旗抵還未完銀十四萬五千餘兩仰蒙豁免其內府三旗抵還未完銀兩應否從寬豁免並嗣後栢唐阿兵丁人等應得幫銀或動支戶部官項或另行動支內庫官項等因奉旨著寬免嗣後如有用項動支戶部官項欽此 二十六年六月呈准嗣後凡遇隨圍出外所有茶膳房上駟院武備院鑾儀衛御船處管船內管領處黏竿處蒙古音律處烏鎗處養狗處養鷹處養鵬處派出之栢唐阿人等應得幫銀俱令各該處自行辦理得給外其各司各處所派栢唐阿人等應得幫銀仍由會計司彙辦得給 二十七年六月奏准將內府所屬此次派出木蘭圍之栢唐阿人等數目行值年旗亦照現今武備院所奏將該院所屬內府牽駝人等所得幫銀與八旗兵丁栢唐阿人等所得幫銀彙歸一處詳細計算均勻分給之處一體辦理得給 是月值年旗奏准本年內府派出木蘭圍從前原給十兩幫銀之食五兩錢糧人等各添給銀九兩每人得給幫銀十九兩原給八兩幫銀之食四兩錢糧人等各添給銀七兩二錢每人得給幫銀十五兩二錢原給六兩幫銀之食三兩錢糧人等各添給銀五兩四錢每人得給幫銀十一兩四錢原給四兩幫銀之食二兩錢糧人等各添給銀四兩五錢每人得給幫銀八兩五錢原給二兩幫

銀之食一兩錢糧人等各添給銀二兩五錢每人得給幫銀四兩五錢 四十年二月奉旨綿字輩阿哥等又隔一輩其隨從侍衛官員等自應少加區別著交內務府大臣酌擬具奏欽此隨經奏准請嗣後綿字輩阿哥等出入派侍衛長一員侍衛四員由護軍統領派護軍校護軍七名如往陵寢行禮派散秩大臣一員侍衛長一員侍衛五員由護軍統領處派章京一員護軍校一員護軍十名內務府將除派人員併應行預備等項俱係減半得給以服舊制其分府阿哥以及小阿哥等位下應行預備一切自有該府侍衛官員自行辦理 四十六年二月奉上諭朕凡遇巡幸跟隨官員兵丁人等俱於起程之前得給路費如有日期多少又有補行交回支領之例但已得路費業經用過復行交回不無多增交納甚屬拮据嗣後官員兵丁領過路費銀兩定限五日無庸補領交回如在限外仍照舊例辦理欽此

內府三旗戶口幼丁冊檔

乾隆十四年三月呈准內府三旗三十五佐領三十管領下幼丁至三四歲入檔者有之至十餘歲遇比丁年分始行報明入檔者亦有之均無實據嗣後各佐領管領下人等凡

有生子者即令報明該管佐領管領填註戶口檔冊於每年歲底該參佐領內管領等將一年所添幼丁逐一詳細查明造具鈐押關防圖記檔冊送司存案以備考查迨至成丁遇比查年分即行造入丁檔移送會計司按照從前送到幼丁檔冊詳加查對其中如有遺漏冒入一經查出除將該參佐領內管領等送堂料理外仍將承辦領催等傳赴會計司重加懲治 四十五年九月呈准查八旗男女戶口冊檔每年添一歲者該佐領各造冊一分咨送稽查旗務御史存查遇比丁之年各佐領管領下將所有人丁不論有無錢糧已至十六歲者載入冊內咨送戶部存收每歲如此辦理內府三旗各佐領管領下錢糧俸祿俱造冊咨送上三旗查對至戶口冊檔亦應照八旗冊檔式樣將所有人丁內年至十五歲以上男丁該佐領管領各造戶冊一分移送會計司存案備查外此後遇比丁之年據實造冊移送其戶口冊檔亦照八旗冊檔交該佐領管領各造具一分咨送御史衙門備案此後如有更改之處令其更改一年一次造送儻有舛錯不清一經查出必將該佐領管領等題參

乾隆十六年四月管理八旗事務王大臣議定各旗應行旌表之節婦內有夫亡守志公姑年邁無倚婦兼子職侍奉終養或宗祧所係藐孤獨子撫育有成以綿嗣續或爲匪人所迫堅志不移捐驅殞命卒能保全貞節者仍咨部得給建坊銀兩外其尋常守節之婦年例相符者按十五年三月禮部奏准祇有請定字樣給匾並未捐帑製匾得給不便動支官項應遵照十五年九月欽定清標彤管四字刊布八旗各依成式另行殺青收存該旗印房嗣後各該旗凡有尋常守節之婦年例相符者即照此格式摹搨鈐印本旗印信贈與本家聽其自行勒匾 二十七年七月禮部奏准舊例旌表貞節無論旗民俱以年至五十歲以後爲例惟八旗未婚貞女自雍正四年以後悉當時奏請旌表未免旗民之例互異嗣後八旗未婚貞女俱照民婦三十歲以前守節至五十歲以後完全節操者該旗查覈實行取具親戚該管官保結送部彙題其有在家守節病故者雖未符年例而立志已屬可憫無論年歲該旗覈實報部即行題請旌表 是月呈准向例受聘未婚女子守節由掌儀司辦理當時具奏得給養孀婦錢糧米石其旌表之處由禮部具題行文戶部即行得給建坊銀兩嗣後此等女子俟年至五十歲以後由該參佐領管領等保送會

計司與三十歲以前苦志守節婦人一體彙總呈明徑行禮部俟歲底由禮部題准咨覆到日交該參佐領管領等造具關防圖記冊檔移送咨行戶部領給建坊銀兩嘉慶七年二月禮部奏准嗣後守節之婦年雖未及四十按其守節已歷十五年身故者准其一體咨部題請旌表

盛京內府選補員役

乾隆十八年五月呈准嗣後盛京內府三旗凡有頭目栢唐阿缺出停其行文京城內務府衙門由該處內務府大臣即以應補之人補放盛京三旗承催莊頭錢糧催總缺出於本處筆帖式庫使佐領下領催內揀選筆帖式庫使缺出於考取入筒人員內掣補佐領下領催缺出以栢唐阿領催調補栢唐阿領催缺出於披甲人內挑補嗣後毋庸出具考語移送京城內務府如考試筆帖式庫使仍照例行文內務府會計司呈明請題封送兵部轉發該處考試

行給覺羅錢糧

乾隆十八年三月戶部奏准定例閑散覺羅年至十八歲者月給二兩錢糧米石但伊等

陞任外省有子弟隨任者應否給與例無明條酌定嗣後覺羅內有陞授陵寢地方以及盛京等處官員其隨任子弟准照在京之例支領其餘陞授各省覺羅攜帶子弟隨往任所者即將月給錢糧米石停其支領俟回京後報明旗部再行照例給與

太監和尙喇嘛錢糧

乾隆十八年十一月奏准嗣後萬善殿太監和尙缺出仍照舊例行文禮部交五城僧錄司招募送內府揀選交總管太監驗看充補再向例慈寧宮暢春園等處太監和尙所食錢糧米石俱由各管領下行領惟萬善殿太監和尙所食錢糧米石向由禮部行領今萬善殿太監和尙統歸總管內務府大臣管理其所食錢糧米石亦交與各管領下一體得給凡各處新補太監和尙由會計司著派管領行給錢糧正副首領太監和尙每名每月各食錢糧銀三兩米一石太監和尙每名每月各食錢糧銀二兩米一石十九年正月奏准嗣後大西天經廠額設太監喇嘛照萬善殿太監和尙之例如遇缺出行文禮部招募咨送內府揀選交總管太監驗看充補其所食錢糧米石亦由內府行領

咨送交項銀兩

乾隆十九年六月呈准嗣後內府一切交項銀兩停其齎交旗庫俱令值月參領等按限催得交送都會二司由司按限彙總呈堂鈐用堂印文批一面交部一面造具文冊知照該旗如有應行查催之項由部徑咨內府查催俟查辦完結咨部之日知會該旗以備查覈是月都虞司會同呈准除一應交回戶部之項向例由內府徑行咨交者毋庸置議外其應交月餉銀兩嗣後亦停其咨送該旗暫存旗庫俱由內府出批徑行交部照送部冊檔另造一分並將戶部收記之處知照該旗查覈至逃走栢唐阿人等按日應交餉銀按月抵折米石銀兩由旗領回存收內府俟次年三月彙總咨交之時由內府出批交納嗣後著該值月參領等照依定限催得銀兩送司存收由司呈明鈐用堂印咨批之日將銀付與交銀之該驍騎校會計司仍另委筆帖式一員一同赴部交納再凡係交銀之案儻有遺漏舛錯逾限查出即將該值月參領並佐領管領等送堂記過是年八月呈准嗣後交部餉銀於戶部收訖知照該旗之日即將收銀回批一併咨送該旗查驗俟該旗於歲底奏銷之時令該旗出咨將原批繳送內府二十年正月值年旗咨准各旗處查辦交項銀兩每年俱於十二月內題銷嗣後內務府所屬人等如有應交之項催交後所

得批文謹慎存收於每年十一月內彙總若干張出具印文咨送辦理完結後仍行送回內務府存收所有內府三旗栢唐阿人等應交銀兩催交戶部後所得回批每年俱於十一月內彙總咨送上三旗滿洲都統查辦二十三年十二月都虞司會同呈准嗣後應交各項銀兩仍由該值月參領等嚴催各佐領管領等定於每月十六日起限五日內催齊令各該佐領管領下驍騎校副內管領親身持銀赴司交納由司發給實收交付該解官持回送值月參領處查驗限內全行催齊交完者該值月參領處即行出具交銀文冊送司由司呈明咨交戶部如有逾限不交者將該值月參領等遲延至十日交納者報堂記過二次二十日不交者遞加記過至一月者即行揭參該參領等一面報堂記過知會會計司一面仍嚴行催交如該值月參領等瞻徇不行辦理者查出即將值月參領等送堂分別記過至官員應交一切銀兩仍遵定例辦理

移送查覈

凡題奏咨呈事件每月二次造具滿漢清冊移咨稽察內務府事務御史衙門查覈乾隆十九年三月呈准嗣後凡由堂撤取每月支領公費出差人役盤費一切戶部銀兩年

例紙張及領用交回蠟燭等項原呈由該司印篇送堂撤出移送都察院江南道查對對
訖仍將原呈繳堂收存撤回印篇銷毀 二十一年八月鴻臚寺咨准嗣後在京文武各
員有奉特旨及議叙加級紀錄者令各該衙門開列職名移送鴻臚寺照例定期傳令各
該員謝恩此內各員如有患病丁憂事故不能依限赴寺者京員由該旗及該衙門知照
該寺外員即令該員呈明鴻臚寺查覈准其補行謝恩如無故逾限不到者鴻臚寺自行
查參 二十九年十月戶部奏准倉放米石照三庫支放銀緞顏料各項一例查覈嗣後
各該處將實領米數造冊並原稿於下月初十日內一併送江南道查覈 是年十二月
都察院奏准嗣後各該處將由倉領過黑豆麥子隨同米石一體造冊並原稿俱於下月
初十日以內一併移江南道查覈 是月呈准內府三旗栢唐阿人等四季領過米石係
各該旗參領處造冊撤稿送江南道查覈派給上駟院慶豐司掌關防管理內管領事務
處各廐黑豆倉米係該司院處造冊官三倉所領黃白老米麥子等項係掌關防管理內
管領事務處造冊具移文撤取會計司呈稿交該司院處送江南道查對對訖繳回仍送
堂收存存案 三十二年十一月稽察內務府事務御史衙門咨准嗣後各司院等處務

遵新定章程將每日所有收發事件摘叙漢字事由註明日期並移會何處即造具印文於三日內移送查覈至每月應送註銷印冊仍照舊例註明收到並完結日期按限移送磨對

三旗無力回贖地畝

乾隆二十一年七月奏准內府三旗無力回贖地畝租銀向例俱由各州縣徵收出批徑解內府收清之後於原批內註明鈐印批回並不知照直隸總督嗣後凡有各州縣出批徑解內府一切地畝租銀收清之後一面仍於原批內註明鈐印批回外一面知照戶部轉咨直隸總督飭交布政司衙門存案備查凡會計司所屬莊頭名下撤出退出並內府餘絕入官各項地畝俱交州縣徵租解交戶部惟內府三旗無力回贖地畝由各州縣徵租批解會計司彙總轉交廣儲司銀庫收存

旗人典買地畝

乾隆二十一年十一月戶部奏准除將八旗地畝凡典賣於民者仍照例彙入民典旗地案內辦理外其在康熙年間將房地典賣與旗人者概不准控贖並請嗣後凡契典房地

俱令報明各該佐領鈐用圖記將價銀一併登載旗檔回贖時仍報明各該佐領銷檔

三十三年二月軍機大臣會同八旗都統等奏准嗣後旗人地畝如有遇事情願典當者令其報明該佐領登記檔案以備日後回贖之時考查設有得價豐饒情願賣出者不拘旗分准其買賣在左右兩翼稅務衙門納稅不許私立文約儻有違例私立契紙隱匿等項情弊將兩造照例治罪 三十五年七月戶部奏准嗣後旗民人等典當房地契載年分統以三五年以至十年爲率仍遵舊例概不稅契年分滿後聽原業收贖如原業無力回贖聽典主執業或行轉典悉從自便儻立定年分以後仍有不遵定例於典契內多載年分者一經發覺追交稅銀並照例治罪凡從前典契載有二三十年至四五十年以上者統限於三年內令各現在典主在旗則首報佐領在民則首報地方官即令改典爲賣一體上稅免其治罪如有藐法行私匿不首明者儻經查出即照漏稅之例罰典價一半入官仍照違禁例懲處 四十六年五月軍機大臣奏准嗣後旗員及閑散家奴人等置買房地概令呈明該管領按旗在左右兩翼監督衙門納稅過契如在縣投稅請領契尾並該縣私准納稅者均照違制論該旗官員並該縣俱交部議處其閑散家奴俱鞭責

發落仍勒令其兩翼監督衙門補稅換領執照並令步軍統領衙門會同順天府尹不時稽察如有隱匿旗籍私向大宛二縣納稅者立即參究 四十七年十月八旗都統等奏准旗人家下人等典買自居房屋之處仍照舊例准行嗣後將伊等另行典買房屋租人取息之處嚴行禁止如有違禁取利索求租息者照例加重治罪將伊典買房間撤出并將原價追出入官外伊主人照依約束家人不嚴之例治罪至民人等多有因謀買賣租賃典買旗房而又另行典買房間或自己居住或索取重息者除將已前旗人已經賣與民人者無庸置議外嗣後旗人房間永遠不准民人典買如有陽奉陰違或多方以指房借銀爲名倒寫年月或央煩旗人冒名典買一經發覺即照偷盜典買旗地之例將房撤出並將價銀追出入官仍治以違禁之罪 五十年十二月戶部咨准奏定則例自乾隆十八年起凡有旗下家奴典買旗地以及民人典買旗地概行查撤入官今定嗣後旗人置買產業一概不許假借家人及莊頭佃戶人等出名如有仍前借家奴人等之名者一經查出即行照例撤出入官追價治罪至從前業經借家人等名色置買旗產無論已未斷結在京在屯俱各即行查明本旗另行更名改契赴翼報稅准其管業如有逾限不行

呈明者或事後發覺或被人首告一概撤出入官追價治罪 五十七年正月戶部奏准嗣後凡民人佃種旗地若因當日原佃交租本輕現有別佃情願增租及情願自種者均由業主自便所有從前不許增租奪佃之例卽行停止再嗣後凡投充人丁地畝請照旗下圈地家奴典賣悉由本主自便

回贖民典旗地

乾隆二十二年七月戶部咨准旗人原典買旗人地畝轉典給民人者嗣後止盡尾後典給民人之業主回贖如不願贖卽照例官贖作爲公產其餘輾轉典售之人俱不准贖再典售地價止照尾後旗人典給民人價值照例按年減價回贖如價值浮多仍查照隣地價值覈計其輾轉價值多寡不符之處俱毋庸議 嘉慶十一年十一月戶部奏准嗣後八旗人等置買有民糧地其地畝坐落何州縣卽在該州縣對冊推收過割稅契以憑稽覈至旗人置買民人房間其坐落外城及城外並各州縣者均請照民地一律在於州縣過稅其坐落城內有隨地糧銀房間亦仍在縣過稅惟城內無糧房間令各按旗分赴左右翼過稅其在翼過稅者卽以跟隨紅契爲憑毋庸取具置主佐領圖記所有跟隨民契

亦不得銷毀即於該翼執照後黏連給發其房間數目坐落地方賣主買主姓名跟隨印契幾張該翼詳細登記以備查考再旗地旗房不准民人典買仍照定例辦理至本係民地民房曾經旗人置買或又輾轉賣與民人例無禁止應請嗣後旗人典買有州縣印契跟隨之民地民房或輾轉典賣與人仍從其便 十七年八月戶部奏准查民人及家奴人等違例典買旗地原例內載撤地入官按照契價議徵其餘何年徵租爲始並無明文嗣後旗奴民人等違例典買旗地除地畝入官外仍應著追歷年花利是控發之後所得花利應在買主名下著追自未便復向佃戶由控發之年起再行補徵租銀如有違例私典旗地入官議租之案行令地方官於奉文入官之年徵租爲始 旗人圈地並自置地畝在定例以前施捨寺廟香火地畝查有確據立有碑碣者准其管業外儻定例後妄行施捨作爲香火卽立有碑碣亦照民典旗地例治罪若租給僧人承種者毋庸議 各寺院喇嘛典買旗地在乾隆三十年定例以前者准其管業如在乾隆三十年定例後有私行典買者及捏稱施捨者照民典旗地例辦理 旗人指地立契向民人借貸錢文契內註有錢無利息地無租價字樣一經到官照民典旗地例辦理 凡旗人家奴及看墳人

將伊主地畝房間捏稱祖遺及自置名目盜典賣與人者照盜典官田例治罪 理藩院
外藩所轄莊頭自置地畝仍照向例於立契後原業主用給本佐領圖記赴翼過稅管業
後如欲將自置地畝出售與正身旗人者准其憑原契售賣令買主用該佐領圖記赴翼
過稅並令賣地之人將原契跟隨

回贖歸旗地畝

乾隆二十三年正月戶部奏准乾隆二十一年二月奉上諭另記檔案及養子開戶人等
俱准其出旗爲民所有本身田產並許其帶往欽此酌議嗣後凡伊等契買民地並開墾
地畝原係伊等本身田產自應准其帶往爲產至於老圈併典買八旗地畝乃八旗世產
不便將旗地帶入民籍應仍歸典買旗地案內移咨直督查明動帑官贖再嗣後凡漢軍
出旗爲民將伊等所有地畝除墳塋地畝仍應開除外其餘地畝俱覈明確數官爲給贖
贖回之後准人認買不准照公產之例仍留本旗准本旗滿洲蒙古漢軍人等照依原價
交足現銀認買爲產其未認買之先仍交該旗照例收租解部至從前漢軍出旗爲民帶
出地畝亦係旗產應令直督併各該旗查明造冊送部畫一辦理 嘉慶十七年八月戶

部奏准民人典買旗地例應撤地追價入官旗民人均按例治罪至旗地典賣與民人後民人復典賣與旗人則旗產既已歸旗應免其撤地入官其旗人所得原典價銀民人所得轉典價銀一併追繳仍各治以應得之罪若旗人自行贖回業已交價撤契者准其執業儻既經控發之後並未立契撤契捏稱典賣回贖及設法典買者應照例入官並治以應得之罪民人典買旗房及家奴典買房地均照此例辦理至民人典買旗地撤地入官後查明內有民人建立墳塋者免其遷移四至不得過五畝著照上等租則納租

行宮種樹圈佔地畝

乾隆二十五年正月總理行營事務王大臣具奏查丈得北路口內南石槽行宮大牆週圍四面舊有留得空閒地面足敷安營毋庸另外多圈地畝密雲縣瑤亭子三處行宮地面因年久失迷短少無憑可查將此項舊有預備安營地畝交地方官會同總管等查出仍作安營地面不准撥還地畝此外有原留地面不敷安營再有圈佔旗民地畝仍照原議將撥補地畝得給價值之處交該部辦理外其別路行宮舊有週圍地畝一併交該總管地方官查明報部一體辦理 是月又經具奏圈佔得北路口內南石槽密雲縣瑤亭

子等三處行宮地面俱照從前繪圖具奏其黃新莊行宮大局長一百七十丈寬一百六十丈再口外兩間房常山峪喀拉河屯中關波洛河屯張三營吉爾哈郎圖等七處行宮按地面寬窄折算放圈約計亦與黃新莊行宮大局相似再口內行宮週圍應種之柳樹仍照從前原奏創成隴溝砍取道傍柳樹大枝春融及時栽種其口外七處行宮地脉有宜栽柳亦有不宜之處再樹栽亦毋庸另行購買即於各本處行宮附近所出各種山間樹木取來酌其土宜栽種口外氣寒新栽樹株飭交種樹之地方官務令加意栽種整齊儻有草率塞責所栽樹株多致回乾該總管等即行參奏議處外仍令補栽至所栽之樹長成整齊後其看守人役若不敬謹看守以致被人擷傷不能整齊俱令該總管等嚴行約束料理所有此項口內圈佔地畝另行具奏照依原議交戶部查辦外其口外所有地畝俱係新經開墾石沙薄瘠地畝交該總管熱河道查辦又查蘭溝懷柔縣羅家橋巴克什營王家營黃土坎十八里汰等七處俱係尖盤行宮湯泉熱河與圓明園一體俱毋庸圈佔地畝仍循舊制 是年二月奉上諭所圈行宮附近週圍地畝不准耕種正爲作大營之所理宜計算朕躬所過之時留之如概令拋荒不許耕種亦甚屬可惜即如朕躬行

幸木蘭總在秋令若麥田及早熟之穀儘可施種至若兩陵朕春令前往致祭於朕躬所過之後洵堪播種秋禾如秋季前往則春苗可種此內務府總管所得與知伊等儘可傳示知之著交內務府衙門將此次圈定地畝賞給各行宮千把總兵丁計算朕躬所過應留之分令其留之或於未過之先種以得收之禾或已過之後種以應時之穀皆可如此則此項地畝既不致於徒然廢棄且於行宮弁兵生計亦有裨益著交內務府總管等加意辦理欽此 是年四月奏准東西兩路行宮各有種樹圈佔地畝北路行宮七處內除南石槽懷柔縣密雲縣羅家橋瑤亭子三家店六處行宮有種樹圈佔地畝外蘭溝並無種樹圈佔地畝口外行宮十三處內除兩間房常山峪喀拉河屯中關波洛河屯張三營吉爾哈郎圖等七處有種樹圈佔地畝外其巴克什營王家營熱河釣魚臺黃土坎十八里汰六處並無種樹圈佔地畝酌定無論有無圈佔地畝將東路圈佔地畝即合併勻均分給看守東路一帶行宮千總把總兵丁等承種西路北路口外此三路圈佔地畝俱照此交該總管遵照辦理外其每年或春季秋季播種禾苗之處於開印後內務府具奏所有分給看守四路行宮弁兵地畝細數開後

東陵所屬行宮所種樹木圈佔地畝共十三頃二畝七分

燕郊 白澗 桃花寺 隆福寺 盤山 大新莊 學警山等七處

內圍千總共七員 每員分種地十一畝

委署千總共七名 每名分種地九畝二釐

外營千總一名 分種地九畝二釐

外營把總共七名 每名分種地九畝二釐

內圍兵共九十一名 每名分種地五畝八分

外營兵共九十七名 每名分種地五畝八分

以上內外千把總兵丁共二百十名

共分種地十三頃二畝七分

西陵所屬行宮所種樹木圈佔地畝共九頃八十畝七分

黃新莊 半壁店 秋瀾村 梁格莊等七處

內圍千總共四員 每員分種地二十三畝三分七釐五毫

委署千總共四名每名分種地十九畝四分

外營把總共四名每名分種地十九畝四分

內圍兵共二十八名每名分種地十二畝二分

外營兵共三十二名每名分種地十二畝二分

以上內外千把總兵丁七十二名

共分種地九頃八十畝七分

湯泉所屬行宮新種樹木圈佔地畝共八頃二十八畝

藺溝 石槽 懷柔縣 密雲縣 羅家橋 瑤亭子 三家店等七處

內圍千總共六員每員分種地八畝三分八釐三毫

委署千總共六名每名分種地六畝二分

外營把總共九名每名分種地六畝二分

內圍兵共三十六名每名分種地四畝一分

外營兵共一百三十一名每名分種地四畝

以上內外千把總兵丁共一百八十八名

共分種地八頃二十八畝

熱河所屬行宮新種樹木圈佔地畝共九頃六十六畝五分三釐

兩間房 巴克什營 常山峪 王家營 喀拉河屯 熱河 釣魚臺 黃土坎 中

關 十八里汰 波洛河屯 張三營 吉爾哈郎圖等十三處

內圍千總共十八員每員分種地二畝五分六釐八毫

委署千總共二十八名每名分種地一畝九分

內圍兵共六百六十七名每名分種地一畝三分

以上內圍千總兵丁共七百十三名

共分種地九頃六十六畝五分三釐

行宮內外千把總兵丁共一千一百八十三名

共分種圈佔地畝四十頃七十七畝九分三釐

五十一年正月馬蘭鎮總兵奏請隆福寺改安喇嘛設立看守兵丁十名比照看守行宮

兵丁之例添蓋房間每人例應撥給隨差官地養贍隨經奏准隆福寺改安喇嘛設立看守兵十名建蓋瓦房十二間撥給照例每兵丁月給錢糧銀一兩外仍賞給隨差官地六十畝交戶部照例撥給查盤山十四處黃新莊等四處行宮兵丁應得地畝租銀俱交該州縣代爲官徵送陵寢內務府轉交該行宮總管等逐名分給此項撥給新設看廟兵丁地畝亦請交戶部轉飭該州縣各按應得租銀數目代爲官徵解送東陵內務府交該總管按名放給

咨送太監等米石冊檔

乾隆二十八年三月奏准酌定將太監等應領米石於紫禁城東華門外面所有空閑圍房內選撥七十餘間設立倉廩存收備放奉旨賜名恩豐倉揀派內府司官一員內管領一員更年收放 是年五月呈准太監等應領米石自本年七月秋季起在新設恩豐倉支放三旗太監等一年應領米石仍遵舊制鑲黃正黃旗定於正四七十月正白旗定於二五八十一月內支放其四季應食米石毋庸咨旗轉部照豐益倉食米太監之例於前兩月不過初十日將該管領下太監等應食米石花名細冊由會計司移送恩豐倉覈明

支放

旗員子弟隨任

凡外任旗員帶子隨任或據該旗來文或由本身具呈查覆辦理 乾隆七年正月奉旨

嗣後外任旗員子弟年至十八歲以上者在外仍令該督撫題請在內有情願隨任者著

呈明該都統查奏俱准其隨任欽此 道光二年三月鑲黃旗滿洲都統議覆奏准嗣後

旗員外任文職州縣以上武職守備以上以及督撫提鎮大員如族親內有品行端方諳

練公事情願令其隨任幫辦公務者或有篤睦家族親黨帶往令其讀書肄業者大員准

其咨報該本旗餘則呈報督撫將軍都統提督轉咨該本旗查取本人父兄情願准其隨

任甘結報部發給路照前往不願者聽其非由本任職官呈請而本人願往者一概不准

如有呈請尊長隨任者由該族長出具並無抑勒甘結該佐領加結呈報該本旗查覈屬

實方准隨任如敢私行潛往仍照例治罪到署後如有不准管束者輕者報明督撫等咨

遣回旗重者照例懲辦至漢軍向有佐雜人員雖官職較微不無需用親丁之處應請照

此辦理並由京補放人員有願攜眷偕往者亦由本員呈報本旗准其一體隨往該參佐

領等如有故意挑剔藉端勒措刁難等事或由告發或經查出從重懲辦並著各省該管官嚴加查參如有不安本分滋事者由本員查出呈報免其議處別經發覺本員失察者照失察例議處徇庇者照徇庇例議處

學藝人等錢糧庫銀米石

乾隆三十二年正月奏准南府景山三旗佐領管領下學藝外家二百五名所食錢糧支借庫銀向由戶部支領借給招募學藝外家共二百二十五名所食錢糧支借庫銀向由崇文門支領借給今將學藝人等支借庫銀之處既經奏准照依各太監支借庫銀之例畫一辦理應將外家學藝人食一兩至四兩以上者共四百三十名照依原奏每銀一兩借給庫銀十兩合計共應借庫銀七千七百四十兩由廣儲司照數借給其坐扣本利月分均照太監等支借之例辦理再查招募學藝外家每月錢糧銀四百九十三兩五錢既由崇文門支領而三旗佐領管領下學藝外家每月錢糧銀三百四十二兩又係由戶部支領原辦均未畫一應將三旗學藝外家招募學藝外家每月應領錢糧銀八百三十五兩五錢通計一年應支領銀一萬二十六兩交崇文門於二八月兩次解交廣儲司按月

支給至三旗外家應領米石亦一併改入內務府恩豐倉同太監等米石一體支放其初借庫銀時坐扣利銀三百九兩六錢每月應扣庫本銀三百八十七兩即由廣儲司坐扣其錢糧庫銀即由二月起支放所有從前伊等支借庫銀坐扣未完者查明按數仍扣交戶部崇文門歸還原欸

旗人承繼

嘉慶二十四年五月奉上諭御史希寧奏請清釐戶口一摺八旗生齒日繁近日竟有希圖冒領錢糧抱養民人之子或以戶下人之子爲嗣者不可不嚴行清釐著八旗都統副都統發現天良通飭參佐領等詳加查察不可姑息不可畏難如有抱養等弊責令該族長隨時呈報究辦如扶同徇隱別經發覺定將該族長治罪不貸欽此 道光二年三月鑲黃旗滿洲都統等會議奏准嗣後旗人承繼應復舊例查旗人承繼舊例凡無嗣者許立同宗昭穆相當之姪承繼先儘同父周親次及五服之內如俱無方准擇立遠房及同姓各嗣如同宗內並無昭穆相當可立爲嗣請繼另戶異姓親屬者查非戶下家奴及民人子弟取具兩姓族長並參佐領印甘各結准其過繼如實有同宗而繼異姓者按律治

罪 道光三年五月奉旨據綿志等奏世管佐領宜慶現在出缺族中並無襲替之人其母張氏呈請將伊姪張煦年過繼爲嗣覈與條例相符著准其過繼承祧其承襲之世管佐領著改爲公中佐領由該旗照例揀選帶領引見嗣後如有世襲旗人如過繼本族爲嗣方准其承襲世職其以另戶異姓親屬之人過繼爲嗣者不准承襲著八旗都統一體遵照欽此

換地爲塋

道光三年十一月准戶部咨八旗官員兵丁等有因祖塋地窄不能容葬遵例以祖遺及自置地畝三畝呈請兌換官地一畝爲塋者經本部覈其本身地租與官地租息有盈無絀即准兌換歷年辦理在案嗣該旗人等或因指換官地低窪零星難以點穴呈請改換本部覈明情節亦隨案覈准迺近來該旗人等任意挑選有初次請更繼復再換紛紛具呈實屬瑣瀆嗣後凡有兌換官地者除實因所換官地業經動撥無可指交方准更換外其餘一經呈認不准再改 四年十一月戶部奏准大臣官員兵丁兌換官地爲塋仍按該員品級大小應用地畝數目舊例辦理嗣後八旗官兵有兌換官地爲塋者各令其本

旗呈明是何職官抑係兵丁閑散所葬何人係何品級請換地畝若干內應用塋地畝數若干於呈內詳細聲明如換地之人以所葬之人官階不同從其品職大者其兵丁閑散均照庶人之例該參佐領據呈查實加結具報移咨本部覈明轉飭各該州縣俟該旗人於地內指明立塋處所按照會典及律例所定頃畝於四至立定界石在塋地外就近酌給看墳人養贍地畝各按所換畝數以十分之一爲斷均由地方官照數丈清責令佃戶退給毋許延抗並令各該州縣俟該旗人立塋之後仍即報明本部以杜捏飾其餘地畝俱准作爲祭田仍令各原佃承租照原定官租之數向該旗人按年交納以爲祭掃之用佃戶不得盜典抗租業主亦不得增租奪佃違者俱照例治罪其盜典抗租佃戶准該旗人將地撤出另行招佃承租儻有假託葬墳及借名呈換並以不堪耕種下地兌換入官希徒牟利者察出立將官地撤回仍治以應得之罪並將查報不實之參佐領交部議處

旗人銷檔章程

道光六年六月准戶部咨如有旗人犯竊自應按照刑部通行頒發則例辦理初次犯竊即銷除旗檔犯該徒罪以上者照民人一體刺字發配罪止笞杖者照律科罪免其刺字

後再行竊依民人以初犯論其情同積匪及贓逾滿貫者該犯子孫一併銷除旗檔各令爲民嗣後旗人如有罪止銷除本身旗檔者其原食錢糧仍照例於緣事之日爲始覈計咨追若罪及子孫一併銷除旗檔者其子孫所食錢糧應以刑部定案之日爲斷覈計追繳仍令各該旗於比丁之時將三年屆內銷除旗檔人丁花名造具總冊送部以便審比而歸覈實 八月准戶部咨刑部議定逃走旗人既經銷除旗檔其妻未便仍以旗人論自應一併銷除旗檔所有銷除旗檔人等之妻定案在刑部未定章程以前者其應得養贍錢糧以及病後白事賞銀仍照旗人之例一體給與若定案在刑部已定章程以後者既未便仍以旗人論其養贍錢糧不准添支病故後白事賞銀則視其子孫分例給與若無子孫不得援引請賞

獨子分祧服制

道光九年十一月禮部奏准獨子之子分祧以後一切服制

一獨子之子分承兩房宗祧者爲其父母之服應定議也查獨子兼承兩祧兩房分祧之子皆獨子之親子無降服之議應各爲父母服斬衰三年

一獨子之子分承兩房宗祧者各爲其祖父母之服應定議也查律載孫爲祖父母齊衰不杖期適孫爲祖父母承重斬衰三年伏查孫爲祖父母服期承重服三年服之正也獨子於兩房父母不皆服三年特以一子兩祧限於古人不二斬之義從其變也竊意一子兩祧則子之服不得不從其變兩孫分祧則孫之服應從其正緣情定制不當以子之變服並殊異其孫之正服應請兩房承祧之孫各爲祖父母服齊衰不杖期父卒適孫承重俱服斬衰三年

一獨子之子承祧別房者其本身及其子孫爲其本生親屬之服應定議也查律載凡男爲人後者爲本生親屬孝服皆降一等又刑部則例內載凡本宗爲人後者之子孫於本生親屬孝服祇論所後宗支親屬服制各等語查獨子兼承兩祧在本房猶爲承祧之子非出繼也至獨子之子專承別房宗祧者始全乎爲人後之事是當以爲人後之本身論不以爲人後者之子孫論也應請獨子之子承祧別房者其本身爲本生親屬俱從正服降一等其子孫爲本生親屬祇論所後宗支親屬服制

一禮部則例內載獨子承兩房宗祧如以大宗子兼祧小宗或以小宗子兼祧大宗均以

大宗爲重爲大宗父母服三年爲小宗父母服期年如以小宗子兼祧小宗則以所生爲重爲所生父母服三年爲兼祧父母服期年又或同屬小宗先經出繼而本生父母物故無嗣族議仍以一人承祧兩房者因屬出繼在前照例爲本生父母服期年爲所後父母服三年等語查小宗子出繼小宗如已爲所後父母丁憂持服嗣經兼祧兩房者自應照禮經不貳斬之義爲所生父母服期年如雖出繼在前尙未爲所後父母丁憂持服旋經兼祧兩房者應仍以所生爲重爲所生父母服三年爲兼祧父母服期年

一同父兄弟如兄爲官其弟報考例應編入官卷如係同父分祧兄弟服應從降勿庸編入官卷

分府莊頭子弟考試

道光十二年四月本司呈准已撥和孝固倫公主府莊頭劉承祿之孫劉友蘭赴禮部呈請考試據禮部文稱查例載內務府承領官地莊頭及王公戶下由內務府撥出之莊頭旗檔有名者歸入本旗漢軍考試所生子孫不得復入民籍冒考旗檔無名者歸入民籍考試所生子孫不得混入旗檔冒考等語查莊頭劉友蘭係內務府撥出賠嫁和孝固倫

公主莊頭劉承祿之孫據內務府查明與從前由內務府撥出賠嫁之莊頭張志仁罔育璞等歸旗報考之案相符自應准其考試等因前來查劉友蘭具呈報考現經禮部覆准自應照依部咨准其歸入原旗原管領送名應考不准歸入該旗冊檔充當內務府莊頭亦不准挑補內務府差使所有伊家未經報考之人仍留該府當差以免紛紛藉考試爲名呈請回旗

遞奏事宜

道光十三年六月奉上諭前因奏事處率行接收不識姓名人擅遞封章降旨將哈朗阿等分別降調降留並令御前大臣軍機大臣會同妥議章程茲據長齡等詳議具奏嗣後奏事官接收奏章宮內辦事之日著於寅刻在內左門外九卿值班房接收圓明園辦事之日在出入賢良門外朝房內接收如遇臨幸各處即在該處宮門外朝房內接收每日接遞之際著奏事官先接尋常摺奏再接封奏務當逐件詳慎檢明其聯銜封奏及尋常摺奏均着各衙門出具印片交該遞摺官員等隨摺交奏事官以憑覈對至單銜遞奏封章者自親王以至御史均著親身呈遞該奏事官如有查明匿名奏章及形跡詭詐實在

可疑之人除將呈遞之件存留一面指令黏竿處該班侍衛等將遞事之人嚴行看守一面回明御前大臣查明奏辦儻奏事官無故吹求有將奏摺應接不接者即著呈遞之人回明御前大臣參辦欽此

旗人留養事宜

道光十七年六月准慎刑司呈准向來本府三旗人丁遇有犯罪應否留養俱經刑部咨查本府由堂交司轉交該旗查報而該旗又須查明本犯家屬出具圖片報司本司僅以圖結備文覆部亦有該佐領管領查明出具圖片自行報部者其該犯有無父母及是否獨子應否留養如報到本司亦惟憑該旗圖結咨部辦理殊未盡一查人丁戶口會計司均有檔案可稽嗣後遇有刑部咨查留養之案由堂交會計司並慎刑司由會計司交該旗佐領管領查明取具族長隣保各結由參領查明是否屬實加具印結一分具報慎刑司一分移送會計司詳覈戶檔該犯父母存故年歲是否實係獨子有無次丁應否留養移付本司以憑呈明咨覆刑部辦理

移會事宜

道光十九年三月奉旨刑部奏訊明書吏傅以宣誑騙得贓捏造白片一案各衙門遇有緊要公事不及用印原准先用白片知照仍聲明後補印片字樣現在吏刑二部既查出書吏私行白片之案自當申明舊章以杜弊端嗣後除尋常日行事件毋許擅行白片外如有緊急文件不及鈐蓋堂印應先行白片知照者仍於文後寫明後補印文次日即呈堂標畫補行儻遲至三日不補印文即由接到白片衙門行文查問以昭慎重餘依議欽此 四月奉旨據給事中張秉德奏戶部書吏王姓到庫領取銀硃等物在打磨廠小門該吏住宅搬卸刑部書吏鍾姓領取臺連紙張等物在前門外西域牆永泰紙鋪搬卸顯有盜賣抵換情弊書吏王姓鍾姓著交刑部嚴行審訊嗣後在京各衙門赴庫領取物料著該堂官派委筆帖式司務廳等官帶領書吏赴庫憑文領取並著於領回物件時進署當堂銷差以絕弊混欽此 二十五年六月本府奏准查會典內載六部理藩院都察院內務府各旗都統步軍統領衙門往來行文均用咨六部都察院行順天府用劄六部行太常寺太僕寺光祿寺鴻臚寺國子監欽天監太醫院各關監督各省鹽政織造均用劄行府廳州縣用牌文惟本府行順天府各寺監衙門各廳州縣應用何文會典內未經載

明嗣後本府行文京外各衙門以及各廳州縣均比照六部體制鈐用堂印咨行其京外各衙門府廳州縣行文本府亦即遵照行文六部體制遵行以符體制

裁撤書吏

道光二十一年十二月本府奏准都虞司會計司掌儀司營造司慶豐司管理三旗銀兩莊頭處額設書吏均無專責承辦之件亦僅止書寫文稿等事今廣儲司書吏既擬裁汰應請將都虞司會計司掌儀司營造司慶豐司及管理三旗銀兩莊頭處書吏一併陸續裁汰仍俟五年役滿照例考試後分別等咨送吏部辦理即令退卯毋庸另行招募接充其應繕文稿等件亦令各該司司員等挑選能以書寫之栢唐阿等繕寫以歸畫一

接收丁冊

道光二十四年九月准吉林將軍咨稱嗣後吉林水手營凡屆比丁之年造具三代冊檔三分一分存案一分咨送戶部一分咨送內務府備查 十二月奉旨前據德誠奏擬將內務府官員栢唐阿等丁口冊檔援照八旗成案咨送內務府存查一摺當交該衙門議奏茲據內務府奏稱向因稽查戶口該管領等於京中不能切近准以查考是以並不造

送戶口丁冊惟德誠所奏究爲預防流弊起見著仍照所請准其將西陵內務府額設官員栢唐阿等三百餘戶每於年終將添裁丁口冊檔造送內務府存案其東陵內務府事同一律亦著照此辦理嗣後該官員栢唐阿等遇有干議事故其在京管領佐領相距較遠查察難周並著免其查議所有造送丁冊應如何援照八旗成案辦理之處著該衙門再行妥議章程具奏欽此 是月本府議覆奏准嗣後東陵西陵內務府官員栢唐阿等戶口丁冊即援照八旗官員兵丁戶口造冊咨送京旗之案將各戶口丁冊詳細各造二分咨送本府交都虞司會計司收存遇有該處官員等陞遷事故及添裁丁口於未到時即令隨時稽查儻有不符之處即行呈明查覈辦理每遇京中更換佐領管領時仍循照舊章行知該處亦即註冊

鈐用印信

道光二十五年六月本府奏准嗣後除本府所屬各司處互相行文並六庫開庫日期領用銀兩物料呈報景運門御史衙門及行文三院王府門上各等處仍照舊行用司印外其餘應行京外各衙門文書均著呈畫堂稿改用堂印如遇緊急事件用堂印不及者呈

明先行白片後補印文如僅止行查知照咨覆無關緊要之件未便具稿即照各衙門設立堂行簿呈堂標畫後用印咨行或撤取預用空白印片咨行 十月本府呈准嗣後各司處堂行簿均著鈐用司印騎縫以憑稽覈